






M

Referred To II p 29. m4

5.10.18.6-





GREGORII NYSENI
CONCIONES QVINQVE
DE ORATIONE DOMINI.

Eiusdem
CONCIONES OCTO
DE BEATA VITA COMPARANDA.

Omnes a Petro Galesinio conuersæ.

His adiuncta est ab eodem Nyfeni uita e ueteribus
auctoribus collecta.



ROMAE M. D. LXIII.

Apud Paulum Manutium, Aldi F. 20

GREGORINUS

CONCILIUM

ANNO DOMINI

1545

CONCILIUM

TRIDENTINUM

CONCILIUM

TRIDENTINUM

ANNO DOMINI



ROMAE

1545

Exemplum priuilegii.



MOTV proprio &c. Cum nuper ad huius almae Vr-
bis ornamentum, & publicam studiosorum omnium
utilitatem nostro iussu instituta in hac Vrbe fuerit
officina librorum pulcherrimis characteribus, & sum-
ma cum diligentia imprimendorum, praesertim sacro-
rum, ecclesiasticorumque scriptorum, accersito Venetijs, et huic ne-
gotio praeposito dilecto filio Paulo Manutio, cum eruditissimo uiro,
tum paterna in hac arte laudis, & industriae imitatore, providere,
sicut equum est, uolentes, ne eius labor, & industria, fructum quae
aliis allatura est, ipsi uni detrimentum afferat; quod euenturum esset,
si libros eius diligentia, et cura non sine magnis sumptibus emendatos,
& impressos, atque editos alii postea imprimerent, atque ederent,
minore forsitan etiam adhibita diligentia: Vniuersis & singulis libro-
rum impressoribus, & bibliopolis tam extra, quam intra Italiam,
sub excommunicationis latae sententiae pena, nostra uero, & sanctae
Romanae Ecclesiae temporalis ditioni immediate, mediateue subiectis,
etiam sub pena quingentorum ducatorum auri fisco nostro applican-
dorum, & amissionis librorum ipso facto, etiam sine declaratione cu-
iusquam Iudicis incurrendis, inhibemus, & interdicimus, ne quis ul-
lum ex libris aut ecclesiasticorum scriptorum, aut cuiuscunque gene-
ris, qui aut nunquam ante editi fuerint, aut quos ipse Paulus primus,
sublatis mendis, correxerit, declararitue, seu corrigendos, declaran-
dosue curarit, siue illi Graeci, Latini, linguae Italicae communi, siue
& Graeco sermone in Latinum Italicumue conuersi, imprimere, uel ab
alijs impressum uendere, aut uenalem proponere, & habere audeat
per annos quinque, ab eo tempore, quo Paulus eum ediderit, compu-
tandos: Mandantes dilectis filiis nostris Camerario, & Vicario Vr-
bis, necnon Gubernatori, Senatori, Camera Apostolica causarum
Auditori, & alijs Urbis ordinarijs Iudicibus, Legatisque, Vicele-
gatis, Gubernatoribus, & Potestatibus terrarum sanctae Romanae
Ecclesiae, Baricellisque, & executoribus earundem, ac uenerabilibus
fratribus singularium extra terras praedictas ciuitatum Archiepisco-
pis, & Episcopis, eorumque Vicarijs, ut quoties ipsius Pauli nomi-
ne requisiti fuerint, ei efficaciae defensionis praesidio assistentes praem-
issa omnia, & singula contra inobedientes, & contraueniennes ad

executionem censurarum, et poenarum praedictarum, omni, & quacunque appellatione remota, procedant, & quilibet eorum procedat, inuocato etiam, si opus fuerit, auxilio brachij saecularis. Quia nero difficile esset hanc nostram cedula[m] originale[m] ad singula loca deferri: Volumus quod de eius tenore, quod ad prohibitionem nostram huiusmodi attinet, credi debeat exemplis in ipsis libris imprimendis, seu etiam non inserto tenore narratis: ita quod sola narratio, seu enunciatio in ipsis libris, ut moris est, facienda, ad effectum, ut contra inobedientes, ut praefertur, procedi possit, sufficiat. Et maioris efficaciae causa volumus ut originalis ipsa cedula per Cursores nostros hic in Vrbe in locis consuetis, ut moris est, affigatur, & publicetur: ne quisquam ignorantiam eius ualeat allegare: Decernentes irritum, & inane quidquid secus fieri contigerit: Non obstantibus constitutionibus, & ordinationibus Apostolicis, priuilegijs quoque, & indultis quibuscunque, alijs super imprimendorum librorum facultate forsan concessis, & innouatis, ceterisque in contrarium facientibus quibuscunque.

Placet motu proprio.

CAROLO BORROMÆO
CARDINALI AMPLISSIMO
PETRVS GALELINVS S. D.



QUAM DIU Græcia, Borromæe Amplissime, in Romana fide, & in officio erga Romanum Pontificem pie sanctæque permansit, tamdiu illam & incolumem, & florentem, & beatam plane uidit maiorum nostrorum ætas. Sed cum primum Ioannes quidam obscuro, & humili locutus, Constantinopolitani episcopus factus est; tum suscepta ab eo temere primum cum Pontificibus Romanis, sanctissimis uiris, Gregorio, & Pelagio contentione, florentissima illius prouinciæ status ex eo tempore ad interitum sensim rueri cæpit. Is enim ut homo marori atque inedia deditus, cum speciem sanctitatis aliquam præ se ferret; solidam uero atque expressam effigiem haberet fortasse nullam; hac adumbrata non solida sanctitatis ratione in Pelagij Pontificis Romani beneuolentiâ adeo se insinuauit, ut illius urbis postea crearetur Episcopus. Itaque graculus homo, ut is, qui specie quadam bonus uideri uellet, quo facilius id assequeretur, quod animo iamdiu maxime concupierat; Episcopus iam factus non diu ingenium dissimulauit ac mores suos: sed ea plane arrogantiâ se esse ostendit, qua omnia sibi licere putauit: honorumque studio, quod antea belle occultarat, ductus, ad id temeritatis atque adeo dementia uenit; ut et auctoritate summi Romani Pontificis contempta concilium indiceret; et amplitudinis eam potestatem, quæ illi soli diuinitus tributa est, sibi ambitiose arrogaret; cum Ecclesiæ se uniuersæ Episcopum & dici, & esse uellet. Huic sane rei etsi bene sapienterque occursum est ab illis ipsis Pontificibus, quos modo nominasti; Græci tamen, ut est genus hominum, qui contaminati semel atque obcæcati erroribus, non facile ab ipsâ auerti possunt, in illa præposterâ ambitionis opinione ita obstinato animo obduruerunt, ut Romanam Ecclesiam sexcentis postea modis oppugnarint. Sin autem attenditur oppugnatio eius generis extitit, ut, quæ oppugnata uehementissime fuerat, Ecclesia Romana omnino steteret; ij uero, qui illam oppugnant, funditus interierint Græci. Nam ingenio cum illi sint mobili atque inconstanti; quemadmodum olim pepererunt in philosophia factiones, quæ inter se & re, & nomine dissiderent; cum nonnulli quidem

dem Epicurei essent, plerique omnes Academici, alij Peripatetici, alij
alian sectam sequerentur: idem in ijs, quæ fidei sunt ac religionis, cum
omnino effecerint; ut modo scilicet de Deo & Christo, modo de Spiritu
sancto, modo de alijs religionis partibus a fidei catholice ueritate dissen
serint: hac in ita diuersarum opinionum ratione arbitrati sunt christia
na societatis uinculum posse dissolui; hocque pacto Ecclesiæ Romanæ,
cui illi maxime inuidebant, euerti fundamentum. Impia quidem fuit
hæc, & scelerala plane oppugnatio, ideoque illis ipsis perniciosa. Quæ
quidem res omnis etsi in promptu satis esse uidetur; tamen quoniam
plerisque exemplo esse potest, ut alienæ calamitatis periculo religioso
admoniti, in officio sese contineant: id enitar maxime, ut quoad eius
fieri possit, tota res sub sensum ueniat. Sergius sit Constantinopolita
næ ciuitatis Episcopus, Monothelitas nouos hæreticos inducit, qui Ro
manam Ecclesiam catholica ueritatis parentem turbent; mortuoque
Sergio huius sæctionis duces succedunt Pyrrhus, & Paulus: hisque
sese comites & adiutores præbent Imperatores duo Heraclius et Con
stans, qui Heraclio auo successit. Itaque dum hi Romanum Pontifi
cem Martinum uehementissime oppugnant; has, quæ suo parebant im
perio, prouincias amittunt, Aegyptum, Africam, & Syriam pane
omnem. Constans autem bellua, non homo, quoniam Martinum ipsum
multis primum cruciatibus afflixit, deinde morte affecit, pœnam suo
scelere dignam suscepit: siquidem a Longobardis militibus Roma pulsus
Syracusas uenit; quæ in urbe necatus misere obiit. Huius uero nepos
Iustinianus cum sibi turpe esse putaret ab auo degenerare; illud im
pense curat, ut caperetur Sergius: qui cum esset Pontifex Romanus,
nefarijs eius conatibus ualde repugnabat, longeq; ab ea opinione dissi
debat, in qua ille, ut Monothelita hæreticus impie uersabatur. mittit is
eo nomine in Italiam tribunum Zachariam; ac militibus, qui Raue
nnæ in statione manebant, imperari iubet, ut rem nefariam ipsi omni
no adiuuent. sed contra factum est, atque ille iusserat: milites enim
primum hoc facere plane denegant; deinde Romani tribunum, cui ta
le factum proprie mandatum fuerat, ita male accipiunt, ut nihil pro
pius fuerit, quam ut occideretur; nisi ipsius Pontificis, de quo ille ni
hil nisi crudeliter cogitaret, clementia ei fuisset adiumento. Scelera
ti autem huius consilij auctor Iustinianus tanquam homo infamis, qui
eiusmodi facinus ausus esset, pœna, Deo nolente, punitur, quæ ueluti
infamiae nota fontibus irrogari solet: nam lingua abscessa, nasoq; item,
in exilium a Leontio, qui illius locum occupat, mittitur. Atque Philip
picus

picus quidem, qui deinde successit; & paulo post Leo Isaurius san-
ctorum imaginibus inimicus, unus & item alter bellum Ecclesia
Romanae indicit, quæ heresum expultrix est. huius autem impie
temeritatis pœna, ut annalium est litteris proditum, in utroque gra-
uis fuit. Philippico enim, contra quem paulo ante illud ad sempi-
ternam infamiam notam statutum erat; ut, cum læsæ sanctorum maie-
statis reus esset, eius nomen neque publicis, neque priuatis monumen-
tis inscriberetur; oculi denique eruantur. cum Leone autem male
actum esse legimus; quoniam de imaginibus cum a se Pontifex Gre-
gorius huius nominis XI. plane dissideret; de eo interficiendo consilium
capit. Pontificem hunc omnis pene Italia tuetur: illum Imperatorem
oppugnant ijs, qui illius imperio subiecti parere omnino debuerant. quo
fit, ut impio hoc Leonis consilio Græcorum in Italia imperium primo
debilitatum, sceleratioribus postea Constantini, qui scelerato patri
successit, actionibus contra ecclesiam Dei susceptis, totum pene amittatur.
Rauenna enim, quæ urbs illorum exarchiæ præsidium fuerat,
ab Longobardorum rege Astulpho capitur; qua capta nulla postea
fuerit eorum in Italia vires, nulla imperij maiestas. Itaque dum Græci
conatum omnem adhibent, ut Pontificis Romani imminuant uel po-
testatem, uel auctoritatem; faciunt ipsi quidem id magno cum suo
malo: Pontificis autem & Ecclesiæ Romane potestas illorum oppu-
gnationibus non modo aliqua ex parte non imminuitur; sed etiam
atque etiam ualde augetur. amittunt illi hoc modo & Rauennam ur-
bem, & AEmyliam prouinciam: hanc ipsam Stephani Pontificis au-
thoritate ab Astulpho recuperat gallorum rex Pipinus: & quoniam
is animo pio erat, ac liberali, planeque regio, illam uniuersam donat
Ecclesiæ Romane. At uero Græci utpote leuiculi homines, quos sa-
pe uel parua falsæ laudis aura ab honestatis cursu dimouit; maximis
illis incommodis atque detrimentis facti nibilo meliores, non desunt
male sentire, aut agere: sed uel ea ratione, quia nobis res optime ca-
deret, iratiores esse incipiunt; atque usque adeo malo animo esse per-
gunt, quoad impijs suis contentionibus nobiscum, quorum nomen pes-
sime oderant, ipsi certando omnino perierunt. Certe si uere iudicare uo-
lumus, etsi religionis ratio hostes aliquando illos nobis fecit: tamen ad
hoc ipsum in illis multum potuit aut eorum in nos odium, aut inuidia,
aut crudelis illa ambitio, quæ multorum annorum usu inueterata in il-
lorum animis alte iam radices egerat. Nam ijs animi morbis sape com-
moti, tanquam circæo aliquo poculo repente mutati, a clementissima illa
quidem

quidem, ac modestissima natura desciverunt, quæ clarissimis maiorum suorum, quos uel ipsius natura, uel religionis lumen posteritati commendauit, monumentis expressa elucet. Itaque homines tam nefarii, tam diu facti, atque adeo sanguinolenta rabie in nomen nostrum accensi, non iure, non lege non ullo christiana pietatis exemplo ad reip. christianæ quietem, concordiamq; perturbandam toties accesserunt; quoties a fidei nostra societate defecisse litteris proditum est. hoc autem ita temere, ita leuiter fecisse legimus, ut repetita ex ueterum monumentis ueterum seditionum memoria, illud plane intelligamus, de concordia christiana ciuitatis dissoluenda, aut sarcienda negotium illos eo animo suscepisse; ut cum uentiosissimi homines sint, & leuissimi uel omnium iudicio; eam ipsam ter decies conglutinatam, toties item disungere parum sua interesse putarint. Res tamen illis maxime omnium perniciofa hæc fuit; & indigna profecto Græcis illis uetere Græcia dignis, qui quoniam e religione uixerunt, libris pie sanctæque scriptis, sempiternam in christiana rep. concordiam procurarunt. Posteriores igitur, qui in Græcia tum minus bene constituta uixerunt, male sani homines, atque audaces in primis maiorum suorum doctrina, atque exemplis, publicorumque conciliorum auctoritate peruerse abutentes, illud impense faciunt; ut discordiarum semina iaciant, inuidia dumtaxat, uel odio inflammati; quod quidem eiusmodi fuit in nos; ut quamuis modo unus, modo alter illius provincia ordo nobis bellum indixerit; uniuersi tamen nostros mores ritusque quasi ex ultima repetitos barbaria aspernati sint omnino. Quamobrem si illius provincie episcopi nobiscum aliquando fecerunt; eius tamen Imperatores in seculo fuere nobis atque infesto animo: aut si ij quidem rebus nostris fauerunt; uulgus tamen in inueterato odio permanere maluit, quam Imperatoribus suis latinorum studiosis obtemperare. Sæpeque factum est, ut cum Constantinopolitanorum episcopi nobis adhaerent, Romanamq; fidem officiose, atque pie colerent; tanto tamen odio in Pontificem Romanum exarserint Imperatores; ut ad eum uel litteras mittere prohiberentur: id quod Nicephorum, in quo nulla fuit religio, nulla fides, statuisse accepimus. Sin autem qui catholici essent episcopi; in Romani Pontificis potestate & officio eos permanere compertum esset; hi ab ecclesia, quam pie gubernarent, omnino pellebantur. Ignatius uir sanctitatis laude clarus, quoniam est in Romana fide, Constantinopolitano episcopatu per iniuriam amouetur. Photius homo militaris in illius locum sit episcopus. hoc improbe factum im-

probat Nicolaus Pontifex, & Photium, qui hoc temere attentasset, iure damnat. Hinc tamen maius dissensionum seminarium, hinc Græcorum contra Latinos de Spiritu sancto ea contentio, a qua extitit totius Græciæ interitus. nam etsi Spiritum sanctum tum a patre, tum a filio proficisci pie sancteque decretum erat frequenti patrum consensu, qui Constantinopolitano, & Niceno posterioribus concilijs interfuerant: Photius tamen homo Græcus, qui lasus; si modo leditur is, qui lege iureque plebitur; dissidij causam querebat; Pontificem propterea Romanum Adrianum huius nominis II. eo nomine accusat, quod christiana fidei symbolo addidisset; Spiritum sanctum a filio etiam procedere. Hoc quam superbum fuerit, quamne a christiana disciplina pudore alienum, atque a sanctissimorum patrum institutis plane abhorrens, omnium sit existimatio. ego uero illud affirmare ausim, ad ceteras Græcorum calamitates nihil ipsis potuisse accedere hac ipsa re neque calamitosius, neque exitiosius. Illi hoc iam sciunt, illi hoc iam uident, & perspiciunt aliquando quanto cum suo malo insanierint; cum iam nefarii sui sceleris conscientia abiecti, in summis uitæ & fortune sordibus duriter uiuant. atque hæc tandem extrema fuit postremorum illorum hominum uitæ condicio. Alijs intestinis morbis, alijs hæresum pestibus agrotam & prope depositam Græciam ex certissimorum auctorum litteris animaduertimus; medicina ei tamen salutaris fuit sacrosancta illa septem conciliorum auctoritas, quam eius maiores sanctissimam semper putauerunt. sed cum primum contra Spiritum sanctum cum Latinis pugnare ceperrunt; quoniam hoc introducto certamine magnum aliquid spectabant; atque cum illis præsertim contentio erat, ad quorū quidem remp. euerendam cupido diu fuerant, & elato animo: ita hæc hæresis illorum animos occupauit, ut uix unquam fieri potuerit, uel potius nunquam factum sit, ut euelli omnino posset. Constantinopoli enim primum post Photij temeritatem, Adriano Pontifice, in media fere Græcia, frequentissimo Græcorum conuentu, paucis admodum presentibus Latinis hominibus; deinde Romæ lateranensi patrum concilio, quod Innocentius III. accersitis Græcis habendum curauerat, ut eorum moribus atque animis consulereetur; postea Decimo Gregorio Pontifice Lugduni, ad quam Galliæ urbem uenerat tum Paleologus ipse Græcorum Imperator, tum multi præterea Græci, quorum omnium, qui aderant, uocibus ter decantata illa uerba accepimus; A PATRE FILIOQUE PROCEdit; tum postremo Florentiæ Eugenij

genij 1111. temporibus res transacta est; quæ toties decertata, Græcis id contententibus, in eandem tamen rationem, iisdem maxime consentientibus, semper diiudicata est. Sed illi qui rerum nostrarum odio ualde per se commoti sunt semper; constans illud ac perpetuum tot conciliorum sanctissimum iudicium ita fastidiose contempserunt: ut si cæco illo mentis errore capti, ad sanitatem aliquando redierunt, atque ad fidei nostræ societatem adiuncti sunt: illa quidem societatis coniunctio; cum malus eorum esset animus, mala mens; insidiarum denique plena fuisse uideatur. Quæ res cum alias, ut dixi, animaduerti potest, tum quo tempore in bello sacro & Hierosolymitano Latini ipsi oppugnarunt non sine aliqua perfidia ac proditionis infamia; tum etiam, cum Constantinopolis a Turcis barbaris & crudelissimis hominibus capta est. eo enim tempore in illa præsentis fere periculi tēpestate nihil aliud uocibus & clamoribus egerunt, quam ut Florentini concilij sanctissimum de Spiritu sancto decretum induceretur, in quo tollendo cum obstinate operam ponerent; neque principis sui Constantini hortatu, neque impendenti summo & salutis, & fortunarum discrimine unquam commoueri potuerunt, ut militibus nostris Venetis & Genuensibus, illorum patriam acerrime defendentibus, frumentum suppeditarent, quod ipsi præ odio compresserant. Tanta igitur fuit odij uis, ut Mahumetanis impurissimis hominibus, christianoque nomini sempiternis hostibus turpiter seruire maluerint, quam commune nobiscum sanctæ societatis uinculum cum dignitate perpetuo seruare. Itaque cum tam pertinaciter nobis illi insensu fuerint; ut tot sæculis, totius concilij conciliande secum concordia causa habitis, in summa causa æquitate illud ab ijs impetrare non potuerimus, ut in fidei nostræ catholicæ societate permanerent: pertinacia sua tandem hoc effecerunt, ut & ipsi fortunas, libertatem, ac salutem amitterent; & Græcia florentissima illorum quondam patria, hodie, pro dolor, ciuium suorum culpa prope nulla sit. Id quod eodem pene scelere Africa item euenit, ubi iam est neque Christus, neque ecclesia, cum enim primum Diuo Augustino mortuo factum est Aurelij cuiusdam episcopi nefario consilio, ut in Romani Pontificis officio non maneret; tum in Alarici primum, deinde Gensfrici Vandalorum regum potestatem uenit; postea a Sarracenis hominibus nexata; templis inflammatis, excisaque Dei religione; ipsa denique omnino a Turcis lacerata tenetur. Si quæ uero reliquæ sint nationes, quæ Græcorum aut Afrorum hominum facta imitata ab Romana Ecclesia dissentiant, cui parere

parere uel Dei præcepto omnes maxime debent, qui se saluos esse uolunt; etsi hæ maximis interiectis spatijs illorum calamitates uident; eadem tamen cum illis contracta sceleris culpa, cum ex alieno periculo disant, aliquo casu posse euenire, ut in idem calamitatum discrimen ipse incurrant; illud sedulo agere debent, quod ab illis actum iri, Deo iuuante, non solum optare, sed sperare omnino possumus; si explosa impiorum hominum impia, pestiferaq; disciplina, maiorum suorum præceptis, atque institutis, quæ illi posteris suis, non ad interitum, sed ad salutem, & bene beateque uiuendum exemplo esse uoluerunt; ijs obtemperabunt ita, ut maxime decet, sancte ac religiose. Sed ut ad id iam redeam Amplissime Cardinalis, quo omnis huiusce susceptæ orationis propositum pertinet: deturpatam hæresim sordibus Græciam, de Spiritu sancto nobiscum pugnantem, rerumque nostrarum inuidia, aut odio inflammatam, Ecclesiæ Romanæ minus obedientem; atque iccirco, ut D. Brigida præfensionibus sæpe illi significatum fuerat, Turcis immanibus hominibus sæde seruientem nos cernimus; quam in fidei officio antea manentem, omnique omnium rerum genere florantissimam uidit atque admirata est antiquitas, etenim si ultima pene illa nascentis ecclesiæ tempora satis consideramus, ita bene inslitutam illam prouinciam plane animaduertemus, ut, etsi Græci posteriores rebus aut pie aut præclare gestis obscuri plane sunt; solaque aliqua repentina rebellione insaniaq; nobiles; in Græcorum tamen ueterum genere cum ceterarum uirtutum splendorem, tum prisæ sanctæque religionis decus spectare facile possumus. est profecto, cur omnium iudicio ueteri Græciæ tantum tribuamus, quantum sane debemus; debemus autem uel plurimum. Et quauquam in prouincia illa iam deprauata fuere, ut dixi, furiosi nebulones, ac nescio qui Nili Thessaloniceses, & Barlahami quidam monachi ipsa nominis specie religiosi, re autem solida germanæque religioni ualde repugnantes, qui rebus nostris nocere studuerunt; in eadem etiam male instituta non desuere tamen, ut in omni multitudine sit, uiri boni, & ueritatis amatores, Cydonij, Calecij, Gennadij, Bessariones, & ceteri uetere Græcia digni, qui fidei nostræ patrociniū contra suos pio fortique animo susceperunt. Itaque si ijs corrupta iam Græciæ temporibus in tantis & opinionis & morum erroribus, summaq; rerum perturbatione, antiquæ religionis assidui extitere uindices, acerrimiq; fidei Romanæ defensores Græci complures; illud manifesto compertum est, quo tempore illa in officio pietatis catholicæq; fidei permansit, numerosam in ea fuisse

quasiq; pretoriam optimorum uirorum, ac religiosorum etuditoruq;
hominum cohortem. hoc indicant res in Græcia fidei nomine pie for-
titerque gesta. nemoque ita parum prudens est, atque adeo in rep.
christiana rudis, qui omnino non intelligat, quanto fidei pietatisque
christiana studio, turbulentissimis ecclesie temporibus, ueteris Græcie
patres eas res gesserint, quarum exemplo postea tum placati sunt ijs,
quorum animus aliqua offensione ducebatur; tum illi plane incitati, qui
aut natura, aut temporum uitio fuerant ad pie religioseque agendum
tardiores. Quamobrem illi, atque adeo hi maiorum suorum uel exem-
plis, uel sanctissimis institutis adducti, repente mutata uoluntate, ni-
hil postea potius atque antiquius habuere, quam ut in præclaris rectæ
fidei religionisque factis sibi statuerent bene & uiuendi et agendi præ-
sidium. Nihil est, cur iam commemorem, quæ a trecentis illis Græcie
patribus Niceæ contra Arium; quæ ab alijs Constantinopoli contra
Macedonium; quæ Ephesi a multis contra Nestorium; quæ a pluri-
mis Chalcedone contra Eutychem summa cum ueræ religionis laude
gesta sunt. Harum quidem rerum pie sancteq; gestarum monumenta
omnium fere linguarum uocibus expressa ita animaduertimus, ut cum
omnes omnium generum uirtutes, tum summum in illis fidei lumen
fuisse aperte uideamus. Quis autem non cum quadam animi delecta-
tione mente non repetit euangelicas illorum actiones? quotusquisque
est a uerum nostrarum sensu ita auersus, quin uideat ueterum Græco-
rum studium, atque omne pietatis officium erga Ecclesiam Romanam?
quoties sedibus illi suis expulsi, quales fuere Athanasius, Paulus Con-
stantinopolitanus, Chrysostomus, ac ceteri, hi que uel maximis locorum
interuallis disiunctissimi ad hanc summam defensionis arcem confuge-
runt? quoties in rebus dubijs, quæ magnæ erant, magnæq; delibera-
tionis Romanos Pontifices, summos totius christianæ religionis principes
consuluerunt; ut uno eodemque uitæ ac disciplina christiana modo na-
biscent illi censerentur? prætereo reliqua; uno uerbo dicam: bene meri-
ta est de nobis uetus Græcia, & si quæ unquam ulla postea illius reli-
qua pars fuit, quæ tales uiros tulerit, quales certe in illa antiqua bene
instituta Græcia fuisse cognouimus; sanctissimos scilicet homines, opti-
meque de Ecclesia Dei meritos, Athanasios, Basilios, Cyrillos, ac deni-
que reliquos innumerabiles illius gentis patres, quos fidei caritatisq;
meritis excellentes Deus in cælum uocauit. In ijs quidem patribus
est, cur multum etiam a nobis tribuatur Nyseno Gregorio; qui etsi
non illis Græcis theologie christiane principibus; multis tamen sum-
mis

nis antiquæ Græciæ uiris & doctrina & sanctitate præluxit. Huius
 præstantissimi uiri librum, qui de uirginitate inscribitur, superiore
 anno conuerti, ex quo plane sensi illum fuisse hominem doctum, ac ui-
 rum sane bonum: & ne uidear laudare hominem a nostra religione
 alienum, talem Nysenum ego interpretando cognoui, ut apud anti-
 quos illos Græciæ homines summam christiani hominis laudem conse-
 cutus uideatur. in qua sententia me postea ualde confirmarunt eius-
 dem hæ, quas itidem latine reddidi, tum de oratione Domini, tum de
 beata uita comparanda conciones: in quibus cum omnia omnium uirtu-
 tum non adumbrata dico, sed expressa signa appareant; tum elucet ma-
 xime officium perfecti & christiani hominis. Quæ uero ad uiri politi-
 ci, liberaliterque educati uitam, mores, et officia pertinent, etsi horum
 omnium præcepta nobilissimos philosophos, longeque principes tradi-
 disse legimus, ita de iisdem tamen Nysenus disputat, ut hoc genere illis
 posterior esse nullo pacto possit. Sed quoniam perfectius aliquid reli-
 gionis nostræ lex postulat, quam quæ ab illis tradita & præcepta
 sunt: summam illam perfectioris uitæ rationem magnificis, atque adeo
 rei ipsius grauitate dignis sententijs ueritatis quasi diplomate compro-
 batis ita hic noster explicat, ut incredibilem illam perfecti expectatio-
 nem cum uel apud externos populos concitare queat, tum nobis, qui in
 hac christianâ repub. nati atque educati sumus, animos addat, incita-
 tioresque aliquanto ad recte agendum faciat. nam explosa tacite illa
 ueterum omnium philosophorum de summo bono sententia, nihil om-
 nino præstabilius esse ostendit uita christiana; quæ plena & conferta bo-
 nis moribus, euangelicisque actionibus sulta, ac spe futuræ salutis
 munita, uere beata uita nominanda est. atque in hac quidem re expo-
 nenda sic ille uersatur, ut quod ad illius uitæ degendæ rationem usumq;
 homini christiano sit adiumento, nihil pæne in oculis omnium poni possit
 aut illustrius, aut clariius. Graues autem locos neque hic præterit. Va-
 ria fuit, atque multiplex de libero arbitrio semper contentio, non mo-
 do christianorum memoria, sed philosophorum etiam ætate. Conque-
 ritur enim Oenomaus Cynicus Democritum animos fecisse seruos; Chry-
 sippum uero semiseros. Cicero autem, ut placet D. Augustino, dum
 facere eos conatur liberos, repudiata Dei providentia, illos uere facit
 sacrilegos. Christianorum uero tempore Bardesanes quidam Edisse-
 nus in hoc errore Stoicis assentitur. Secuti sunt Manichæi, Priscillia-
 ni, & Pelagiani, qui uarie atque impie hac ipsa in re opinati sunt.
 Hic noster etsi copiose omnium Philosophorum in hac hæresi uersantium

refutauit sententias in libro, qui inscribitur de homine; in his tamen concionibus saepe hæreticorum impios huius generis errores plane eripit: Contra uero Græcos de spiritu sancto saepe, ut dixi, nobiscum pugnantes unus hic Græcus uel satis esse potuit ad infringendam eorum improbam audaciam, cum huius sanctissimæ rei nobiscum suscipiat patrocinium. Quoniam igitur ex ijs, quæ commemorauimus, Nysenum cognoscimus non unum esse ex ijs Græcis, quos rebus nostris inimicos ostendi, sed ex illis plane prisce Græciæ patribus, quorum memoria tantum debemus, quantum nos quidem debere indicant eorum præclara tum sacrarum litterarum, tum religiosarum actionum monumenta: æquissimum certe fuit, ac maxime pium, ut huic sanctissimo uiro optime de ecclesia merito hæc gratia referretur; ut quæcunque illius scripta, partim uitio temporum, partim hostium iniuria in tenebris adhuc latuerunt; ea in lucem reuocata sempiternæ traderentur posterorum memoriæ. Cui quidem rei cum iam optime consultum sit summa liberalitate Pontificis Maximi Pij III. auunculi tui, qui uiris de ecclesia bene meritis debitam gratiam & habere & referre studet: nolo equidem plura. tantum illud dicam, ad ceteras summas laudes hanc illi maximam accedere ex horum ueterum patrum libris, quos diu occultatos, in apertum proferendos liberaliter & impense curat. Cum enim in eo ipse uehementer elaboret, ut hæresum peste depulsa, ueteris disciplinæ non modo species aliqua, aut color, sed uires eius ac nerui christianæ reip. restituantur; cumque multa ad hanc ipsam rem perficiendam adiumenta inuenerit; hoc etiam addito auxilio, quod in ueterum patrum scriptis diuulgandis est non minimum; præsertim cum in illis uetus illa bene christianæque uiuendi ratio contineatur: eam profecto illius restituta laudem assequetur, quæ propria est, ac perpetua optimorum Pontificum. hoc namque pacto sublati hæresum sordibus, ereptisque morum erroribus, sanctissimaque introducta uitæ consuetudine, res ad eam speciem traducetur; ut cum gaudium sempiternum, atque omnibus numeris absoluta tranquillitas præclaris his suis consilijs actionibusque cunctis pariatur ecclesiæ; tum sibi gloria tribuatur, quæ in omnes partes litterarum uocibus diffusa a silentio hominum plane perpetuo uindicetur. Cum uero, optime Borromæe, præter cetera, quæ multa, & egregia illa quidem habes tum scientiarum, tum uirtutum ornamenta; ad ueterem illam etiam, quæ in antiquorum patrum, ut dixi, monumentis elucet, bene Christianæque uiuendi disciplinam te ita institueris, ut quæ duæ uirtutes in homine Christiano ad lau-

dem

dem maxime insignes sunt & habentur, iustitiæ atque caritatis laudibus ualde præstes: ego optimum factum putavi, ut has Nysseni Gregorij summi & religiosi uiri conciones in nomine tuo diuulgarem. Cum præsertim quibus uirtutibus ipse excellas, earum ipsarum in his non modo adumbratio aliqua sit, sed uera solidaque expressio. Quæ res etsi me ualde primum commouit, uel potius commouit, tamen ratio ipsa utique postulabat, ut facerem. Cum enim sim, & uiuam apud Episcopum Vrbini; qui ut est omnis egregia uirtutis aestimator acerrimus; ita uirtutum tuarum solida ueræque laudi tam ualde fauet, quam qui maxime: putabam propterea me parum prudenter, uel ingratus potius facturum, si contra deliberassem, atque ego feci: præsertim cum constanti quadam illius optimi uiri patroni mei de uirtutibus tuis prædicatione factum sit; ut studio quodam incredibili inflammatus sim colende amplitudinis tuæ. Itaque cum ita se res habeat; illud a te peto & queso, ut, quæ tua est humanitas, libenti animo accipias has Nysseni conciones, quæ a me conuersæ, & in publicum propositæ nomini tuo commendantur. Optarem equidem ac uellem ita a me latine eas redditas esse, ut illius sanctissimi hominis, quem summe laudaui, laudibus hac mea interpretatione, si minus additum est, non detractum saltem esse uideretur. id autem me affectum arbitrabor, si tua auctoritate illarum patrocinium suscipies. ad quam rem etsi egregia ista tua natura te ualde hortatur; non parum tamen ad eam ipsam ualere debet animi mei propensio, quæ incredibilis est, & prope singularis erga Amplitudinem tuam. Vale Optime Cardinalis.

Petrus



O N, sine causa a Romanis Pontificibus, sanctissimis uiris, Gelasio in primis & Nicolao factum esse legimus; ut, decretis promulgatis libros ipsi præscriberent, quos aut aspernarentur, aut sequerentur ij, qui christiane ueritatis studiosi & haberi, & esse uellent. nam cum illud obnixè fecerint aduersarij, ut libris apocryphis imperitam deciperent multitudinem; illorum improbitati hac ratione occursum est. qua quidem olim etiam usus Serapio VII. Antiochie episcopus illorum audaciam retudit, qui in Rossensi paræcia, quæ Antiochie est, euangelium falso Apostoli Petri nomine inscriptum, ad tuendos errores suos malitiose diuulgarunt. Quare cum non omnibus notus sit Gregorius Nysenus, neue eius scripta propterea in eo apocryphorum numero haberentur; his concionibus, quas conuerti, illius uitam adscribere non alienum duxi; ut cum cognitum ex ea fuerit, ac perspectum, quam ualde huic sanctissimo uiro ac eruditissimo ad auctoritatem suffragata sit sanctorum patrum tum Latinorum, tum Græcorum antiquitas; maior scriptis suis præbeatur assensus. Quæ uero de eius uita literis tradidi, ea ab Hieronymo, Rufino, Metaphrasæ, Suida, Zonara, ac Nicephoro locupletissimis auctoribus accepi. Vale.

VITA GREGORII NYSENI.



MULTOS Gregorios nobis Græcia peperit: in quibus, ut est apud Nicephorum, tres maximi numerantur: unus Nanziazenus, qui singulari quadam diuinarum rerum cognitione præditus, summo patrum consensu Theologus dictus est; alter Neocæsariæ, quæ urbs in Ponto est, episcopus; quem rerum admirabilium, quas diuino plane auxilio adiutus ipse egit, laude præstantem uetus Græcia admirata est, Thaumaturgumque propterea nominauit; tertius est Nysenus Gregorius, de quo omnis est oratio. Hic Basilio patre optimo uiro natus, & fratre Basilio, qui in ueteribus illis Christianæ theologiæ, Græcis aucto-

auctōribus princeps habetur; uere dignus, Nysē in Capadocia prouincia factus episcopus; inde cognomen accepit. quo in munere ita se & doctrina, & uitæ sanctitate probauit omnibus; ut Nysenæ ecclesiæ lumen sit habitus atque ornamento. hoc enim illi testimonium dat Nicephorus, quem modo nominaui. Certe si Gregorius cum Basilio fratre comparatur; ea re hic noster inferior est, quod ante episcopatum uxorem habuit; ut de se ipse testatur in eo libro, quem de uirginitate scriptum reliquit: ille uero superior, quod expers omnino matrimonii, uirginalis uitæ genus delegit. ab hac igitur laude felicior Basilius ceteris in rebus clarissimorum uirorū, Rufini in primis iudicio, fratri non antepōnitur. fuit enim in Nyseno eloquētia, omnis philosophiæ cognitio, rerumq; diuinarum & humanarum scientia, atque uitæ degendæ sanctissima ratio. nam eloquentiæ primum laudem cum maximam illi tribuat Suidas, tum per multis orationibus, quas habuit, talem se dicendo ostendit, ut huiusce rei gloria cum antiquis oratoribus contendisse uideatur. Mortuus est Constantinopoli Meletius, quo tempore contra Spiritus sancti oppugnatorem Macedoniū habebatur concilium. e frequentissimo illo patrum conuentu deligitur Nysenus, qui laudationem habeat de optimo uiro. fuit enim Meletius tum Antiochiæ episcopus, cum in ea urbe res ecclesiastica in treis partes erat diuisa. ab una parte stabant Ariani, quorum episcopus erat Euzoius; ab altera Eustathiani, habebantque episcopum Paulinum; tertia pars Meletium episcopum sequebatur, quem putabat religionis suæ acerrimum defensorem. sed aliter res euenit, atque illi opinati sunt, qui eum episcopum esse iusserunt, nam in concionem uenit Meletius; præterq; omnium opinionem, qui illum fecerant episcopum; ueritatem populo ostendit; ac declarat filium patri esse omnino æqualem. accurrit diaconus; manibus os episcopi compressit. at ille tribus digitis distincte erectis, iisdemq; statim contractis, unoque solo rursus sublato, aperuit hoc pacto animi sui sententiam, quam aperte proloqui erat prohibitus. ita enim pie de Trinitate sensit, ut cum uerbis, quod sentiret, expri-

exprimere non posset, ore impedito, digitorum significationibus id frequenti populo ostenderet. Huius igitur rei nomine multa Meletius perpeſſus, Constantinopoli denique moritur: illiusque bene de fide ſentientis laudes mirifica oratione perſequitur Nyſenus. qui talem uirum laudando, ſe & eloquentiſſimum, & maximum ſincerae fidei deſenſorem oſtendit. Extant præterea aliae huius laudationes, de Baſilio fratre, de Placilla, Pulcheriaq; Theodoſii Iunioris filiabus; orationes item complures, de Chriſti die Natali, de Stephano protomartyre, de Theodoro martyre, & aliae, quas omnes extremo huic ſermoni adſcribam. frequens enim hic maxime fuit in omni dicen-
di genere, ut ſatis etiam illae indicant, quas multas habuit conciones. Philoſophiae uero cognitionem tenuit maximam, ſiquidem in peripateticis diu multumque uerſatus, ſæpe periculum fecit, quantum contra ipſum Peripateticorum principem Ariſtotelem potuerit. in Academia item ſpatiis exercitatus, Platonis ſectatus eſt ueſtigia, tanquam ea eſſent ad ueram noſtrarum rerum rationem accommodatiora. Itaque patefactis illius philoſophi numeris, quibus nihil eſt obſcurius, octo de philoſophia libros edidit. Iam uero quanta rerum diuinarum humanarumque ſcientia in eo fuerit; id manifeſto compertum eſt tum ex concionibus, quas in Eccleſiaſtem, & Canticum cantico-
rum ſcripſit; tum ex libro, qui eſt de uita perfecta, tum ex eo qui ſorori Maerinae inſcribitur de ratione animae. Nicephorus putat in hunc ipſum de animalibus coniectos eſſe ab hæreticis aliquot Origenis errores. contra tamen ex eo apparet, quoniam Pariſienſis Academiae auctoritate olim comprobatus in lucem uenit; alioquin illius Academiae uiri, ut ueritatis perſcrutatores diligentiffimi, ſi quid in eo eiufmodi fuiſſet, nunquam id commiſſent, ut in uulguſ, præſertim auctoritate ſua, eſſet prolatus. Sanctiſſima autem huius uiri uita ratio ex multis eius ſcriptis animaduertitur, quæ eius generis ſunt, ut eorum multis præceptis in omnes partes Chriſtianæ uitæ uſus cõformari poſſet. Siquidẽ fuit Nyſenus in oratione aſſiduus, in rebus aduerſis, atque aduerſariorum iniuriis perferendis
tum

tum sua sponte patiētissimus, tum adhortationibus Nan-
ziazeni, qui aliquot eo de genere ad illum epistolas exara-
uit. nostræ uero religionis extitit maximus defensor; heræ-
ticorum autem hostis acerrimus. hoc nos docēt libri con-
tra Eunomiū, quos Hieronymo, & Nanziazeno ipse legit.
ita denique in omni uita uiuit, ut in sanctorum numerum
sit adscriptus. cuius etiam laudi illud à Nicephoro tribu-
tum est, quod reliqui fratres eius, & soror Macrina in eun-
dem numerum sint relati. Suidas tres commemorat huius
præter Basiliū, fratres sororemque Macrinam; Petrum
unum, quem scribit fuisse episcopum; non meminit ta-
men cuius urbis: reliquos duos monachos attestatur. Ni-
cephorus autem Petrum Sebastie episcopum; & tertium,
quarto prætermisso, fratrem eius Naucratiū nominat,
qui adulta ætate monachus obiit. His igitur omnibus fra-
tribus uiuit superstes Nyfenus: grataq; ac pia memoria
omnes persecutus est. Basiliū mortui opus, quod Hexaeme-
ron dicunt, inchoatum perfecit: reliquorū autem fratrum
Machrinæue sororis funeri iusta pie soluit. amicis item
mortuū se gratum præstitit: nam Nanziazeni, quo fami-
liariter usus est, mortui laudes cōscripsit: neque Græcis so-
lum contentus, ad Latinorum amicitiam, Hieronymiq; in-
primis, cui ipse tribuit plurimum, se contulit. Certe dum
uiuit Nyfenus, magna eius fuit auctoritas. Constantinopo-
li, qua in urbe, ut dixi, multorum patrum contra Macedo-
nium maximus fuit cōuentus. in quibus patribus maximi
duo fuere, Nanziazenus & Amphilocheus, Iconii episco-
pus: in his tamen omnibus, ut scribit Zonaras, principem
locum tenuit Nyfenus; cuius etiam mortui uiuit auctori-
tas. Nam Ephesino, & Niceno posteriore, ceterisque mul-
tis conciliis maxima huius patris habita ratio est. quanti
uero eundem fecerint Græci uiri Ioannes Damascenus
atque Elias Cretensis; id intelligitur ex eo, quod unus &
item alter ex huius scriptis tantum hausit, quantum utriusq;
arbitrio iudicioq; uisum est. in Latinis autem Diuus Tho-
mas Aquinas, & Albertus magnus tantum huic nostro tri-
buerunt, ut maximis difficillimisq; quæstionibus explican-
dis in consiliū eum maxime adhibeant. Hic summus
uir

uir uixit imperantibus Valentiniano & Valente; Gratiano item & Theodosiis, Maiore & Minore. obiit anno salutis circiter 383. tertio Idus Martii. quem diem festum ei celebrant Græci. Et quoniam quæcunque is scripsit, ea omnia ostendi supra me uelle extremo huic sermoni apponere; omnium illius librorum hæc, quæ uno aspectu aspi- ciatur, quasi tabella sit.

Liber de uirginitate.

Conciones v. de oratione Domini.

Conciones viii. de beata uita com- paranda.

Conciones viii. in Ecclesiastem.

Cóciones xv. in Canticū canticorū Theoria in Psalmos.

Libri viii. de philosophia.

Epistola de professione Christiana.

Liber de homine.

Liber de anima ad Macrinam soro- rem ualde obscurus, Federico 11.

Imperatore a Pisano quodam cau- sidico conuersus.

Liber de sancta Trinitate aduer- sus Iudeos.

De historia sex dierum, quibus mundus creatus est.

De sancta Christi natiuitate orat. 1

De sancto & salutari die Paschæ festo orationes. 2

De dormientibus oratio. 1

De laudibus xli. martyrum orat. 2

De assumptione Domini orat. 2

De sancto baptismo liber. 1

De resurrectione Domini orat. 3

De fide liber ad Simplicium scriptus

contra Arianos, et Eunomianos.

Liber de cognitione Dei contra He- braeos, quem uulgo adscribunt Chrysostomo.

Oratio Catechetica; in qua multa de transmutatione Dominici cor- poris & sanguinis.

Oratio in funere Basilii fratris.

Oratio in funere Placille.

Oratio in funere pulcheria.

Oratio in funere Meletii.

De uita Gregorii Thaumaturgi.

De Stephano protomartyre.

De Theodoro martyre.

De Gregorio Nanziazeno.

Oratio cōtra Albaniū de patris et filij, & spiritus sancti diuinitate.

Oratio ad Euagriū monachum de diuinitate.

Oratio ad Eustasium contra spi- ritus sancti oppugnatores.

Oratio ad Theophilum Alexan- driæ episcopum scripta contra Apollinarium.

Libri contra Eunomium, quos & Hieronymo, & Nanziazeno legit.

Ex his Nyseni libris loci multi ab Euthymio monacho desumpti sunt contra hæreticos.

1

GREGORII NYSENI DE
ORATIONE DOMINI
CONCIO PRIMA.



DIVINO hoc sermone precandi nobis in eo traditur ratio, quod dignis hoc ipso sermone discipulis, cum & audire & discere aliquid ipsi maxime cuperent, Dominus illis præscribit, quo modo precationis ope captare conveniat attentionem Dei. Ego vero iis rebus, quæ hoc ipso de genere litteris consignatæ sunt, pauca sane quædam addere non dubitavi: quoniam frequentissimus hic populus, qui adest, non solum instituentus est, quo modo, sed etiam quid a Deo precari omnino debeat; id quod fortasse plerisque est inauditum & novum; cum in hoc vitæ curriculo neglectum a compluribus sit, & prætermissum sacrum hoc divinumque precum atque obsecrationis officium. Quare præclare quidem agi arbitror; primum ut quoad fieri potest, verbis demonstrarem; necesse utique esse, ut precationi, ita enim Paulus inquit, instemus; deinde ut Dei nos dicto audientes simus; quo nobis præcipitur, quem precandi modum formamque ad Deum adhibere debeamus. Nam vel omnia potius in hoc vitæ spatio, quam precationis studium expeti uideo: cumque ad aliud aliud animum mentemque intenderit, hæc orationis uirtus in nullo est hominum studio. Ad nudinas multo mane surgit tabernarius, qui in eminenti uulgo res ante suas proferre contendit, quam ceteri, qui eandem artem profitentur; ut cum alios ipse anteverterit, non solum quæ sibi ex usu esse intelligat, ea præoccu-

A pet;

pet; uerum etiam sua quamoptime diuendat. Eodem item modo qui aliquid mercatur, ne culpam in eo aliquam admittat, quod ad usum suum pertineat, diligenter cum ipse obseruet, ne alius eum quis praueniatur, non ad precationis locum, sed in forum descendere properat. Cumque uniuerſi homines ad quæstum cupiditate trahantur, in eoq; elaborent, ut uicinum præcurrant; prælibidine rerum, quas ipsi concupiscunt, tempus a precationibus ereptum ad nundinationem traducunt. Non aliter sane faciunt opifices, non aliter qui in causis uersantur, non aliter reus, non aliter qui iudicio præest. omnes hi cum in eas res, quas illorum quisque in manibus habet, omni studio incumbant; cumque ad ea, quæ sibi proposita habent, ex rerum diuinarum cura cogitationeque damnum importari arbitrentur: actionis quidem eius, quæ ad preces diuinas pertinet, illos plane cepit obliuio. Etenim qui artem aliquam exercet, is inutile ad rem sibi propositam, atque inane prorsus putat esse auxilium Dei; propterea supplici uerborum oratione prætermiſſa, spem omnem in manibus collocat, illum plane oblitus, qui dedit ei manus. Similiter etiam is, qui studio se operam dat, ut sibi perfectam dicendi laudem compararet; nullam plane illius rationem habet, a quo loquendi uis est ei attributa; sed cum tamquam ad ipsam naturæ uim sese conformet; hic se ipsum intuetur, in artiumque liberalium studiis totus inhæret; & quoniam ex ope diuina atque auxilio nihil sibi commodi euenire existimat, antiquius iste ac potius habet disciplinarum, quam precationis, studium. Pari item ratione in reliquis huius uitæ institutis propter curam quandam earum rerum, quæ terrenæ sunt, & corporis

poris consentaneæ sensibus; rerum magnarum diuinarumque studium ab animo menteque abiicitur . idcirco maxima est , lateque patet in uita hæc peccandi uis, quæ humanis negotiis curisq; implicata, quotidie magis atque magis augetur; quo fit, ut & Dei cunctos capiat obliuio; & deprecationis uirtus non ea simul attingat, quæ mortalium cura expetuntur . Auaritia , quæ idolorum cultus est, in mercaturas inuadit : ita agricola non rebus ad uitæ usum necessariis metitur agri labores ; sed si cupiditate eo prouehitur , ut plus habeat, magnum sibi aditum ad peccandum facit ; quoniam suis non contentus, in alienos fines late progreditur. unde qui mutuo uicinoque finium circuitu tenentur, si eodem hi auaritiæ morbo affecti sunt , de prædii finibus contentiones eiusmodi oriuntur , quarum difficilis est sane curatio . itaque iræ, ad maleque agendum animi impetus, mutuique insidiarum conatus, sanguine sæpe aut cæde quiescunt . Eodem modo forensium causarum studia multiplicem delinquendi materiam præbent, sexcentaque inueniunt iniquitatis patrocina: ad quæstum enim æquitatis lancem aut sponte deprimit iudex, aut inuitus inique statuit; nimirum cum is artificiosa quadam illorum diligentia, qui ueritatem obscurare student, sit in fraudem compellus . At quid, si quis singulas res cōmemoret , quarum rerum modis iisque multis & uariis peccati labes cum hac uita commiscetur? nulla sane huius rei causa origoq; existet, nisi quoniam quæ manuum opera fieri expetunt homines, ad ea minime implorant auxilium Dei . Si studium antecesserint preces , neque aditum , neque uiam ad animum reperit peccandi uis . Cum enim in corde animoque infixæ hæreat recordatio Dei , tum nullam sane

ad agendum uim habent aduersarii cogitationes. Eorum autem, qui controuersiam aliquam habent, cum ubique gentium iustitia conciliatrix sit, precādi etiam ratio, quæ exiguo labore sit copiosa fertilisque fructuum, agricolam a peccato ita prohibet, ut non amplius uim sentiat illius peccati, quod plus habendi cupiditate admittitur. Sic qui iter facit, sic qui in militiam proficiscitur, sic qui matrimonio iungi cogitat, sic omnis denique homo, qui ad aliquid appetitione trahitur; si precibus adhibitis res singulas quisque agit, cum ad malum contraria res nulla eius impellat animum; hunc optime scio a peccandi proposito sese ad id reuocaturum, quod maxime in optatis habeat. Sin autem quis a Deo alienus, totus in studio aliquo est; quoniam a Deo hic sese auertit, in cōtrario utique uersetur necesse est. Disiungitur autem is a Deo, qui precum ope se Deo minime coniungit. Quare primum hoc nos sermone ad illud erudiri oportet, ut perpetua ad Deum precatione utamur, neque in ea umquam cessemus; quandoquidem ex deprecandi studio illud sane euenit, ut cum Deo una simus: qui autem cum Deo est, seiunctus idem est a diabolo. Precum atque obsecrationis uis temperantiam tuetur, iram comprimit, ad modestiam reuocat superbiam, iniuriarū delet memoriam, inuidiam restinguit, tollit iniquitatem, & impietatem emendat. Precationis uis est corporis robur, recta iucundaque domus moderatio, præclara ciuitatis institutio, regni potentia, belli triumphus, pacis præsidium, coniunctio dissidentium, atque eorum, qui inter se iuncti sunt, omnino perseverantia. Precum oratio uirginitatis est signum, fides matrimonii, uiatorum defensio, dormientium custos, uigilantium confidentia

dentia, agricolarum fertilitas, atque nautarum denique salus. Precationis studium reos defendit, laxat uinculis adstrictos, requiem defatigatis præbet, consolatur mæstos, gaudentium animos deprimit, exhortationem lugentibus adhibet, matrimonio iunctis coronam imponit, nascentium diem natalem colit, & mortuorum funeri iusta soluit. Precandi ratio est cum Deo colloquium, rerum sub aspectum non cadentium contemplatio, certa atque explorata eorum, quæ expectantur, fides, cum angelis dignitas, ad res honestas adhortatio, a turpibus auersio, delinquentium emendatio, rerum cum præsentium uoluptas, tum futurarum firma ac stabilis fiducia. Precum oratio cetum Ionæ domicilium effecit; Ezechiam a mortis faucibus ad uitam reuocauit; a tribus pueris in uentum roris plenam flammam auertit; populo Israelitico de Ismaelitæ triumphum attulit; Assyriorum centum octoginta quinque millia una nocte cæcis hastis, ab aspectuque remotis, interfecit. atque innumerabilia præterea rerum gestarum exempla inuenire licet, ex quibus plane intelligi ac perspicere potest, eorū, quæ in hac uita præclare geruntur, nihil esse oratione precibusque uel præstantius uel sublimius. Sed tempus iam est, ut deprecationi studium demus, uel potius paululum etiam adiungamus. nam cum multæ res & uariæ illæ quidem ac diuersæ diuino munere concessuue sint nobis attributæ; ad gratiam de iis, quæ nos accepimus, referendam hoc unum solum habemus, ut & precum officiis, & gratiarum actionibus eum remuneremus, qui de nobis est cumulatissime meritis. Quare etsi uitam nos omnem & precando, & gratias agendo, in Dei colloquio consuetudineque traduximus; tamen a gradu remunerationis

nis nos tantum abesse censeo, quantum si ne ab initio quidem in animum induxerimus gratiam ullam ei referre, a quo beneficia accepimus. Temporis dimensio tribus his diffinitur spatiis, præterito, instanti, & futuro, his rebus Dei in nos continetur beneficentia. si instantis spatium temporis ratione lustraueris, in eo uitam degis: si futurum, illud tempus tibi in spe est rerum, quæ expectantur: si præteritum, haud sane esses, nisi ab eo ante hoc tu beneficium accepisses, ut in hanc lucem prodires, cum hoc, quod natus sis, ab eo ipse habueris: cumque de te bene merenti natus sis, in eo uiuis & moueris, inquit apostolus, rerumq; futurarum expectationes ab ipsa hac proficiuntur beneficentia. Tu uero instantis dumtaxat temporis dominus es. itaque et si ne punctum quidem temporis gratias agere intermittis; uix tamen præsentis temporis meritorum gratiam assequeris; cum neque consequentis temporis, nec præteriti ad compensanda ea, quæ debes, possis ullam inuenire rationem. At nos ut meritam debitamque gratiam referamus, tam longe profecto absumus, ut ne id quidem, quod in potestate nostra est, beneficium agnoscamus. Neque ego illud dixerim, ut totum diem, sed ne minimam quidem dici partem Dei contemplationi tribuamus. Quis terram mihi subiecit? quis ratione inuenit, ut natura hæc humida nauigatione transmitteretur? quis cælum fornix instar fabricatus est? quis solis radios mihi quasi faces profert? quis in conualles fontes deducit? quis fluuiorum cursus direxit? quis animalium, quæ ratione carent, usum mihi suppeditauit? quis me, cum pulvis essem inanis, & uitæ & mentis participem effecit? quis lutum hoc ad diuinæ formæ effinxit similitudinem? quis eam,
quæ

quæ peccati sordibus in me obsoleuit, Dei imaginem in pristinam redegit gratiam? quis e paradisi me domicilio eiecit, extraque uitalis arboris cibum longe posuit, atque uitæ huius caducæ profundo me quasi obrutum ad ueterem beatæ uitæ rationem ducit? Non est, quemadmodum diuinis est litteris proditum, qui hæc intelligat. Etenim si hæc ipsa nos cōtemplaremur, sempiterna quidem gratiarum actione, perpetuaque memoria, in toto uitæ cursu illa prosequeremur. Iam uero in iis dumtaxat rebus, quæ caducæ ac fluxæ sunt, uniuersi fere generis humani euigilant curæ, in his studiū, in his cupiditas, in his cogitatio, spesq; denique ipsorum omnis uertitur, atque in eo, ut plus habeant, studio uigil est atque attenta hominum natura; idque omnibus in rebus, in quibus contingere potest, ut plus ipsi assequantur; siue hoc ad honorem & gloriam, siue ad diuitiarum copias, siue ad aliquē appetitionis modum pertineat, semper in his omnibus ad plus appetendum procliue est hominum ingenium. De ueris autem Dei bonis, neque de iis, quæ apparent, neque de illis, quæ promissa sunt, ne uerbum quidem ullum. Sed tempus iam instat, ut huiusce precandi rationis uim sententiamq; quantum in nobis est percipiamus atque intelligamus. nam illud exploratissimū est, ut id assequamur, quod maxime uolumus, in eo plane consistere, ut cognoscamus qualis esse debeat petitionis nostræ ratio. Ergo quæ documenti huius uis est ita iubentis? Orantes nolite multū loqui, sicut Ethnici faciūt. putant enim quod in multiloquio suo exaudiantur. Fortasse igitur huius præcepti sententia cum aperte sit nobis dilucideq; explicata, per se satis perspicua est, nulla; eget sublimiori mentis indagatione, nisi illud forte in

te inuestigare consentaneū est ; quæ sub hac uoce multiloquii subiicienda sit sententia, ut eius uim cum nos perceperimus, longe ab eo digrediamur, quod nobis uetitum est. Ego sane opinor hoc documento redigi ad molestiam, comprimique animi eorum molitiam, qui in appetitionum inanium curis cogitationibusque uersantur : atque eam ob causam nouum hoc & alienum nomen adhibuisse mihi uidetur Dominus, ut dementiam illorum reprehenderet, qui uim mentis in res dissipant inanes, minimeque utiles : quandoquidem, quæ oratio prudens sciensque ad utilia spectat, ea proprie nominatur oratio; quæ uero præ uoluptate quadam, quæ consistendi uim non habet, in cupiditatibus, quæ nullæ sunt, effunditur; hæc nō oratio, sed multiloquium est : ut si explicatius quis hoc interpretaretur, nugas, delirationem, ineptias diceret, & si quæ aliæ id generis sunt nominum significationes. Quid igitur consilii hic nobis dat sermo ? ut ne precum scilicet tempore id nobis eueniat, quod in furiosorum hominum mente accidere solet. Vt enim illi, qui mente minus perfecta sunt, quæ ex sententia sibi eueniunt, ea quemadmodum succedant, non sane intelligunt, sed libere pro arbitratu suo prosperos quosdam rerum successus sibi confingunt, cumq; thesauros & nuptias & regna & magnas, quæ suo nomine appellantur, urbes in cogitatione reponant; in eo quidem mente se uersari opinantur, cuius speciem illis inanis quædam ratiocinandi uis impresserit : sed non nulli omnino sunt, qui cum naturæ humanæ excedant modum, aliquid hac ipsa opinionum uanitate iuuenilius multo sibi arrogant, aut uolucres cogitatione fiunt, aut tamquam stellæ rufulgent, aut manu montes ferunt, aut ad calum

cælum uiam sibi muniunt, aut ex iuuenibus iam adole-
scētes facti ad mille sunt annos diuturni, atq; alia id ge-
neris cogitata, quæcunque maxime inania, bullæq; simi-
lia mens fatuis parit hominibus. Vt igitur in his rebus
si quis ratione non eiusmodi cogitationes compren-
dit, ex quibus cupienti aliquid boni contingat; sed in
appetitionibus, quæ nullæ omnino sunt, temere impru-
denterque uersatur; hic demens est ac miser; cum tem-
pus, quod ad ea agenda accommodatum est, de qui-
bus deliberare admodum conducit, illud ipsum in in-
somnia consumat. Sic qui precandi tempore non ad
ea quidem, quæ expediunt, sed ad turbulentos animi
motus mentem excitat, cum arbitretur iisdem ipsis per-
turbationibus Deum simul affici; hic re uera desipit,
multaque temere effundit, quandoquidem precibus il-
lud a Deo contendit, ut adiutor ille sit & socius ine-
ptiarum suarū. uerbi gratia, accedet aliquis, ut Deum
supplex oret; cumque summam eius, ad quem adit, po-
testatem animo menteque non comprehenderit, im-
prudēter hic sane facit, cum turpium petitionum humi-
liumq; iniuria illius afficiat maiestatem. Vt si aliquis qui
ex sua summa paupertate, agrestique uitæ instituto cau-
ponis uasa magni æstimat, cum ad regem postea acce-
dat, qui omnes opes largiri instituit: hic cum ab illo ali-
quid petere negligat, putat eum tanta dignitate uirum
esse dignum, qui uasa fingat; ut quod sibi placeat, ali-
quid e luto efficiat: sic qui precibus orationeque im-
prudenter utitur, non ad eius altitudinem, qui cuncta
tribuit, animum erigit; sed illud iste exoptat, ut Deus
opt. max. in cupiditatis suæ, quæ humilis est ac terre-
na, sententiam descendat: id propterea turbulenta
animi appetitiones ei præ se fert, qui animum intue-

B rur:

tur: non ut mentis motibus, qui rationi minus conueniunt, remedium adhibeat: sed ut diuino auxilio accedente ipse deterior fiat. Ita enim hic ad Deum: Quoniam qui me grauiter lædit, aduersus eum odio meus afficitur animus: tu percute illum Domine. hocq; solum uoce contendit; Vtinā hæc mea animi perturbatio in te sit; & ad te mea hæc mala mēs perueniat. Nam ut in hominum digladiationibus uni parti quispiam auxilium ferre non potest; nisi qui una cum eo, qui in aduersarium ira cōcitatus est; se quoque eidem iratum ostenderit: ita perspicuum est, qui Deum contra inimicum commouet, illud eum rogare, ut ira simul Deus incendatur, & socius particepsque fiat furoris sui. hoc autem est, ut Deus in perturbationes cadat, moreque hominum uarie afficiatur, atque ex optima natura in ferinam commutetur crudelitatem. Sic qui præ gloria insanit; qui ceteris præstare insolenter appetit; qui in iudiciali disceptatione superare festinat; qui in gymniciis ludis cōrona donari contendit; qui in theatris gloriæ laudem quærit; sæpeq; etiam is, qui insano adolescentiæ morbo contabuit; omnes hi nō eas ad Deum preces adhibent, ut morbi illius ui liberentur, sed in se ipsis potius ea ægritudinis uis expleatur ac terminetur. Et quoniam animi affectiones remittere, id pro calamitate isti arbitrantur, inepta huiusmodi oratione utuntur, cum illud a Deo supplices petant, ut adiutor ille sit & socius ægritudinis, qua ipsorum mentes perturbantur; utque ad eorum libidinem, id quod omnium difficillimum factu est, contrariis inter se motibus Deus impelatur: quippe cum & in benignitatem & acerbicatem dispertiantur isti actionem Dei. Quem enim propitium sibi ac misericordem esse flagitant, eundem tum acerbum,

bum, tum crudelem se aduersariis ostēdere omni obsecratione contendunt. O dementiam istorum, qui ita inepte precantur. Si enim illis crudelis est Deus, ne tibi quidem utique lenis erit; sin autē, quemadmodum ipse speras, tui misericordia commouetur, quid est, ut in contrariū se conuertat, clemētiamq; in acerbitatem commutet? At in promptu est eorum, quos contendere delectat, huius rei refutatio. ad acerbitatis enim suæ patrociniū statim in medium proferūt prophetarum exempla: Dauidem enim dicunt inimicorum interitum exoptare, precarique ut ipsi erubescant & conuertantur: Hieremiam illud in optatis habere, ut aduersarios ulciscatur Dominus: prophetam eū, qui Oseas dicitur, a Deo precibus rogare, ut hostibus ille det uulnam sine liberis & ubera arentia: atque pleraque quidem id generis alia sunt, quæ nullo sacris litteris sparsa isti colligunt; nimirum cum illud teneant ac defendāt, oportere male se aduersariis precari, Dei que benignitatem sibi sociam iniquitatis adiutricemque asciscere. Nos uero ut obiter eorum, qui ex eiusmodi occasione in contrariam adducti sunt opinionem, ineptis insulsisque sermonibus finem imponamus: hoc ad ea, quæcunque sigillatim commemorata sunt, afferemus. Nemo e sanctis uiris, qui uere diuino sunt afflati spiritu, quorumue instituta uitæ ad eorum, qui postea succedunt, disciplinam Dei prouidentia litteris prodita sunt, in mala re aliqua studium posuisse demonstrabitur; sed illorum omne institutum eo spectat, ut naturam hanc, quæ multis est affecta uitiis, præceptorum rationibus ipsi excolerent. Quare quemadmodum is, qui supplex petit, ut ne sint, qui morbo laborent, neue qui egestate premantur; hic non hominum interitum, sed cum

morbi, tum etiam mendicitatis exitium fieri expetit; ita sanctissimus quisque uir cum illud orando petat, ut quod aduersum est, infensumque naturæ, id omnino ad interitum ruat: hoc imperitis hominibus suspicionem attulit, acerbos eiusmodi uiros esse atq; irato animo in mortalium genus. Nam psalmorum etiam scriptor, cum ita loquitur: Deficiant peccatores a terra, & iniqui ita, ut non sint. his uerbis & peccatum & iniquitatem tolli precatur: non enim homo homini inimicus; sed mali consilii deliberatio fecit, ut quod naturæ uinculo illigatum est, id in rebus inter sese pugnantibus numeraretur. Ergo malum uitiumque ut intereat, ille rogat; at homo malum non est; quo enim pacto fit, ut malum sit is, qui boni similitudo est, atque imago? Itaque si ille execratur atque exoptat, ut inimici erubescant & conuertantur; ob oculos tibi ponit cateruam hostium, qui occulte oppugnant uitam hominum. De iis quidem hostibus Paulus etiam apertius disserit; cum luctationē quandam commemoret, quæ nobis est aduersum principes & potestates, aduersus mundi rectores contra spiritualia nequitia in cælestibus. hoc est contra malorum geniorum insidias, quibus malæ fortuitæq; peccandi causæ hominibus introducuntur, iracundiæ casus, appetitionum occasiones, inuidiæ, odii, superbiæ, huiusmodique malorum seges ac materia. Harum rerum insidiis magnus propheta Dauid cum cuiusque hominis animum circumueniri cerneret; hoc inimicorum genus execrando, illud orat, ut ipsi erubescant; hoc est, ut ab iis utique ipse liberetur. Nam illud natura comparatum est, ut qui luctando superatus est, casum hic erubescat: quemadmodum qui uicit, de uictoria ille triumphet. Atque illa qui-

quidem ita se habere , indicat hoc precandi genus: Erubescant & conuertantur, qui quærun animam meam. non enim iis male precatur , qui aut sibi facultatum iam æuram ex insidiis inferre conantur , aut qui de prædii finibus litem intendunt, aut aliquam corpori minantur cladem ; sed illos sane execratur , qui animo insidias ponunt. quæ autem insidiæ animo fiunt, hæ quidem quæ aliæ sunt, nisi a Deo abalienatio ? Hominis uero animus a Deo nõ aliter sane auersus est, nisi cum perturbationibus ipse afficitur . Itaque ab omni perturbatione cum diuinitas utique uacua sit , quodcunque in motu perturbationeq; uersatur, id omne a Dei conjunctione auellitur . Hoc igitur ne sibi eueniat , precibus id agit , ut inimici sui erubescant & conuertantur . Id ipsum uero nihil perinde est , ac si deprecetur, ut sibi de hostibus uictoria contingat ; qui sane hostes sunt animi commotiones. Eodem modo religionis erga Deum uera pietate ductus Hieremias & regis, qui præ multo idolorum cultu insaniebat , & eorum , qui illius imperio subiecti, eodem errore abstricti tenebantur; communi horum morbo , non suo curationes adhibet, sed pro his scilicet orationē habet : cum illud is flagitet, ut impetu aduersus eos concitato, qui se impietatis scelere illigassent , uniuersum mortalium genus se in officio pietatis contineat . Pari ratione propheta is qui Oseas dicitur, cum uitium animaduerneret multiplices fetus Israelitis procreare : sterilitatis eos poena condemnat, & acerba peccati ubera exarescere cupit; ut in illis hominibus uitii peccatique semen neque gignatur neq; alatur. Ideoq; in hæc uerba propheta crumpit: Da eis Domine uuluam sine liberis & ubera arentia. Ac si in sanctis quidem uiris alius aliquis esset inuētus, qui ira-

iracundiæ nomine accusaretur; ad hanc sane sententiam id ipsum omnino refertur. si enim quis malum reiiicit, non hominem ipsum affliget. Deus mortem non effecit; hoc dictum audis: quid igitur est, quamobrem qui a morte inferenda abhorret, cum eo precibus agas, ut tuos perdat inimicos? non uiuentium interitu deletatur Dominus. At qui inepta precandi ratione utitur, & contra inimicos suos cõcitatur clementiam Dei, hic illum adhortatur ut e mortalium miseriis capiat uoluptatem. At uero dicet aliquis; plerique & magistratus & opes & honores affecuti sunt, cum ad hæc potissimum consequenda preces adhibuerint: ac propter præclaros huiusmodi rerum successus Deo grati admodum habiti sunt: quid est igitur, cur nos prohibeas, ut hæc ipsa supplices a Deo petamus? Cuncta quidem Dei pendere uoluntate, diuinoque consilio hanc omnium uitam gubernari perspicuum est; neque huic dicto quispam repugnat. sed harum quidem rerum, quæ precum uirtute perficiuntur, alias nos causas cognouimus: cum eas res non tanquam bona quædam Deus petentibus utique tribuat; sed ut his ipsis simplicium hominum in se confirmetur fides; utque cum in leuioribus petitionibus supplices a Deo paulatim exaudiri nos ex usu cognoscamus; ad cælestium munerum, quæ Deo conueniunt, appetitionem aliquando erigamur. Quemadmodum in liberis nostris hæc omnia fieri cernimus. quamdiu enim ii matrum mammis adhærent, tantum ab illis quærunt, quantum sane naturæ patitur ratio. cum uero infantes sensim adulescant, & aliquam incipiant habere loquendi uim; mammas illi quidem negligunt, & aliquid eiusmodi petunt, quod aut ad ornatum, aut ad uestitum, aut ad
ca

ea pertineat, quibus puerorum oculi oblectari solent. Postea uero quam confirmata iam ætate simul cum corpore aucta est mentis uis, tum puerilibus omnibus remissis cupiditatibus, illa a parentibus deposcent, quæ perfectio sunt uitæ generi consentanea. Ita etiam Deus cum hominē assuefaciat, ut omnibus in rebus ad eum contueatur, iccirco sæpe ne leuiora quidem postulata negligit, ut rerum exiguarum beneficio is, qui tale munus impetrauit, ad cælestium rerum excitetur cupiditatem. Quare si aliquis obscuriori quidem loco natus, nobilis factus est & illustris, aut aliquid eorū, quæ in hac uita expetuntur, utpote magistratus, opes, & splendorem adeptus est: tu uelim cōsideres hoc ipsum eo spectare, ut diuinæ potestatis tibi significatio fiat, ut cum hæc scilicet, quæ puerorum oblectamenta sunt, ille adeptus sit, tu maiora sane ac perfectiora supplex a patre tuo petas. Hæc uero sunt, quæ fructum animo pariunt. Nam uel absurdissimum quidem esset, eum, qui ad Deum supplex accedit, ab illo, qui ex omni æternitate est, ea quærere, quæ carnis sunt consentanea sensibus, a cælesti terrena, a sublimi humilia, ab eo, qui cælorum largitur regnum, terrenas has atque humiles prosperitates expetere, rerumq; alienarum, quæ sæpe necessario auferuntur, quarumq; & breuis est uoluptas & periculosa administratio, earum exiguum usum ab illo petere, qui cælestia donat. Cum igitur hæc postulare absurdum esse dicat, recte addidit: quæadmodum Ethnici faciunt. Etenim in iis, quæ speciem aliquam præ se ferunt, studium ponere, est hoc illorū proprium, qui nullam futuri æui spem, nullum iudicii metum, nullas geennæ minas, nullam præmiorum expectationem, nihil denique sibi eorum proponunt, quorum spes ex
resurre-

resurrectione nobis ostenditur: Hi quidē cū tanquam pecudes, ex potu & cibo hanc, quam uiuimus, uitam æstiment; gutturi & uentri reliquisque corporis indulgent uoluptatibus; in prosperoque feliciū rerum successu ponunt, aut quibusdam præesse, ceterisque præstare; aut multam pecuniæ uim possidere; aut si quæ aliæ sunt huius uitæ fraudes: his quidem hominibus si aliquis de futurarum rerum expectatione sermonem habet; ac de paradiso, de regno, de celestis uitæ consuetudine, eiusmodique de rebus differit: delirare hic plane uidetur. Itaque quoniam qui nulla spe tenentur, hoc omnino illi habent, ut huic uitæ prorsus addicti sint; iccirco superuacanea & inania quædam appetitioni accommodata, precum ope recte prospereque sibi euenire putant isti uoluptatis amatores. Hæc Dominus ostendit ad ethnicos pertinere; qui propterea quod rebus absurdis obnixè operam dant, arbitrantur ad ea, quæ minime decent, impetrare auxilium Dei. putant enim, inquit, quod in multiloquio suo exaudiantur. Atq; illa quidem, quæ minime petenda sunt, ex iis sane cognouimus, de quibus habita est a nobis disputatio. Quæ uero nos a Deo precari conueniat, ex illis, quæ deinceps commemorabuntur, intelligemus munere ac benignitate Domini nostri Iesu Christi, cui gloria in sempiterna ætatum sæcula. Amen.

CONCIO. II.



AGNVS ille Moses cum Israelitas in montem adduxit, ut sacrorum disciplinam ipsi cognoscerent: non prius quidem eos dignos esse censuit, qui in Dei conspectum uenirent, quam & sanctimonia & expiationibus uitæ illis

illis integritatem, castitatemque præscripserit. Neque hoc etiam pacto in diuini numinis aspectum uenire ausi sunt: sed in omnem partem, unde conspectus fieret, ignis, nubes, fumus cū obduceretur, buccinarumque; clāgor perstreperet; illi perterrefacti sunt; qui cum rursum ad se rediissent, quasi per se minime idonei esse possent, qui ad Deum proxime accederent, Deique præsentiam intuerentur; optimum factū esse arbitrati sunt, ut latorem legis Mosē diuinæ uoluntatis interpretem adhiberent. At uero lator legis noster Dominus Iesus Christus nos ad Deum perduciturus non oratione nobis Sinai montē ostendit, qui aut nube obductus sit, aut fumo obscuratus; neque eos tubarum sonitus demonstrat, qui obscurum aliquid referant, terroremue incutiāt; neque tridui castitate indicta, aquis animi sordes eluit; neque omni multitudine ad imum montem relicta, aditum uni soli patefacit ad summum montem, qui densissima sit nube obtectus, qua occultetur gloria Dei: sed primum quidem loco montis nos ducit ad cælum ipsum, cuius ascendendi facultatem hominibus ob uirtutem dedit; deinde non spectatores solum diuinæ nos uirtutis facit, sed etiam socios ac participes; quodamque modo agit, ut proxime accedentes diuinæ naturæ cognatione iungamur. Neque eximiam is gloriam nube obscurat, ut ne ab illis quidem cernatur, qui ipsius gloriæ laudem quarunt: sed clarissimo doctrinæ lumine caliginem cum illuminauerit, illud porro effecit, ut ea gloria, quæ oratione minus exprimi potest, illustri splendore conspiciatur ab iis, qui puro castoque sint animo: neque aqua; quæ aliunde deriuatur, sed quæ in nobis ipsis exoritur, nos ille circumfundit; siue lacrymarum


C pro-

profusionem aliquis hoc dixerit, siue puram animi conscientiam, quæ nullis uitii sordibus obsolescit. Castitatem uero cum non eam solum, quæ iusta coniugum consuetudine procuratur, sed illam etiam esse statuatur, quæ ab omni turbulento carnis affectu pura est, hoc pacto ad Deum precum nos ope adducit. Nam supplicum uerborum huiusmodi uis est, ut nō uoces aliquas syllabarū impressione explanatas; sed ad Deum ad eundem eam rationem percipiamus, quæ in caelesti perfectoque uitæ instituto planè elucet. At diuinam quidem sacramentorum rerum scientiam ex ipsis precum uerbis cognoscere licet: Cum oraueris, inquit, neque porro dixit, cum uoueris, sed cum oraueris; quasi antequam ad Deum supplex accedas, illud recte factum prius oportuit. Quid ergo inter hæc nomina differt? hoc sane, quod uotum est quarundam sponsio rerum, quæ pietatis religionisue causa Deo dicantur: oratio autem rerum est, quæ expediunt; petitio, quæ cum precibus simul iuncta ad Deum adhibetur. Itaque quoniam nos libere loqui oportet, cum ad Deum accedimus, ut quæ nobis conducunt, illi supplicemus; necessario quæcunque ad uoti nuncupationem pertinent, illa omnino præcedent, ut hoc ipsum cum nostra sponte perfecerimus, confidenti quidē animo id, quod petimus, a Deo impetrare nō recusemus. ideo propheta ita loquitur; Tibi reddam uota mea, quæ distinxerunt labia mea. & illud: Vouete et reddite Domino Deo uestro. Multis diuinarum litterarum locis significationem hanc inuenire licet, ita ut sponsonem eam (quemadmodum dictum est) quæ gratis sponteque facta sit, uoti uim habere cognoscamus: postea uero quam id præstitimus, quod est a nobis promissum, oratione adhibita uia aditumque
ad

ad illum aperiri . Itaque illud Dominus præcipit, ut ne à Deo quidquā ante petatur, quam munus sit aliquod allatum, quod Deo gratum sit; nouendum primum scilicet; deinde precandum . Verbi causa, si quis dixerit, sementem prius fieri oportere, quam messem . Quare uoti nos semina ante spargere necesse est : hocque pacto maturis iam frugibus eos seminum fructus colligere, quibus adhibito precum præsidio gratia comparatur, quasi huiusmodi gratiæ adeptio non libere futura sit, nisi uoto aliquo ante nuncupato, munereque oblato aditus patefiat ; iccirco uotum deprecationem antecedit necesse est . Ergo quasi uoto primum facto; Dominus discipulis inquit: Cum oraueritis, uelim uos ita dicatis, Pater noster, qui es in cælis . Quis mihi dabit alas tanquam columbæ? in Psalmis, inquit, quodam loco magnus David. Ego quoque non dubitauī in hanc ipsam uocem erumpere: quis mihi dabit alas quasi columbæ? ut horum uerborum magnitudinem alta quadam mente attingere queam, terraque omni relicta, uniuersum superem aerem, qui medio mundi loco diffunditur, & stellas omnemque illarum ornatum comprehendam: ac ne in iis quidem consistam, sed ulterius progrediar: & cū per has, tum per illas transeam, quæ mouentur & traiciuntur; eamque naturam attingam, quæ cum firma immobilisque in se ipsa hæreat, tum eius uicī cuncta feruntur, ac mouentur: quæ cum ab inexplicabili diuinæ sapientiæ consilio proficiantur; in eo, quod est, uniuerſa uertuntur: ita ut ab omnibus, quorum motus atque traiectiones fiunt, mente ego longe remotus, firmo stabilique animi mentisque statu primum cum eo, qui neque mouetur, neque mutatur, familiaritate quadam coniungar, deinde hac fa-

miliari consuetudine introducta, illum patris nomine appellem. qua enim mente eum esse oportet, qui illum ita nominat? quanta loquendi libertate? qua conscientia? ut cum ex omnibus, quæ de Deo intelliguntur, ipsum Deum, quoad eius fieri potest, mente comprehenderit, eoque adductus sit, ut rem difficilem atque inexplicabilem cognoscat; percipiatque denique diuinam naturam, ipsam esse bonitatem, sanctificationem, gaudium, potentiam, gloriam, integritatem, & eam sane ipsam æternitatem, quæ semper eodem se modo habet: cumque & ex diuinis litteris, & ex meditationibus suis animo talia perceperit, quæcunque de Dei natura in cognitionem cadunt; tum hic omnino audebit eiusmodi uocem proferre, talemque suum nominare patrem. nam perspicuum est, quod si quis aliqua est ratione præditus, eademque sibi non inesse intelligit, minime audebit talem emittere uocem, qua Deum patrem nominet: quoniam naturæ consentaneum non est, ut qui bonus est, is improbæ uoluntatis consiliique pater existat; qui sanctus est, filium habeat, qui huius sit uitæ sordibus inquinatus; qui nunquam mutatur, pater eius sit, qui in omnem mutationem uertitur: is qui uera uita est, illius, qui est ob peccatum mortuus; qui incorruptus est, ab omni labe purus, eorum, qui turpibus sint infamiæ notis deturpati; qui liberalis est, eius auarus sit filius: qui uirtute denique omni insignis cernitur, filios habeat, qui aliquo scelere astricti deprehendantur. Si namque aliquis cum secum animo reputet, expiationibus adhuc se indigere, prauamque conscientiam suam norit sordibus plenam, malarumque libidinum notis inustam, antequam eiusmodi multa uitiorum labe illam expurgauit; in Dei cognationem iste

iste se hoc patris nomine insinuat; ut iustum iniquus, & purum sanctumq; patrem impurus homo nominet; contumeliarum sane & maledictorum hæc plena sunt nomina, cum improbitatis, scelerumque suorum parentem hic Deum appellet: patris enim uoce causa origoque eius significatur naturæ, quæ ab eo existit. Quare si aliquis, qui praua est mentis conscientia, patrem sibi Deum esse dicit, nihil ab eo dissimile est, ac si illum uitiorum suorum & ducem & auctorem esse arguat. At nulla, ut est apud apostolum, luci cum tenebris est societas, sed lux luci cognata, æquitati æquitas, honestum honesto, & quod sanctum est, sancto coniungitur. quæ autem his repugnantia sunt, eodem inter se cognitionis uinculo continentur. Itaque si graui corde, ut sacris in litteris scribitur, aliquis est, & mendacium quærit precum uerbis confusus: hic sciat non cælestem illum, sed inferorum a se patrem uocari, qui & ipse falsus est, & omnis conficti mendacii pater; hic quoniam peccatum est, peccatum gignit; atque eam ob causam qui animo sunt perturbationibus affecto, ii ab apostolo dicuntur iræ filii: quiue est a uita auersus, hic perditionis nominatur filius: quiue mollis est atque effeminatus, transfugarum puellarum filius appellatur. pari ratione contra qui pura integraque mentis conscientia sunt, hi filii lucis & diei nominantur; & potentæ filii alii sunt, qui Dei se uirtute roborauerunt. Quamobrem Dominus cum nos precibus adhibendis patris nomine Deū appellare instituit, nihil aliud mea quidem sententia efficit, nisi ut cæleste illud diuinumque uitæ genus præscribat. non enim is, qui ueritas est, nos falsa docet; ut dicamus scilicet nos tales esse, quales certe non sumus, appellemusque nos ipsi eo nomine, quod natura



natura nobis minime conuenit, sed illud; ut cum patrem nos eum uocamus, qui incorruptus est, iustus, ac bonus, uitæ integritate ueram cum illo cognationem ostendamus. Vides quanta sit nobis adhibenda præmeditatio, quod uitæ genus, quantiue studium sit in eo ponendum, ut hunc ipsum libere loquendi modum assequamur, elataque mēte non dubitemus patris nomine appellare Deum. Nam si pecuniarum uim spectas, aut ab hominibus gloriam expetis, aut cupiditatum fœdis inquinatus es affectibus; eiusmodi deinde precū orationem pronuncias: quid putas eum dicturum, qui uitæ tuæ consuetudinem spectat, orationemque tuam audit? quandoquidem talia quædam uerba tanquam a Deo audire uideor, qui contra hominem id generis ita dicit: Tu ne, qui uitiosum corruptumque uitæ genus sequeris, eum, a quo omnis est incorrupta integritas, patrem appellas? cur impura uoce tua nomen sanctum & immortale inquinās? cur in nomine mentiris? cur naturæ, quæ integerrima est, turpes iniuriæ notas inuris? Si filius meus esses, necesse illud utiq; erat, ut uitæ etiam tuæ disciplina uirtutum mearum notaretur signis: non naturæ meæ imaginem in te agnosco; contrariarum in te rerum insignia sunt. quæ luci cum tenebris communitas? quæ uitæ & mortis cognatio? quæ naturalis est cum impura, rei puræ ac sinceræ affinitas? maxima liberalis & auari dissimilitudo est; misericordis & eius, qui crudelis est, repugnantia eiusmodi est, ut inter se cohærere nullo pacto queant. alius est sane pater uitiorum tuorum: quandoquidem qui e me nati sunt, paternarum uirtutum laude ornantur. ex misericorde patre pius nascitur & misericors filius; e puro sinceroque parente filius purus existit & sincerus:

ab

ab interitu alienus est, qui ab immortali patre exoritur: atque e bono denique bonus; e iusto nascitur iustus: uos autem ignoro, unde sitis. Quare in eiusmodi precum atque obsecrationis ratione, prius, quam uitæ tuæ sordes elueris, periculosum est audere Deum nominare patrem tuum. At orationis rursus uerba audiamus, ut repetita simul iterum commentatione res occultas atque abstrusas nos aliquo modo mente comprehendamus. Pater noster, qui es in cælis. uitæ igitur honestæ instituto Deum nobis conciliari, est mediocriter quidem a nobis demonstratum in iis, quæ supra commemorauimus: sed grauius tamen aliquid his uerbis sentire mihi uidetur Dominus. Fortasse enim patriam, a cuius dignitate cecidimus, & cognationis, a qua eiecti sumus, in memoriam nobis redigit. Etenim ex ea narratione, quæ de illo adolescente exponitur, qui paterna domo se remouerat, uitæque sordibus, ut lutulentus sus, sese inquinauerat; mortalium miseriam ostendit Dominus, qui historici more narrat illius discessum, & intemperatam effusumque uitæ modum. Neque prius ille ad eum, in quo a principio fuerat, felicem rerum statum rediit, quam præsentem calamitatem senserit, pænitentiaque uerba excogitarit; quæ maxime cum precum oratione conueniunt; dixit enim: Pater peccaui in cælum coram te. Hic sane confitendo non addidisset, se in cælum peccasse, nisi sibi persuasisset patriam esse cælum, quo relicto, peccatum admiserat: quamobrem eius confessionis ratio, quam antea meditatus erat, illud efficit, ut ei pater se facilem præbeat, ita ut illi occurrat, eiusque collum complexus osculetur. Quæ res rationis significat iugum, quod ex euangelii traditione est impositum homini, qui primum

num præcepti onus depulit, legemque seruare recusa-
uit. stola autem illum indui iubet, non alia quidem,
sed priore illa, qua ideo spoliatus fuerat, quoniam obe-
dire neglexerat: qui simulatque degustauit ea, quibus
prohibitus erat, nudum se esse uidit. Annulus autem
in digito, pala insculpta, imaginem illum recuperasse
ostendit. calceis uero pedes munit, ut si nudis calca-
neis is appropinquet serpentis capiti, ne forte eueniat,
ut eius morfu ipse feriat. Quare ut a patris benigni-
tate illic causa extitit, ut filius in patriam rediret do-
mum: hæc autē domus cælum est, contra quod se pec-
casse patri fatetur: ita hic illud Dominum docere arbi-
tror, ut pater is appelletur, qui in cælis est. Optimam
igitur patriam tibi commemorat, ut cum uehementio-
ri aliqua rerum honestarum cupiditate fueris affectus,
uiæ appropinques, quæ in patriam reducit. Hæc porro
uia, qua hominum natura in cælos fertur, non alia mi-
hi ulla esse uidetur, nisi ut aliquis sit Dei similis: ex
eo autem quod Dei quispiam similis est, iustus uir, san-
ctus, bonus; atque id generis homines fieri possunt,
quorum signa si quis, quoad fieri potest, in se recte im-
presserit, is nullo negotio, suaque sponte cælestem in
locum a terrena hac uitæ consuetudine commigrabit.
non enim loci interuallo diuinitas & humanitas disiun-
cta est; ut difficili aliqua nobis atque ardua meditatio-
ne opus sit, ut hoc, quod e carne concretum est, graue
illud quidem & terrenum ad id uitæ institutum tradu-
catur, quod non corporis sensibus, sed mente contine-
tur. Verum cum uirtus mente sit a uitio seiuncta, in so-
lo quidem hominis consilio positum est ad utram rem
is cupiditate impellatur. Itaque quoniam bonum deli-
gere, nullum est amplius sane negotium: huiusque
deli-

deligendi consilium atque adeptionem ea consequuntur, quæ aliquis optime delegit; tu quidem potes, cum Deum mente comprehendas, in cælo uersari. si enim, inquit Ecclesiastes, in cælo Deus est; tu uero cupiditate quadam te Deo adiunxisti: necesse omnino est, quippe cum Deo iunctus sis, te simul eo loci esse, ubi est Deus. Quare qui illud tibi præscripsit, ut Deum orando patrem tuum esse diceres; nihil aliud hic præcipit, nisi ut diuino quodam uitæ instituto te cælestis patris similem omnino præberes: quemadmodum eiusmodi etiā præceptum alio loco clarius his uerbis explicatur. Estote perfecti ut & pater uester perfectus est. Itaque si huius orationis uim atque sententiam iam intellexistis, tempus iam certe est animos uestros ita parare, ut aliquando uerba hæc proferre libere audeatis. Nam ueluti quæ ad Dei similitudinem spectant, ea uobis adeo cognita sunt, ut Dei uos filios fieri liceat: quoniā quicumque illum receperunt, dedit eis potestatem filios Dei fieri: recipit autem Deum in se aliquis, qui perfectam aliquam uirtutis formam induit. Ita propria quædam sunt formæ, ac speciei pessimæ signa; quæ si in aliquo impressa sunt, is cum contrariæ naturæ imaginem præ se ferat, filius Dei esse nullo modo potest. lubet ne certas turpissimæ formæ notas cognoscere? hæc sane sunt inuidia, calumniandi libido, superbia, auaritia, effrenata cupiditas, honorum infania. hæc & talia sunt, quibus aduersarii forma adumbratur atque exprimitur. Quare qui sordium eiusmodi notas animo inusserit, si patrem hic nominauerit, qualis eius pater intelligetur? is scilicet, qui cognatione cū illo iungitur, a quo uocatus est. hic autem non cælestis pater est, sed terrenus: cuius enim propinquitatis insignia præ se fert;

Q. E. D.

D ille



ille suam omnino cognationem agnoscat. Itaque mali sceleratq; hominis preces quoad in scelere uitioq; adhibetur, tamdiu diaboli auxilium imploratur. abiectis autem peccati sordibus, eius, qui ex uirtute uiuit, uox optimum patrem appellabit. Ergo cum ad Deum accesserimus, uitæ nostræ rationem primum nos perquiramus, an diuina cognatione dignum nobiscum aliquid afferamus; hoc pacto deinceps huiusmodi orationem habere ne dubitemus. Qui enim nos patrem dicere instituit, mentiri prohibuit. Itaque is, qui illud uitæ institutum tenet, quod a Dei cognatione nō abhorreat, hic recte in patriam illam cælestem spectat; cum & cælorum regem patris appellatione, & cælestem illam beatæ uitæ rationem patriæ nomine uocet. Quorsum huius consilii propositum attinet? ut sane cælestia sapias; ubi Deus est, illic domicilii fundamenta ponas; eoq; animum tuum traducas, ut quoniam ubi est thesaurus tuus, ibi etiam erit cor tuum; paternam pulchritudinem perpetuo intueare, ad eiusq; similitudinem tuum ornes animum. Non est apud Deum, ut in sacris litteris scribitur, personarum acceptio. remotæ sint a facie tua sordes. ab inuidia, omniq; fœda labepurus est Deus. Neq; eiusmodi animi perturbatorium notæ impressæ in te sint, non inuidia, non superbia, nō res ullæ aliæ, quæ diuinā deturpent pulchritudinem. si igitur talis es, ne dubites uoce tua Deum appellare, patrēq; tuum eū dicere, qui in omnibus dominatur. Paternis ille oculis te aspiciet, diuino te stolæ amictu induet, annulo decorabit te, pedes tuos quasi calceis euangelicis ad cæleste iter aptos efficiet, in cælestis te patriæ sede collocabit, auctore Christo Iesu domino nostro, cui gloria potētiae in sempiterna sæcula. Amē.

Concio

CONCIO III.

EX, quæ futurorum bonorum umbrā habet, & obscuris quibusdam significationibus ueritatem occulte demonstrat, cum sacerdotem, qui Deo precaturus est, in templi adytum introducit; primum quidem, cum is ingreditur, expiationibus quibusdam atque asperсионibus illum abluit, deinde ueste sacerdotali ex auro, purpura, uarioq; opere decore prætexta cum eum ornaret; & ad illius pectus insigne quoddam, quod rationale dicebatur, apponeret; & ad imas uestis partes malis puniceis floribusq; distinctas tintinnabula appenderet; & in summa parte lateribus pallium annecteret, & diadema caput ornaret; & comam multo unguenti odore perfunderet: hac sane habitus ratione in templi adytum eum inducit, qui occulta sacra faceret. At uero spiritalis lator legis dominus Iesus Christus, qui corporis integumentis legem denudat, obscurasq; rerum, quæ adumbratæ sunt; significationes aperit; primum is quidem non ex omni multitudine unum delegit, quem in colloquium Dei adducat, sed cum commune omnibus, qui uolunt, proponat sacerdotii munus; uniuerfis æque hunc honorem tribuit. Deinde uero non alieno ornatu, pictoq; ac textili amictu sacerdotis dignitatem ornari præcipit, sed proprio decoroq; habitu illum induit, utpote cum pro purpurea uariaq; ueste uirtutum eum decoret ornamentis, neque terreno auro ornat, sed integra sinceraq; mentis conscientia illustrat animi pulchritudinem. Huic uero mitræ pretiosorum lapidum accommodat radios. hi autem sunt, diui quidem Pauli iudicio, sanctorum manda-

torum splendorēs. quin etiam. periscelide eam uestit partem, ad cuius ornatū pertinet eiusmodi uestimenti genus. tu autem non omnino ignorās hanc ipsam partem temperantiæ quasi ueste ornari. Extremis uero uitæ partibus mala punica, quæ mente insita sunt, flores & tintinnabula appendit. hæc optimo iure quis intellexerit ea, quæ in perfecto honestæ uitæ instituto officia elucent; ut in hoc uitæ spatio iter illustre fiat. Itaque his imis partibus cum pro tintinnabulis optimos uerborum fidei sonitus; pro malo punico futuræ spei præparationem, quæ in obscuriore uitæ ratione occulta latet; pro floribus maximum florentissimumq; paradisi præmium apposuerit; hoc denique pacto nos in adytum intimumq; templi locum introducit. est porro hoc adytum, neque inanima res, neque dispersita, sed cōmunis quasi mentis cella; quæ si re quidem uera adytum est, eo neque uitio, nec impuris cogitationibus patens est atque exposita uia. cælesti uero cognitione caput ornat, cum non litterarum speciem laminis ostenderit aureis, sed ipsum Deum rationi, quæ animi moderatrix est, impresserit. Vnguentum autem comæ id comparat, cuius odor ex intimis ipsius animi partibus effunditur. Victimam uero & sacrificium Deo se offerri instituit, idq; mystica oblatione, non aliud quidem aliquid, quam se ipsum. Nam quem Dominus ad hoc sacerdotium elegit, is spiritus gladio, quod est uerbum Dei, cum carnis sensum sustulerit, in templi adyto hic uersetur; Deum omnino placat; cū ad eiusmodi sacrificium Dominus se hostiam præbuerit; corpusq; suum obtulerit hostiam uiuentem, sanctam, & Deo placentem. At fortassè aliquis dicet, ex iis ipsis rebus minus in promptu esse orationis sententiam, quæ

quæ ad explicandum a nobis suscepta est, eosq; nos cõmentari sermones, qui rebus propositis non apte conueniunt. Quare quæ primum de precandi nos ratione commemorauimus, eorum rursus mentio fiat. Nam qui ita se instituit, ut patris appellatione Deum libere nominare audeat; hic diligenter illa se stola induit, quam Dominus descripsit, tintinnabulis canit, malis punicis floret, mandatorum splendoribus in pectore elucet, patriarchas humeris portat, utpote cum illorum uirtutes, nominum loco, in proprium conuertetur ornatum; corona iustitiæ caput decorat, comam habet cælesti unguenti odore perfusam, in intimisq; cælestis domicilii adytis uersatur; quæ si nulla impura cogitatione uiolantur, uere quidem adyta sunt, cum nullus eo rerum malarum aditus patefiat. Iam uero qui sacra facit & procurat, quo se modo is comparare debeat, cum ex iis, quæ explicata sunt, iam satis demonstrauerit oratio; illud sane sequitur, ut eas petitionis rationes consideremus, quas ad Deum adhibere Dominus illum iussit, qui intra templi adytum uersatur. Non enim quæ precum orationisq; uerba aperte exposita sunt, ita facilem nobis sententiam præ se ferre uidentur, ut ea pateant, omninoq; in promptu sint. Sanctificetur, inquit, nomen tuum, adueniat regnum tuum. Quid hæc ad me? dixerit aliquis, aut is, qui peccatis astrictus se ipsum pænitétia excruciat, ut summam peccati uim aliquo pacto effugiat; aut ille, qui Dei opem implorat, cum in oculis conspectuq; cum perpetuo habeat, qui sibi quasi tentationum telis aduersatur. Hinc furores a rationis statu illum deiiciunt; illinc mentis uim rerum absurdarum restinguunt appétitiones; aliunde infinita illa plus habēdi sitis animum quasi

quasi febris ardore accendit. superbia, arrogantia, odium, reliqua; nobis repugnantium multitudo, quasi quædam hostium caterua, quæ nos undique obsideat, ad ultimum discrimen animum deducit. Is postea, qui firmiori præsidio hæc mala depellere conatur, quibus precum rationibus aptius utetur? an non quibus magnus David? Libera me, inquit, ab iis, qui oderunt me. Item; Auertantur inimici mei retrorsum. & alibi; Da nobis auxilium de tribulatione. & quæcunque id generis alia, quibus cōtra aduersarios implorare nos possumus auxilium Dei. At quid in præsentia statuit deprecationis lex? Sanctificetur nomen tuum. An enim fieri potest, ut, etiam si hoc ipsum a me non exprimat, sanctum non sit nomen Dei? Adueniat regnum tuum. Quid enim est, quod Dei potestate non contineatur? qui palmo (ita enim loquitur Esaïas) cælos & omnem terram ponderauit? & manu dimensus est omnes aquas? qui omnem & cælestem, & terrenam creatam naturam quasi ulnis gestat? Ergo si perpetuo sanctum est nomen Dei; nihilq; est, quod non modo diuini imperii potestatem non effugiat, sed cuncta quidem sua potestate complectatur; hoc certe sanctificationis additamento non indigebat is, qui cum ex omni parte perfectus sit, tum nihil etiam sibi omnino deest. quæ igitur subiecta est sententia his precum uerbis? Sanctificetur nomē tuum, adueniat regnum tuum. An fortasse hoc deprecationis genere aliquid eiusmodi Dominus præcipit; nempe cum ad bonum aliquod adipiscendum imbecilla sit hominū natura, nihil propterea eorum, quæ experuntur, posse fieri, nisi ope atque auxilio Dei id a nobis bonum perficiatur. Bonorum autem omnium illud caput est, ut in omni uita di-

uino

uino nomini gloria a me tribuatur. Hæc plane sententia, re contraria apposita, erit nobis illustrior. Quodam loco ex diuinis litteris cognoui eos condemnari, quorum uitio fit, ut iniuriis maledictisq; Deus afficiatur. ita enim scriptum est: Væ illis, per quos nomen Dei blasphematur in gentibus. Hoc autem eiusmodi est: Qui ueritatis uerbo fidem non habuerunt, ii ad uitæ illorum institutum spectant, qui mysterii fidem acceperunt. cum igitur in aliquibus fidei nomen existat, nominiq; opposita repugnet eorum uitæ disciplina; utpote quoniam uel auaritiæ studio, quasi idolorum cultui ipsi addicti sunt; uel in ebrietatibus, comestationibusq; turpiter uersantur; uel in intemperantiæ sordibus, tanquam lutulenti sues, uoluntantur; infidelium quidem hominū tum statim sermones in promptu sunt, qui culpam non in eos conferunt, qui se ita instituerunt, ut hac uitæ luce abutātur, sed illos hæc facere iactitant mysterii præcepto, cum mysteria diuina uiolare nemini liceat, ut aut cōtumeliosus quispiā, aut auarus, aut latro, aut aliquo alio scelere astrictus esse possit; nisi peccare esset illi lege permissum. eamq; ob causam id generis hominibus horribilia quædam Dominus his uerbis minitatur; Væ illis, per quos nomen meum blasphematur in gentibus. Iam uero si res hæc cognita est; tempus certe fert, ut quæ de contrario dicuntur, illa etiam intelligantur. Orare enim nos precariq; in primis arbitror; hocq; orationis caput sit oportet, ut Dei nomen ob uitæ nostræ institutum maledictis ne laceffatur, sed ut sanctificetur, gloriaq; afficiatur mysterii fides. Ergo sanctificetur in me, quod tui imperii potestatisq; nomē a me inuocatur, ut cum præclara facta operaq; uiderint homines, gloriam patri

tri tribuant, qui in cælis est. Quis ita ferus est, atque adeo a ratione auersus, ut cum in his, qui in Deum crediderunt, eam intueantur uitæ disciplinam, quæ in perfecto uirtutis officio eluceat; quæ nullis peccatorum sordibus obsolescat, quæ ab omni impura cogitatione refugiat, quæ in temperantiæ moderatione cernatur, quæ prudentiæ gravitatem præ se ferat, quæ perturbationum impressionibus fortiter resistat, quæ corporis uoluptatibus nullo pacto effeminetur, quæ a deliciis, mollitiæ, insolentiq; superbia uel maxime disiuncta sit, quæ cum hoc uitæ usu tantum cõmunicet, quantum summis pedibus terrâ attingit, quæ non terrenis his uoluptatum blâditis obruta sit, sed earum insidiarum, quæ e sensibus oriuntur, uim superet; quæ carnis astricta uinculis, illud institutum tenere contēdat, quod minus corporis est sensibus cõsentaneum; quæ in uirtute adipiscenda diuitias solum ponat; quæ in Dei familiari consuetudine solam nobilitatem, opesq; ac dignitatem in eo esse putet, ut sese ipsa uincat, neque humanis subiecta sit perturbationibus; quæ uel denique terrenum hunc uitæ cursum sibi produci ægre ferat, atque ad otii portum, tanquam ii, qui maris incommoda patiuntur, peruenire festinet: an non in præclara eiusmodi uitæ disciplina, quod aliquis implorauerit, Dei nomē gloria laudeq; afficit? Quare qui his precum uerbis utitur, Sanctificetur nomen tuum: eorum, quæ commemorata sunt, uel ac sententia hæc ille exoptat atque precatur: utinam ego auxilii tui ope innocēs, bonus, pius, ac religiosus efficiar, ab omniq; impura rei actione abstineam, uera loquar, iustitiam colam, recta uia ambullem, sapientiæ prudentiæq; exornem insignibus. Hæc & talia continet breuis hæc petitionis ratio, quæ ad Deum

Deum his precum uerbis adhibetur; sanctificetur nomen tuum: nam Dei gloria in hominibus nō alio quidem modo prædicatur, nisi ut eorum uirtus per se tēstetur, cuncta bona a Dei potestate existere. Quæ uero sequitur deinceps oratio, illud sane deprecatur, ut præsto sit regnum Dei. An hoc flagitat, regem iam fieri eum, qui regni sui imperio uniuersa cōplectitur? perpetuoq; illum esse, qui est? quiue sibi cōstans est, neque unquam mutatur, a sese discedere, in omnemq; mutationem impelli? Quid igitur sibi uult hic precandi modus, quo expetitur regnum Dei? At ueram qui dem huius rei sententiam uideant ii, quibus ueritatis spiritus occulta aperit mysteria; nos uero hac ipsa de re ita sentimus; unam scilicet eam, quæ maxime excelsit, omnibusq; præstat; uim, suamq; potestatem, ac ueram potentiam, quæ in uniuerso mundo regnat, non aliquo tyrannico dominatu, nec metu, neque uicium, qui parere recusat, sibi subigere: quoniam omni metu liberam solutamq; esse uirtutem, nulloq; dominatu teneri decet: de bonoq; deligendo sponte fit deliberatio. uniuersi autem boni caput illud est, ut uitali salutariq; subiiciatur potestati. Itaque quoniam hominum ingenium in hac boni deligendi ratione est sæpe fraude, erroreq; circumuentum; in contrariamq; partem multum habuit momenti sæpe uoluntatis nostræ propensio; hominumq; uita rebus pessimis undiq; oppressa tenetur; cum mors sexcentis modis sit naturæ immixta, quandoquidē omne uitii genus quasi uia quædam existit, quæ ad mortem ducit. Quoniam igitur omni ex parte hac ipsa tyrannide circumuenti sumus; quasiq; carnifice aliquo a morte, hostiliq; perturbatio-
num impetu nos seruitutis uinculis illigati tenemur;

illud sane optimo iure precibus obsecramus, ut adueniat regnum Dei. non enim interitus uim & illam quidem pessimam aliter repellere possumus; nisi ea potestas, quæ uitalis est, in nobis uires recuperet. Itaque si regnum nobis Dei præsto esse precamur, hæc sane a Deo maxima precum ui contendimus, ut ab interitu eripiamur, a morte liberemur, a peccati uinculis soluiamur, ut ne amplius mortis ui imperioq; obstricti teneamur, nec uitii dominatio quidquam in nobis ualeat; nec a nostro aduersario superemur, nec ob peccatum captiui in seruitutem abducamur; sed adueniat regnum tuum; ut quarum perturbationum ui premimur, ea omnis in nihilum intereat: ut enim fumus, sic illæ euanescent, ut cera, sic ad nihilū recidant: neque enim fumus, qui altius fertur, ullum naturæ suæ uestigium reliquit: & cera quæ in ignem cōiecta est, utique euanescit: quin etiam ille sua ui cum flammam nutriet, in tenuemq; aerem ita conuersus est, ut fumi species nusquam appareat: sic cum in nos regnum Dei adueniet; cuncta tum, quæ in nobis dominantur, in nihilum occident. non enim lucis aduentū expectant tenebræ; non adueniente ualetudine, remanet morbus; animoq; sedato, a perturbationibusq; alieno nequicquam in eo efficiunt concitationes. irrita est mortis uis, nullusq; interitus, cum in nobis uita regnat, ac uis illa potest, quæ ab interitu uacat. Adueniat regnum tuum: suauis profecto uox, qua hæc a Deo plane rogamus; dissipetur instructa inimici acies; externa subsidia percant; pugna dirimatur, quæ carnis est acerrima contra spiritum; potestas uisq; regis mihi præsto sit, Angelorum manus, maxima recte gubernantium multitudo; & legiones mihi eorum subueniant, qui a
dextris

dextris tibi assident, ut multitudinis aduersæ legiones cadant. Multum potest aduersarius, remotoq; auxilio tuo, formidolosus est atque inexpugnabilis. at ex quo tempore destitutus est? posteaquam scilicet regnum tuum apparuit, tum mæstitia, dolor, & luctus refugit; proq; his ingressa est uita, pax, & gaudium. Aut fortasse; quemadmodum hæc nobis sententia a Domino apertius explicatur; is qui regnum Dei aduentare postulat, Sancti spiritus auxilium atque opem implorat. sic enim pro eo, quod est, Adueniat regnum tuum, in euangelio legitur, Adueniat Spiritus sanctus tuus, qui clarificet nos. Quid ad hæc dicunt ii, qui insolenter se iactant contra Spiritum sanctum? qua isti mente sunt, ut hanc regiam dignitatem in humilem abiectâq; transferunt seruitutem? nã quod Lucas Spiritum sanctum dixit, id ipsum Matthæus regnum nominauit. quo pacto spiritus naturam in eam, quæ subiecta est, diducunt; cum eam sane naturam, quæ regnat, in illa collocent, quæ subiecta pareat? creata natura seruit; seruitus regnum sane non est, sed sanctus quidem spiritus regnum est; si regnum, utique regnat, nõ regno subiicitur; si minus subiicitur, neque creata natura est. nã illud creatæ naturæ proprium est, ut seruiat. Ergo si spiritus regnat, quid est, quamobrem in ea natura, quæ subiecta paret, illum isti ponant, qui ne precari quidem unquam didicerunt? neque animaduertunt, quis sane ille sit, qui uiolata expiet, qui ue regni uim teneat. Adueniat, inquit, Spiritus sanctus, & clarificet nos. Ergo diuina & præcipua Sancti spiritus uis, atque actio in eo posita est, ut peccatorum labem eluat. non enim sane quod mundum est, atque ab omnibus sordibus purum, eo indiget, a quo expietur atque

abluatur. sed hoc quidem ipsum de unigenito etiam filio testatum reliquit his uerbis apostolus: Posteaquā expiationem peccatorum fecit, sedet ad dexteram maiestatis Dei. Itaque utriusque hoc munus est, tum Spiritus quidem, qui peccati maculam eluit, tum Iesu Christi, qui expiationem effecit; quorum utriusque actio est, eadēque est omnino potestas: actio enim omnis est potestatis uis, atque effectus. si igitur una est eorum potestas, quo pacto fiet, ut diuersa putetur illorum natura, in quibus nullam nec actionis nec potestatis dissimilitudinem reperimus? Vt enim cum duplex sit propria ignis natura, una quidem quæ lumen, altera, quæ calorem æque impartit; in hac ipsa duplici natura putare non possumus aliquam rei subiectæ mutationem fieri; sic si aliquis, qui ratione menteq; præditus est, e diuinis litteris unam & Iesu & Spiritus esse cognouit actionem, non in eam opinionem adducetur, ut diuersam aliquam ipsorum naturam arbitretur, quin etiam eorum, qui pie religioseque de Deo opinantur, sententiis ante demonstratum est, eandem cum in patre, tum in filio inesse naturam, neque fieri posse, ut quæ diuerso genere sint, Dei appellatione nominentur. quemadmodum neque architecti, opificisq; fundamentum est filius: neque aliquis ex iis, qui recte sapiunt, domum ab architecto ædificatam dixerit; sed cum naturæ coniunctionem & filii & patris ostendat appellatio; necesse utique est, duos natura una iunctos esse, neque inuicem inter se differre. Quare si in patre natura inest filius: a filiiq; natura ex iisdem actionibus cognitum est alienum non esse Spiritum sanctū, illud sane ex iis consequens est, ut cum sanctæ trinitatis una eademque demonstrata sit natura, tum neque, quæ

quæ in singulis personis præcipua spectatur proprietas, ea confusa sit, neque permutata inuicem sint notionis signa; ut in filium aut spiritum sit personæ patris translatum signū; aut filii rursus uni ex iis, quos diximus, sit accommodatum; aut patri filioq; attributa appareat Sancti spiritus proprietas. sed separata in illis proprietatibus consideratur distinctio. proprium est patris, ut non ab aliqua causa existat, id quod neque filii, neque spiritus proprium est: siquidem filius, ut sacræ scribunt litteræ, a patre uenit; spiritusq; & a patre & a filio proficiscitur. Sed quemadmodum sine causa esse solius patris cum sit, filio & spiritui conuenire non potest, sic contra esse ex causa, quod proprium est filii & Spiritus sancti, in patre considerari non potest, cum commune sit filio & Spiritui sancto, non esse ingenitos; ne aliqua in eo, de quo dicitur, cernatur cōfusio: rursus eorum distinctam proprietatibus differentiam ita inuenire licet; ut quod commune est, conseruetur; quod uero proprium, id nullo modo cōmune ac promiscuum fiat. Nam unigenitus filius a patre esse diuinis litteris dicitur, eiusque proprietas in eo consistit; quod is Dei uerbum nominatur. sanctum autem spiritum a patre dicunt, & a filio proficisci sacræ attestantur litteræ: quandoquidem qui a Christo spiritum procedere negat; hic sane ab eo alienus est. Qui igitur a Deo spiritus est, idem etiam Christi & spiritus. Filius uero, qui patris Dei est; is spiritus neque est, neque esse dicitur. non enim hæc argumentationis forma reciprocatur, ut æquali complexione uicissim conuertatur argumentum, ut si Christi spiritus dicitur, ita ipsius etiam spiritus nominetur Christus. Quare cum proprietas eiusmodi alterum ab altero aperte distincteq; secernat,

secernat, naturaq; cōmunis ex iisdem ostēdatur actio-
nibus; firmā sit pia de utriusque diuinitate opinio; ut
personarum numero trinitas existat, in diuersæq; na-
turæ partes non diuidatur. Quod cum ita omnino sit,
quæ illorum dementia est, qui Spiritum sanctum op-
pugnant? an fortasse hoc, adueniat, ad dignitatē im-
minuendam ualere opinantur? Deinde an non isti ma-
gnū Dauidem audiunt, qui patrem precibus ad se
uenire contendit, clamatq;: Veni, ut saluos facias
nos. ergo si patrem aduenire salutare est, quo modo,
ut spiritus adueniat, hoc ignominiosum est? si pecca-
tum expiare, id pro signo habent imminutæ dignita-
tis: tu audi perfidos Iudæos, qui peccata remittere, hoc
soliū Dei esse clamitant. Quid hic, inquiunt, loqui-
tur blasphemias? quis peccata potest remittere, nisi
soliū Deus? Ergo Deus si peccata remittit; si filius
mundi peccata tollit; si Spiritus sanctus peccata eorum
absterget, qui maculis illorum obsolescunt: quid ad
hæc dicent ii, qui uitam suam oppugnant? At in nos
adueniat, præstoq; nobis sit Spiritus sanctus, qui eluat
sordes nostras, atque idoneos efficiat nos, ut diuinas
illas & cælestes suscipiamus cogitationes, quæ precum
ope adhibita nobis ostenduntur uerbo Dei, cui gloria
potentia ue in sæcula sæculorum. Amen.

CONCIO IIII.



MEDICVM quendam audiui, qui de ua-
letudinis habitu naturaque erudite disse-
rebat: neque fortasse, quæ ille commemo-
rauit, sunt a recto animi nostri statu aliena.
nam elementa, ex quibus nos compacti sumus, cum
modum ac temperationem abiecerint; hoc ille affir-
mabat

mabat mali cuiusdam habitus initium causamque existere. contraque si quæ perturbata, ab ordine suo discesserunt, rursus ad naturalem redeunt temperationem; id asseuerabat omnis causæ morbum efficientis esse medicinam. Atque eam ob causam illud considerandum esse hic arbitrabatur, quæ maxime in nobis cum illa ordine perturbata sint, sua præpotenti uī infirmam efficient eam auxilii partem, quæ a contrario elemento ad tuendam ualetudinem confertur. Verbi causa, si calor superat; ut ea pars adiuuetur, quæ inferior est; quod ue calore exarescit, id humore perfundatur: ne materia cum sensim deficiat; caloris uis, quæ per se consumitur, omnino in se arescat, planeque restinguatur. parī ratione in reliquis, quæ in nobis contraria cernuntur; in iis quidem, quæ modum excedunt, ut illa superandi uis consistat; parti, quæ superatur, opem arte adhibita asferre debemus: ut rebus his ita constitutis, elementoque aliquo æqualem alterius portionem non impediēte, comoda corporis constituatur ualetudo; cum natura scilicet ex præpotenti uī non in uarietate inæquabili uersetur. Quorsum sane tam longe repetitum orationis exordium? fortasse nō a proposito remota est hæc præcepti ratio, neque longe disiuncta est ab eo argumento, quod nos primum suscepimus; nam ad contemplationem illud propositum est, quod orando dicimus, *Fiat uoluntas tua*. Quam uero ob causam huius, quod ad medicinam pertinet, præcepti mentionem fecerimus; ex iis, de quibus deinceps disputatio fiet, nos sane aperiemus. Genus humanum sana aliquando integraque mente fuit; utpote cum elementa quædam, hoc est animi motus æquabili inter se temperatione constarent, naturæ consensere rationi.

Sed

Sed postea quam appetendi uis uehementior esse cœpit, tum quæ in contrariis rebus cernitur affectio; nempe continentia, uicta est ac superata ab ea parte, quæ uiribus præstitit; cum nihil sane esset, quo immoderata reprimeretur uis illa appetitionis, qua homines ad res turpes, & ad ea, quæ minime decent, præcipientes trahuntur; quo factum est, ut perniciosa illa peccati pestis in naturam inuaserit hominum. Quare is, qui animi morbis uerum affert remedium: quiue in hac humana uita est ob ægros homines uersatus, cum morborum causas hac deprecandi ratione amoueat, in pristinam nos quidem mentis sanitatem restituit: mentis autem sanitas, rectus est quidem explendæ diuinæ uoluntatis quasi cursus; quemadmodum sane contra ab eo diuino cursu desistere, hoc ipsum animi morbus est, qui morte terminatur. Itaque quoniam optima uiuendi ratione in paradiso relicta, nos mente tum infirma facti sumus; cum illud scilicet contumaciæ uenenum copiose hausimus; eamque ob causam quoniam mortifera hac morbi ui est natura superata; uerus quidem medicus præsto fuit, qui malo contrariis remediis depulso, ut artis medicæ ratio præscribit; eos, qui in morbum inciderant propterea quod a Dei uoluntate se abduxerunt; rursus hos a morbo liberat, cum diuinæ sese uoluntati coniunxerint. Nam hæc precandi ratio est medicina peccati, cuius quasi morbo uexatur animus; quandoquidem qui animi dolore cruciatuque agitur, precando cū in hæc uerba erumpat; Fiat uoluntas tua: is omne illud prius uitæ genus, quod a Dei uoluntate abhorruit, necesse utique est accuset, cunctaq; hæc confitendo ita percurrat: Quoniam superiori uitæ meæ instituto propensa in contrarium

rium uoluntas me ad id impulit, ut male impureque egerim, sceleratoque tyranno operam nauauerim, inimicique sententiam quasi carnifex aliquis ego sum contra me ipse executus: id propterea cum huius tandem calamitatis meæ misericordia commouear, illud quaeso Domine, ut in me fiat uoluntas tua. nam ut in abditis obscurisque speluncis nullæ, introducto lumine, tenebræ sunt; sic si tua erit in me uoluntas; mala omnis & absurda illa quidem consilii deliberatio in nihilum plane recidet: siquidem effrenatam impotentis animi appetitionem temperantia reprimet; superbiam exhauriet humilis illa animi affectio; arrogantia morbo remedium afferet modestia; caritatisque & amoris uis infinitam repugnantiam malorum turbam ab animo repellet. hæc enim caritatis uirtus in me si inest, tum odium recedet, inuidia, ira, furor, animi impetus, insidiæ, simultas, iniuriarum memoria, ulciscendi libido, cordi sanguinis suffusio, sensus oculorum iniquus, & omnis denique eiusmodi malorum caterua amoris, caritatisque ui in nihilum plane occidit. Itaque actio illa, quæ in explenda diuina uoluntate uersatur, duplicem idolorum cultum reiicit, tum insaniam, scilicet falsæ idolorum superstitionis; tum auri argentiue cupiditatem, quæ prophetarum uocibus idola appellantur. Ergo fiat uoluntas tua, ut Diaboli uoluntas consiliumque restinguatur. Sed quare hoc precamur, ut Dei opæ optimum nobis sit animi propositum? quoniam posteaquam uitio debilitata est hominum natura, ad boni deligendi rationem satis imbecilla est. nam ut ad malum homo procliuius admodum est, non ita tamen facile rursus ad boni redit rationem: id quod in cor-

F poribus

poribus etiam intelligi ac percipi potest. Qui enim integra corporis ualitudine utitur; ut nullo sane negotio in morbum is incidit; non sic tamen qui morbo affectus est, ualitudinem facile recuperat. quandoquidem si quis nuper optima erat ualitudine, sæpe uel is minimo accepto uulnere in ultimum uitæ periculum uenit. sæpæque uel una febriculæ accessione, quæ statis certisque diebus fit, omnis reſtincta est uis corporis: uenenoque uel exiguo deguſtato, aut aliquis plane eneſtus eſt, aut parum ab hoc ipſo diſcrimine abſuit. factumq; sæpe eſt, ut ſerpentis morſum, aut aliquem uenenatæ beſtiæ ictum, aut prolapſionem, aut caſum, aut copioſiorem, ac natura capere poſſit, cibum, conſecuta ſit uel mors, uel grauis ægroſtatio. at uero morbum depellere, id uel difficillime excogitatis adhibitisque medicinae remediis fit, ſi modo etiam conſecri poſſit. Quare cum ad uitium noſtra præliis feratur appetitio, adiutor nullus nobis opus eſt, quoniam per ſe ſatis noſtræ uoluntatis inclinatione uitioſa perficitur actio. ſin autem ad id, quod fieri ſatius eſt, animi uoluntas propendet; hoc ipſo in genere operæ pretium eſt Deum inuocare, cuius ope auxilioque optimæ rei expleatur cupiditas. Quamobrem quoniam uoluntas tua, Domine, omnino mentis eſt ſanitas; ego uero cum carnis conſentiam ſenſibus, tum peccati ſim laqueis irretitus, id propterea uirtutis tuæ ope quaſo fac, ut optimæ huius uoluntatis munus ego recte exequar; hacque ratione iuſtitiam ac pietatem colam: a uitis que me omnino auocem. nam uno uoluntatis nomine uniuerſæ reliquæ generatim continentur uirtutes, ſingulæque res, quæ ad bonum referuntur, appellatione diuinæ intelliguntur.

uolun-

uoluntatis. At quid sibi uult horum uerborum addita mentū? Sicut in cælo & in terra. Fortasse Dominus ali quid sentire uidetur his uerbis, quod grauius est; quædamq; forte diuinæ mētis præcepta tradit, quæ naturæ creatæ contemplanda reliquit. Ego uero quod sentio, eiusmodi est. Natura creata illa quidem, quæ ratione prædita est, partim corporis expers, partim corpore cōstat. Angelorū quidem natura non corporis est astricta uinculis; alterius uero naturæ nos homines sumus. Natura igitur, quæ a corporis figura uacat; corporis scilicet illius, quod solidum est, quodq; suo pōdere in terram mouetur; illa quidem animo solo comprehenditur; cum ue sponte sua, & leui faciliq; mōtu in sublime feratur; in cælestibus uersatur domiciliis. Altera uero (quoniam corpora nostra terreni generis cognatione iunguntur) necessario est hanc sortita uitam, quæ e terra, quasi limi sorde faceq; cōstat. Hæc cum ita Dei consilio constituta sint; quo hæc eius uoluntas providentiæque spectet, haud equidem scio, an ad illud, ut omnem scilicet naturam creatam sibi conciliaret; quo neque terrena hæc nostra altitudinum cælestium; neque cælestis illa rerum terrenarum omnino expers esset: utque ex hac hominum fabrica utrumq; elemētum inter se societatem earum rerum iniret, quæ in uno atque altero inesse intelliguntur: cum & animus rationis particeps, quiue cælestium illarum mentium cognatione iunctus uidetur, terreni huius corporis domicilio utatur; & caro hæc, quæ e terræ limo concreta est, in cælestem illam tum migret animi sedem, cum omnium in integrum restitutio fiet. Nam, ut est apud Paulum, Rapiemur in nubibus obuiam Domino in aera, & sic semper cum Domino erimus. Quare siue

hoc quod diximus, siue aliud præter hoc prouisum sit sapientia Dei: omnis quidem natura, quæ ratione utitur, duplicem hunc uitæ cursum tenet; ut quæ corporis expers est natura, cælestem illam beatæ uitæ sit affecta rationem: quæ uero carnis est astricta uinculis, hæc quoniam terreni huius generis cognatione tenetur, in terris plane uersetur. Sed utrique tamen naturæ æqualiter boni honestique insita est attributaue cupiditas: paremque utrique tum summam liberi arbitrii potestatem, tum ab omni necessitate solutam uoluntatē is dedit, qui uniuerſi conditor est, ac moderator; ut libera quadam consilii deliberatione regatur & gubernetur id omne; quod ratione est menteque ornatum. Sed cælestis illa uita ab omni uitii labe pura est; neque in instituto uersatur earum rerum, quæ sibi repugnent; in hoc autem uitæ terrenæ genus motus omnis affectioque uitiosa undique iis rebus inuadit, quæ naturam maxime attingunt humanam. Idcirco cæleste illud sanctarum mentium uitæ institutum uitio carere, ab omnibusque peccatorum sordibus abhorrere diuinis est prodicium litteris. quæ uero cūque res a bono semel separata, mali naturam suscepit; ea res omnis quasi sæx quædam & sentina in communem hanc confluit uiuendi consuetudinem; ut homines illius sordibus inquinati diuinū ueritatis lumen, eiusmodi rerum sordidarum tenebris obscuratum, ipsi minus contueri possent. Quare si uita cælestis illa quidem ab affectionibus uitiosisque uacua est, integraque plane & incorrupta: hæc uero misera uita si calamitatibus uariisque perturbationum quasi fluctibus obruta est, illud certe ex hoc perspici atque intelligi licet, benigna Dei uoluntate fieri; ut illius uitæ cælestis,

stis ; quæ integerrima est ; actiones nos recte exequamur . Nam ubi malum non est, bonum utique sit oportet . Nostræ autem uitæ genus cum illorum bonorum semel usum amisit , a Dei etiam uoluntate tum plane defecit . Quamobrem hac precandi ratione ad illud erudimur ; ut uitæ nostræ uitiorū sordes sic eluamus, ut in nobis ita propèsa Dei uoluntas libere ostendatur, qualis in cælestibus illis mentibus sane apparet . Verbi causa si quis dixerit ; quemadmodum in thronis, principatibus, potestatibus, dominationibus, in omni que cælesti exercitu uolūtatis tuæ, Domine, actio apparet ; quoniam malum nullum impedit, quo minus bene ab iis agatur ; ita perfecta etiam in nobis sit ratio boni, ut omni uitio sublato, ea recte in mentem nobis ueniant, quæcunque tu a nobis fieri uis . At aliquis quasi aduersarius obiiciet : quo pacto fieri potest, ut qui e carne & sanguine effecti huius uitæ usura fruantur, illam perfectæ uitæ integritatem præstare possint, quæ in diuinis mentibus corpore carentibus elucet, cum præsertim infinitis curis, quæ ad necessarios uitæ usus pertinent, mens hominum depressa iaceat ? Iccirco quod ad propositam quæstionem difficile uidebatur, id ipsum, utpote cum omnem plane dubitationem tollat, aperiri explicarique iis uerbis opinor, quæ sequuntur . Nam quod panem Dominus quotidianum nos petere iubet, illud omnino nobis præscribi censeo ; ut téperantia, animique moderatio, recta adhibita ratione, cum illa natura adæquetur, cui nihil omnino deest . nō enim precibus illud Angelus a Deo petit, ut sibi cibus suppeditetur, quia naturam ille affectus est eam, quæ rei eiusmodi non indiget . Homo autem panem petere iubetur, quoniam quod exhaustum

stum est, illius rei eget, quæ omnino referciat. Nam humanæ uitæ status caducus est, recreeturque necesse est; cum pro eo quod consumptum est, illud omnino expetat, cuius uis sane reficiat. itaque qui ad naturæ usum spectat, neque inanibus curis ad ea distrahitur, quæ minime necessaria sunt; non multis quidem partibus hic Angelorum uitæ rationi inferior erit; cum copiam illorum, qui nulla amplius re indigent; parsimonia sua assequatur. Quare cum ad Deum ita loquimur: panem da; iubemur id nos solum petere, quod ad corporis naturam tuendam satis est; non delicias, non opes, non conchyliatas uestes floribus intextas, non ornatum aliquem auro insignem; non pretiosorum lapidum fulgores, non uasa argento celata, non ampla prædia, non legionum imperium, non ciuitatum aut gentium principatum, non equorum bouumque armata, reliquie pecoris magnam uim, non seruorum numerum, non forensē splendorem, non columnas, non signa, non peristromata, non muscos cantus, nec quidquam denique aliud eiusmodi; cuius ui a rerum diuinarum cura, quæ longe omnium princeps esse debet, abstrahatur animus: sed panem petere iubemur. Vide quam late pateat hæc philosophandi ratio, quamue multa præcepta hac uel exigua uoce comprehendantur? quasi iis, qui ratione intelligētiæque præditi sunt, aperte ita loquatur. Desinite, Homines, rerū inanium cupiditatibus distineri; desinite laborum molestiarumque materiam, occasionemque uobis ipsis augere. Exiguum sanè est, quod naturæ debetis; cibum scilicet debetis carunculæ uestre: quæ res tum modica est, tum facile cōparatur, si naturæ necessitas spectatur. Quid igitur est, cur grauiora, pluraq; multo uobis onera imponitis?

ponitis? Quam ob causam tot tantisque obligationum uinculis uos astrictos ostenditis? qui argentum effoditis? qui fodinas quaritis? qui fulgentis auri uestigia indagatis? ut iis scilicet inuentis uenter, qui est perpetua rerum hirudo, deliciis circumsuat? Huic tamen dumtaxat panis debetur, quo corporis expletur necessitas. At tu ad Indos proficisceris; barbarici te maris periculo committis; quotannis nauigas, ut rebus inde importatis condimenta tibi cōpares; neque consideras; suauem illum cibi gustatū non transire palati fines. Eodemque modo quod aspectu, quod odore, quod oris specie suaue est; hoc eam sensui præbet uoluptatem, quæ uel breuissima est, ac de repente interitura. Ultra autem palati fines indistincta est earum rerum, quas comedimus, differentia; cum eas omnes naturæ uis in foetorem commutet. Vides obsoniorū condimenta quo spectent, uides qui sit finis illis propositus, quorum animus est in patinis. Tu panem pete propter usus uitæ necessarios. hic enim corporis necessitati lege naturæ debetur. cetera uero, quæ præter hunc delicatorem hominum uoluptatibus inuenta sunt; ea ad zizaniorum semen pertinent. patrisfamilias semen frumentum est, ex frumento panis conficitur. zizania autem deliciae sunt: zizahiorum semina iuxta frumentum inimicus sparsit. At uero homines cum rerum necessariorum munus ipsi naturæ præstare omnino negligant, hi re uera, ut quodam loco euangelii litteris proditum est, suffocantur inanium rerum libidinibus, nullumque fructum utique pariunt, cum in illis ipsis perpetuo eorum sit occupatus animus. Fortasse aliquid etiam eiusmodi Moses, quibusdam uerborum inuolucris, de ea uoluptate, quæ gustatu capitur,

tur, dicere uidetur, cum Euæ consiliarium atque administrum serpētem fuisse scribat. Nam hanc bestiam, nempe serpentem, eiusmodi esse ferūt, ut si in hiatum, quo irrepit, caput coniecerit; a posteriori parte is non facile ab iis retrahatur, qui hoc ipsum conantur, quoniam contraria squamarum uis, illorum conatui resistit, qui in contrariam partem eum extrahere nituntur. Qui igitur ab anteriori parte squamis leuiter facileq; labentibus, nullo negotio explicatur, hic a posteriori parte difficilis est, qui retrahatur, utpote cum aduersa squamarum uis repugnet. Huius rei narratio, illud opinor, demonstrat uoluptatem fugiendam esse, quæ ingreditur sensimq; irrepit in cōsentientem rationi animum, uitæq; rimas, quam maxime fieri potest, oppilari oportere. ita enim humanæ uitæ ratio a bestiarum consuetudine purā integramq; se conseruabit. si autem aliquem in nos aditum uiamq; inueniet, tū dissoluta ea uitæ nostræ consuetudine, quæ rationis consensu uincta tenetur, ille uoluptatis serpens in uitæ commissuris latitabit, uixq; squamis repugnantibus, e mentis latebris extrahetur. Squamas porro cum audis, occulta quadam significatione tu interpretare multiplicem uoluptatum materiam atque occasionem. nā communi nomine una bestia est uoluptatis affectus: sed diuersa sunt, uariaq; uoluptatum genera, quæ uitæ humanæ sensibus inhaerent: quoniam serpentis squamæ hæ uoluptates sunt, quæ uariis affectibus quasi maculis distinctæ sunt. Itaque si bestię huius contubernium fugis, tu caue caput, hoc est primum uitii maliq; impetum: ad hoc enim illius, quod a Domino præceptū est, significatio refertur. Ipse enim, inquit, obseruabit calcaneum tuum, tu obserua caput eius. Ne patefacias igitur

igitur serpenti aditum, ut in interiores partes irrepat, uolubiliq; illo corporis sui motu incitatus intro feratur. Permane in usu uitæ necessario, uiuendi cura ea tibi proposita sit, ut rebus quibusuis usus uitæ tuæ necessarius expleatur. sin autem tecum quoque Eux consiliarius de eo differit, quod uel aspectu iucundum, uel gustatu suaue est, tuq; præter panem obsonium eiusmodi, quod his sit condimentis instructum, quæris, iisq; rebus, quæ necessitatis finibus non cōcluduntur, te ad appetendum incitas; tum postea plane senties, serpentem hunc eo sensim irrepere, ut plus ipse appetas. Cum a cibis enim ad uitæ usum pertinentibus semel sese ad edacitatem contulerit, ad id quoque quod aspectu iucundum, paulatim manat. nempe cum tu uasa magnifica quæras, delicata mancipia, lectos argenteos, stragula mollia, splendida, auroq; intexta integumenta, solia excelsa, tripodas, balnea, crateras, rhyta, uasa ad refrigerandi usum comparata, poculorum ministros, candelabra, acerras, atque alia eiusmodi requiras, e quibus illa plus habēdi cupiditas ingeneratur. nam ut eiusmodi rebus comparādis neque quidquā desit, iis quidem uestigalibus opus est, quibus ea parētur, quæ nos plane expetimus. Quare hunc atque illum flere, eumq; contubernalem deplorare; multorumq; misericordia commoueri oportet, qui suamittunt, ut illis lacrymis magnificus hic mensæ apparatus splendescat. Cum autem serpens his etiā sese applicauerit, uentremq; iis rebus expleuerit, quæ appetitui consentiunt: satietate iam ipse affectus ad libidinis rabiem quandam serpendo delabitur. Hoc uero est postremum malorum omnium, quæ hominibus accidunt. Itaq; ut ne eiusmodi res aliqua eueniat, precan-

di rationem tibi præscribit facultate panis ; quippe cū obsonium illud tibi proponat , quod natura ipsa ad usum tuum comparatum est : aliquid autem eiusmodi est recta mentis conscientia , cuius optimarum cogitationum habitus est quasi panis condimentum . sin autem gulæ etiam sensum delectare uis , condimento tibi sit fames ac sitis ; ne satietatem satietati addas , ne ue crapula appetitus uim remittas ; sed ante quam cibum capias , fac in Dei mandatis aliquem sudorem laboremq; ponas : In sudore , inquit , & labore uesceris pane tuo . Vides quæ prima sit Domini condicio . sat est enim tibi , ut ulque ad eum usum tu mente occuperis : quin etiam ne ad illum quidem usque panis quærendi curis animum tuum astringas : sed ad eum , qui e terra panem gignit , qui ceruôs pascit , qui omnibus animantibus alimēta præbet , qui manum operit , omneq; animal benedictione replet ; ad hunc ipsum , inquam ; tu hac oratione utere . A te mihi uita est , quæso a te etiam mihi uitæ subsidium contingat ; tu da panem , hoc est , ut honestis ego laboribus cibum mihi comparem . Nam si Deus iustitia est , non panem ab illo is consequitur , qui auaritiæ studio alimenta sibi parat . Tu assequeris , quod maxime optas , si ex alienis rebus non opes ; si ex aliorum lamentationibus non uestigalia comparabis ; si satietate tua nemo esurit ; si tuis rerum copiis nemo ingemiscit . Dei panis eiusmodi est , ut iustitia fructus sit , pacis spica non ullis permixta aut inquinata zizanii seminibus . sin autem aliena prædia colis , ob oculosq; iniquitatem tibi ponis , tabulisq; stipulationum confectis , quod iniuria tibi parasti , id firmum ratumq; sit . si Deum alloqueris , ut panem tibi det , non Deus quidem , sed alius est certe , qui uocem
tuam

tuam exaudit. nam quæ contraria est Deo, natura iniquitatis fructum parit. Qui iustitiam colit, hic a Deo panem accipit: qui uero iniquitati studet, is alitur ab eo, qui omnis est iniquitatis auctor. Itaque qui conscientia suæ rationem habet, a Deo hic panem precatur; quoniam illud intelligit, nihil cum Beliale Christum habere commune. Si igitur ex rebus male partis munus aliquod defers, canis est remuneratio: donūq; eiusmodi, qualis est meretricis merces. siq; præ ambitionis studio uel magnificētissima dona tribueris, prophetam ipse audies, qui rerum eiusmodi munera his uerbis detestatur; Quo mihi multitudinē uictimarum uestrarum, dicit Dominus? plenus sum: holocausta arietum, & adipem pinguium, & sanguinem uitulorum & agnorum & hircorum nolui. Incensum, inquit, mihi abominatio est. Alio loco qui uitulum immolat, eum perinde habet, atque illum, qui canem maculat. Quare si a Deo panem habes, hoc est ex iustis laboribus; tu potes ei quoq; primos iustitiæ fructus deferre. Atque recte quidem addita est dictio hodie; Panem enim, inquit, substantialem da nobis hodie. ad aliud philosophiæ genus spectat hæc oratio, ut ex iis scilicet, quæ dicis, ipse cognoscas ad diem unum hominis uitam permanere. quod adest, quodq; præsens est, id solum cuiusque est propriū, spes uero rei futuræ incerta est; nos enim ignoramus, quid posterus afferat dies. Quid est, cur de rebus incertis solliciti sumus? cur rerum futurarum curis angimur? Sat est, ait, dici malitia sua. Malitiam appellat molestiarum laborem. Quid est, cur posteri diei molestiis afficimur? eamq; ob causam, cum hodie dicat, quæ cras futura sunt, ea nos curare prohibet; quasi hac una dictione te ita allo-

quatur, qui diei tempus tibi dat, is etiam ea tribuet, quæ postero die sunt necessaria. Quis in causa est, ut sol exoriat? quis noctis tenebras in lucem reuocat? quis ad usum tuum luminis splendorem effundit? quis cælum ambit, ut in terris lux appareat? Qui hæc tibi, tamque multa tribuit, is ne auxilii tui indiget, ut ad uitæ tuæ usum id largiatur, quod illius necessitas postulat: quid in uita sua studii bestiarum natura ponit? quæ coruorum prædia? quæ aquilarum horrea? An non diuina uoluntate, quæ cuncta complectitur; uictus omnibus tribuitur? Atque bos quidem, aut asinus, aut aliud aliquod animal, quod ratione caret, sua natura cum aliquam sui cognitionem habeat, ad id, quod præsens est, se accommodat, nihilque omnino ea curans, quæ deinceps futura sunt: At nos aliorum consilio indigemus, ut uitam hanc, quæ e carne concreta est, cognoscamus. interituram; ad unumque diem esse permanfuram. An non alienis casibus admonemur? an non nostræ uitæ exemplis emendamur? quam utilitatem maxime diuitiarum copiarum illi diuiti homini attulerunt, qui insana quadam spe cum teneatur, ædificat, demolitur, colligit, ac uoluptatibus perfruitur? qui præ uana quadam fiducia longos annorum circuitus horreis concludit? an non una nox spem illam omnem inanem sustulit, tanquam illa fuerit falsa quædam rei inanis species in somniis oblata? Vita hæc, quæ his corporis est stricta sensibus, instantis solum est temporis particeps. quæ uero in spe nobis proposita est, illa est animi propria. sed in utriusque uitæ usu hominum mens peccat, cum eam quidem, quæ corporis uita est, spe longius producat; illam uero, quæ ad animū pertinet, ad rerum præsentium traducat uoluptatem.

Quam

Quamobrem a spe, quæ certa est ac firmissima, necessario sese auertit animus ob eam spem, quæ in aliqua rerum specie ostenditur. nam cum earum rerum, quæ nullam consistendi uim habent, spe nitatur; neq; hoc, neque illud assequitur. Itaque hoc nos præcepto doceamur, tum quid hodie, tum quid in posterum petendum est. panis, qui ad quotidianum usum pertinet, eius, quæ speratur, beatæ uitæ regnum est. cum autem panem dicat, omnia quidem comprehendit, quæ corporis necessitati debentur. Quare si hæc petimus, illud supplicis hominis menti perspicuum sit, in rebus caducis, ad diemq; permanētibus se uersari. Sin autem ea, quæ ad animi bona pertinent, postulamus, hæc petitio ad illa spectat, quæ perpetua sunt ac sempiterna; ad quas quidem res dominus eum contueri iubet, qui precatur, ut una cum iis, quæ maiora sunt, rerum minorū usus nobis recte cōtingat. Perite enim, inquit, regnum & iustitiam: & hæc omnia adiicientur uobis auctore Iesu Christo Domino nostro, cui gloria in perpetuum. Amen.

CONCIO V.



Ad summam ipsam uirtutem progressa iam est oratio, cum precum atque obsecrationis ipsius uerbis ostendat, qualem eum esse uelit, qui supplex ad Deum confugit. Non amplius fere is naturæ humanæ finibus contineri uideatur, sed Dei similis ob uirtutem ita factus est, ut alius hic in eo esse uideatur, quoniam eadem agit, quæ agere Dei solius est. Nam propria Dei ac præcipua res est peccatorum remissio; quandoquidem demonstratum est, crimina peccata uel Deum solum condonare posse, præterea

præterea neminem. Quare si in suo aliquis uitæ instituto sibi diuinæ naturæ ad imitandum exempla proponet, hic certo quodam genere ille efficitur, cuius similitudinem diligenti quadam imitatione expressit. Itaque quid nos petere docet Dominus? primum ut cum ab iis rebus, quæ in hac uita aguntur, ad Dei similitudinem prope accesserimus, ueniam nobis peccatorum postulemus, tumq; Deum patrem nostrum appellare ne dubitemus; illudq; petamus, ut quæ aliquando admisimus, peccata obliuione obruantur perpetua; quasi qui petit, is minime assequi possit, quæ expetit; sed libera petitionis facultas sibi cõceditur. Etenim hæc nobiscum Dominus his uerbis plane differit. Qui ad illum accedit, qui de aliis optime meritus est, is etiam studeat de aliis bene mereri; qui ad eum, qui bonus est, sit etiam ipse bonus; qui ad iustum, iustus; qui ad lenem, lenis; qui ad illum qui clemens est, sit etiam ipse clemens, & humanus: eodemq; modo in ceteris omnibus, ut qui ad eum accedit, qui optimus est & æquissimus, qui uel bona sua communicat, omniumq; miseretur. hæc atque alia id genus, quæ in Deo considerantur, cum aliquis mente lustrauerit, hoc pacto liberam sibi precandi uiam patefacit. Itaque ut malus aliquis cum eo, qui bonus est, familiaritate coniungi nullo modo potest; neque is, qui impuris cogitationum sordibus obsolescit, societatem inire cum illo potest, qui ab omni labe purus est, atque plane integer: ita precantis hominis crudelitas eiusmodi est, ut Dei a se clementiam seiungat. Ergo si quis acerbitate in eum utitur, qui nexu aliquo sibi est obligatus, hoc pacto Dei clementiam hic a se alienat. Quæ enim humanitatis cum crudelitate societas? quæ benignitatis cum acerbitate

acerbitate coniunctio? ac reliqua, quæcunque ex contrario malis rebus opposita intelliguntur, hæc inter se ita repugnant, ut cohærere nullo pacto queant: sique harum rerum uni aliquis adhæserit, a re contraria utiq; disiungatur necesse est. Nam ut ille, qui mortem obiit, in uiuis esse non potest; quiue uita fruitur, est ab interitu alienus; sic qui ad Dei benignitatem cõfugit, ab omni crudelitatis genere eum plane uacuum esse oportet. Qui uero ab omnibus iis rebus, quæ uitii nomine intelliguntur, totum omnino sese auertit; is hoc habitu comparato Deus quodammodo efficitur; cum eas in se perfecti officii partes expleat, quas in Dei natura mens ipsa contemplatur. Vides ad quem altitudinis gradum precum oratione adhibita Dominus eos prouehat qui sibi audientes sint; cum scilicet eorum hominum naturam in eam plane mutet, quæ diuina est: Deosque illos fieri statuatur, qui ad Deum ipsum accedunt. Quid est, inquit, cur, ut uulgus seruorum solet; metu perculsus, & cõscientiæ tuæ stimulis uexatus Deo supplicas? cur in te liberam illam orationis uim contines, quæ animi tui libertati inest, quæue naturæ ab initio attributa est? cur uerbis adularis ei, qui assentationibus se decipi non finit? cur adulationibus & blanditiis plenam orationem ad etiam habes, qui opera factaque intuetur? integrum est tibi ac liberum, quodcunque a Deo commodum est, id omne animo ingenuo accipere. Tu sis de te ipso iudex, teque salutaris sententiâ absolue. Cupis a Deo delicta tibi condonari; tu ceteris condona. Deusq; iam sententiam tulit: quod enim cunque iudicium, quod ad te pertineat, de proximo fereris; ea de te feretur sententia. quæ uero in te statuis, eadem Dei iudicio rata tibi ac firma fient. At qua ratione

ratione continget, ut pro dignitate satis diuinæ uocis explicaretur magnitudo; cum id, quod mente comprehenditur, eiusmodi sit, ut oratione exprimi nullo plane modo possit. Dimitte nobis debita nostra, quemadmodum & nos dimittimus debitoribus nostris. Nam quod hoc ipso de genere mihi in mentē uenit; nullius prudentiæ est id ipsum mente contemplari; imprudentius autē multo est, huiusmodi mentis sensum oratione exponere. Quid enim illud, quod dicitur; ut recte agē tibus Deus ad imitationē propitius est (id quod Paulus his uerbis indicat; Imitatores mei estote, quēadmodum ego Christi) sic contra uult uoluntatis tuæ propositum Deo ad bonum exēplo esse: ordinisq; ratio quodam modo reciprocatur; quasi nos dicere audeamus; quemadmodum boni imitatione proposita bonum affecturi sumus: ita speremus fore, ut Deus facta nostra imitetur, cum aliquid, quod bonum sit, nos perfecerimus; quasi tu quoque Deum ita alloquaris: Quod ego feci, tu quoque effice: imitareque seruū tuum tu, qui Dominus es: tuque qui potestate tua omnia tenes, imitare pauperem atque egenum: Ego remisi debita, ne tu quidem exigas. Supplicē ego nō repuli, ne tu quidem supplicantem reiicias: meum debitorem a me hilarem dimisi, talis etiam tuus existat; ne scilicet efficias, ut debitor tuus tristior sit, quam meus: pares ambo gratias creditoribus agant: æqualis ab utroque remissio decernatur debitoribus & meo & tuo. meus debitor ille est, ego tuus: qua ego in illum uoluntate fui; eandem etiam tu mihi præsta: ego solui, tu solue: remisi, remitte: ego proximo contribulique meo misericordem admodum me ostendi: tu qui natura clemens es, eandem imitare clementiam. Sed illud ego fateor, quæ

quæ in te peccaui, grauiora illa quidē esse, quam quæ contra me ille admisit: hocq; tecū reputa, quanto ipse omni uirtutum genere præstas, tanto æquius est, peccantibus eam a te tribui ueniam, quæ præstantissimæ uirtuti tuæ maxime conueniat. Ego humanitatem meam exigua illam quidem ostendi; quoniam non sane amplius a me naturæ ratio postulabat. tu uero nō impediris, quo minus uel benignitatis, uel amplæ liberalitatis tantum quidem præstare possis, quantum certe uis. Sed nos diligentius accuratiusque consideremus illam, quæ a nobis proposita est, precandi rationem, ut ex sententiarum indagatione aditus nobis aliquis fiat ad cælestis uitæ disciplinā. Itaque inuestigemus primum, quæ debita ea sint, quæ hominum genus præstare debeat: queue contra illa, quæ in potestate nostra sita sunt, ut ea scilicet condonemus. Nam his diligenter indagatis, diuinorum bonorum, quæ maxime præstant, aliqua dabitur nobis cognitio. Quare nos inde initium faciamus, ut ea primum commemoremus, quæ a mortalibus sunt contra Deum commissa: Poena igitur prima, quæ Deo ab homine debetur, est; quoniam cum naturalem Dominum fugerit atque deseruerit, ad aduersarium ab eo desciiuit, qui suus Dominus est ac fabricator. Deinde quia liberam sui potestatem, uoluntatemque cum scelerata peccati seruitute commutauit, a Deique cultu refugit, ut perniciosa tyrannicaq; potestate teneretur: immo uero quoniā conditoris sui pulchritudinem neglexit, ad peccandūque conuersus, faciē peccati sordibus deturpauit; huicque sceleri illud proximum iudicatum est, tum quod diuina bona contempsit, tum quod scelerati aduersarii escam anteposuit; in quo uitii genere id numerabitur;

H quod

quod & Dei imaginem obscurauit, & diuinum illud signum corruptit, quod uel in ipsa hominis origine est nobis impressum? quod & drachmam amisit, & a patris mensa recessit, & more porcorum ad lutulentū uitæ genus accessit, & pecuniis expetendis se corrumpendum dedit: atque alia quæcunque id genus peccata, quæ uel e sacris litteris, uel contemplationibus cognoscere licet; hæc omnia quæ orationis uis explicaret? Itaque quoniam hominum genus tot tantisque sceleribus se se obstrinxit, quorum scelerum poenas Deo luere debet; iccirco his precum orationisque præceptis Dominum nos ad id erudire arbitror, ut in Dei colloquio nos quasi integra castaque mente simus, nullam omnino orationis libertatem adhibeamus; etiam si quis ab hominum uitiiis sit uel maxime alienus. Nam fortasse aliquis, qui, ut adolescens ille diues, uitæ suæ usum optimis præceptis conformauit, aliquid eiusmodi habet, ut suæ uitæ disciplina gloriari possit; Deum ita alloquitur: Hæc omnia ab adolescentia mea seruauit. & quoniam hic sibi persuasit, nullum plane Dei præceptum uiolasse, non admodum sibi conuenire putat, ut debitorum remissionē deprecetur; quasi hoc ab iis dumtaxat fieri oporteat, qui peccatis astricti sunt; huiusmodique deprecandi rationem ei conuenire affirmat, qui sceleris labe obsolescit; uel qui nimio avaritiæ studio tenetur, hunc ait ueniam deprecari oportere; uel iis denique, qui alicuius uitii sordibus puram mentis inquinarunt conscientiam, omnibus his putat belle commodeque euenire, ut ad misericordiam confugiant. Sin autē Elias ille preclarus est, aut is, qui spiritu uirtuteque Eliæ in natis mulierum magnus; aut Petrus, aut Paulus, aut aliquis denique ex iis, de quibus optime

me testantur sacra litteræ; cur is, qui nullis peccatorum laqueis irretitur, eiusmodi utitur uoce, qua petit se a debitorum nexu eximi? sed ne quispiam, qui hæc non animaduertit, insolenter loquatur, sicut pharisæus ille, qui ne suam quidem naturam agnoscebat: quandoquidem, si considerasset, se hominem esse; illud certe e diuinis litteris cognouisset, hominis scilicet naturam a peccati sordibus minime puram esse: cum in illis scriptum sit; qui sine peccati labe uel unum diem uitam ducat, in hominibus inueniri posse neminem. Quare qui supplex ad Deum confugit, non eo sane animo hic esse debet, ut bene facta sua consideret, sed communia naturæ humanæ malefacta reminiscatur; quorum ipse aliquam etiam partem tenet, cum illius quoque naturæ sit particeps; ideoque hic Deum iudicem roget, ut illorum delictorum obliuiscatur, ueniamque tribuat; quasi in nobis hæc naturæ humanæ uis tamdiu uigeat, quoad singuli nos omnes homines nostram cernimus naturam, quæ pelliceo hoc amictu, caducisque huius uitæ foliis induta sit; quorum tegumenta, splendidis nostris indumentis abiectis, male nos ea induimus; quippe cum pro diuino illo amictu nos deliciis, gloria, honoribus uel ad unum diem manentibus, fluxisque huius uitæ rerum copis, quasi quibusdam simus indumentis amicti; ac dum etiam hanc perniciosam spectamus regionem, cuius incolendi poena damnati sumus: Cum ad orientem nos conuertimus; non quod eo loci dumtaxat Deum contemplemur; quoniā qui ubique est, quiue res uniuersas æque complectitur, is in nullis partibus separatim præcipueque comprehenditur: sed quia nostra patria in oriente est, eam dico, cuius sedes in paradiso est, e quaue nos eiectioni sumus: plantauit

enim Deus paradysum in Eden ad orientem . Itaque cum nos ad orientem contuemur, memoriaque repetimus quemadmodum ex illustri beatæ uitæ domicilio expulsi sumus ; iure ac merito eiusmodi orationis uerba proferimus nos, qui tanquam ficulneis huius uitæ umbris obtegimur ; qui a conspectu Dei depulsi, ad serpentem transfugimus, ad eum scilicet, qui terra uescitur, qui humi serpit, qui pedibus, uentreque graditur; ac nobis suadet, ut eadem faciamus, nempe ut rebus terrenis oblectemur, ut ad humiles, abiectasque cogitationes animum nostrum adiiciamus, ut uentre gradiamur, hoc est, ut huius uitæ uoluptates conlectemur . Itaque cum in iis uersemur, faciamus nos, ut prodigus ille, qui post diurnam calamitatem, quam porcis pascendis sustinuit, ad se rediit : ita cum ad nos ipsi redimus, de patreque cælesti mente cogitamus, his orationis uerbis recte utimur; Dimitte nobis debita nostra; ut si Moses etiã quispiam sit, uel Samuel, uel alius aliquis qui uirtute excellat; tamẽ quatenus homo est, ille arbitretur hanc precandi rationem sibi conuenire; quoniam cum Adamo qui naturam communicat, is una item cū illo ciectus atque expulsus est. Cum enim (inquit apostolus) in Adamo omnes moriamur, eum precandi modum, qui ob pœnitentiam Adamo conueniens est, adhibere omnes debent, qui una cum eo decessere : ut delictorum uenia nobis data, rursus, inquit Apostolus, per gratiam nos a Domino seruemur . Sed hæc ita dicta sint, ut qui communiorem orandi modum animaduertit, id contempletur, quod sibi propositum est. Sin autem aliquis ueram orationis sententiam inuestigat, non ad communem quidem naturam mentem adiungere cum oportere arbitror. nam quæ

quæ in uita quisque admisit, ut horum peccatorum necessario ueniam a Deo imploret, conscientia satis est. etenim cum in hoc uitæ curriculo uaria illa quidem ac multiplex sit nostræ uitæ actio, tum ea, quæ in mente uersatur; tum illa quæ corporis est consentanea sensibus; difficile equidem, uel potius omnium difficillimum factu esse arbitror, ut ad peccandum non aliquo quis affectu impellatur. Verbi causa cum uita hæc uoluptaria, quæ e corpore constat, sensibus nostris diuerse trahatur, cumque altera, quæ animi est, & in mentis impetu, & in cōsiliī agitatione uersetur; quotusquisque est, qui magna, atque adeo excelsa mente præditus, in utroque uitæ genere nullis uitii sordibus obsolescat? quis oculorum sensu non peccat? quis quod ad auditum attinet, innocens est? quis ab ea, quæ propria pecudū est, uentris uoluptate abhorret? quis tactu ita purus est, ut a peccati culpa omnino uacet? quis occultas sacrarum litterarum significationes non intelligit, quibus demonstratur per fenestras ingressam esse mortem? Sensus enim, quorum ope cum ad res externas animus progrediatur; ea quæ sibi grata sunt, arripit; hos sacræ litteræ fenestras appellant, quibus quidem fenestris aditum uiamque morti patefieri Dominus ostendit. re enim uera ad multiplex mortis genus aditum sæpe facit oculus; qui si aut iratum hominem cernit, in eādē is perturbationē incitatur; aut eum uidet, qui secundiore, quam par est, rerum successu utitur, inuidia ardet; aut aliquem intuetur superbia elatum, odio item afficitur; aut aliquam optimi coloris speciem, aut conuenientem oris formam aspicit, totus etiam ad id, quod sibi placuerit, cōcupiscendum sese effundit. Morti fenestras aperiunt aures, quarum sensus multas in ani-

animum affectiones transmittit, inuidiam, dolorem, iram, uoluptatē, appetitionem, cachinnos, atque alia id genus. Quæ uero e gustatu capitur uoluptas, ea omnium malorum quædam mater est. quis enim non intelligit uentris gulæque studium esse prope omnium, quæcunque in uita admittuntur, peccatorum radicem? quandoquidem ab hoc ipso studio delicæ, ebrietas, uentris gulæque uitium, profusus uitæ modus, expleta saturataque epulis appetitio, comestationes, ferini atque absurdi ad turpissima uitia manant impetus. Tangendi item sensus omnium est peccatorum extremum. quæ enim cunque ad corporis uoluntatem delicati uoluptarii; expetunt homines, omnia morbi sunt eiusmodi, qui tactu con trahuntur; quos quidem sigillatim commemorare tum longum sane est; tum minime decorum grauioribus sermonibus ea permiscere, quæ ab hoc tangendi sensu crimina existunt. Quæ autem animo menteque peccata concipiuntur, illa quidem cū innumerabilia sint, quæ orationis copia explicaret? ex intimis enim animi partibus, inquit Salomō, improbæ emanant cogitationes; illasque commemorauit, quarum sordibus nos inquinamur. Quare si undique & ab omnibus sensibus & intimis animi motibus sunt nobis obiecta peccatorum retia; quis, ut in Sapientiæ libro scriptum est, gloriabitur se purum habere cor? quotusquisque est, qui sit a sordibus alienus? id quod etiam Iob testatum reliquit. integri purique animi sordes sunt in uoluptate: quæ cum in corpore, animo, cogitationibus, sensibus, cōsiliū deliberationibus, corporisq; actionibus uersetur; multis uariisq; modis illa in hominum uita implicata insidet. ergo quis ab harum sordium labe puro integroq; est animo? quis non
animi

animi elatione percussus, superbix quasi pede premittitur? quem peccatrix manus non concussit? cuius pes ad nequitiam non cucurrit? quem immoderatus oculorum sensus non inquinavit? & aurium stoliditas non foedavit? quisue gustatus uoluptate irretitus non est? cuiusue animus inanium est agitationum expertus? Itaque quoniam hæc in nobis peiora sunt atque atrociora, quàm illa, quæ belluarum magis attingunt naturam; omnis plane peccatorum societas est cum iis omnibus, qui eiusdem sunt naturæ participes: iccirco cum ad Deum supplices accedimus, debita nobis condonari rogamus. Sed uox eiusmodi irrita est, atque inanis, nec ad Dei aures peruenit; nisi illud nobiscum conscientia clamitet, rectum esse in alios misericordia uti. nam qui Deo benignitatem misericordiamque conuenire arbitratur, nisi ita putaret, non illud quidem ab eo rogaret, ut rem ille susceperet, quæ minime deceret, minusque conueniret. æquum enim est, se factis illam præstare, quã de honesto præ se fert opinionem; ut à uero iudice nequid audiat eiusmodi; Medice cura teipsum: me ad benignitatem uocas, quam ipse tuis minus tribuis; debita tibi remitti postulas; quid est; cur ære tibi obstrictos eneces? syngropham, quam fecisti, eam coscindi uel deleri tu precaris, qui es maxime in eo diligens, ut qui tibi nexu aliquo obligati sunt, eorum tabulas stipulationum serues: quæ debes, tibi condonari petis, cum ipse mutuū impendio augeas. Qui tibi debet, in uinculis est, tu autem in templo; ille ære alieno grauissime premitur, tu debita tibi remitti flagitas: petitionis tuæ uox non exauditur, quoniã illius qui dolet, atque angitur, clamor lóge superat: si quod ad corporis usum attinet, debitum condonabis, ab iis qui-

quidem solutus eris uinculis, quibus anima astricta tenetur: si ueniam tribues, tibi etiam tribuetur: tibi ipse iudex eris, de te ipse statues: quoniam qua uoluntate te erga eum ostendis, qui tibi supplex est atq; obnoxius: eadem a Deo de te sententia feretur. Alio sermone aliquid eiusmodi Dominus nos docere uidetur, cum hoc ipsum præceptum narrationis more in uulgus proponat. nam in ea narratione rex quidem introducit, qui terribili aspectu in tribunali sedet, seruosq; in iudicium uocat, & quæstionem de omnibus iis rebus instituit, quas eorum quisque dispensasset. Debitor uero quidam in ius uocatus, cum ad pedes accidisset, loco pecuniarum supplices libellos obtulit, ueniamq; benigne impetrauit: hic postea aduersus cõseruum suum ob exiguum debitum illiberalem se atque inhumanum ostendit. hæc sane acerbitas, qua iste aduersus cõseruum usus est, fecit ut admodum sibi rex irascetur, qui tormentibus iussit, ut ab edibus regis illum expelleret, & eo usque supplicium ab illo sumerent, quoad meritas persoluisset poenas. Nam re uera oboli quidam si cum infinitis comparantur talentis, facile illi quidem numerantur; debita hæc sunt, quæ nobis fratres retribuere debent; quæ minina sunt, si cum illis conferuntur delictis, quæ aduersus Deum nos admisimus. Damnosa prorsus est uel quæ ab aliquo datur iniuriæ occasio, uel serui nequitia, uel quæ parantur corpori insidiæ; tu postea ad hæc ulciscenda animo accenderis, omnemq; in eo cogitationem adhibes, ut poenam ab iis repetas, a quibus iniuriam acceperis. neque si animus tuus ira in seruum incensus est; ipse cogitas homines non natura, sed ui partim seruos, partim Dominos factos esse. quoniam homini seruire naturam, quæ ratione caret; hoc

hoc statuit is, qui uniuersa moderatur . nam , ut apud prophetam est ; Omnia subiecisti sub pedibus eius, oues & boues , & uniuersa pecora campi , uolucres cæli & pisces maris . Hæc omnia potestati subiecta esse alio loco ostendit his uerbis propheta ; Danti pecoribus alimentum ipsorum , & herbam seruituti hominum . Sed Deus hoc hominem munere ornauit, ut liberae esset uoluntatis, sui que iuris . Quare qui aut iure , aut consuetudine tibi subiectus est , is (quod ad naturæ attinet dignitatem) pari tecum est condicione ; neque ille a te factus est , neque te auctore uiuit ; neque quod & animi , & corporis munera exequitur ; hoc ipsum abs te habet . Quid igitur est , cur tam uehementer ira ipse ardeas ? si is aut paulo negligentior fuerit , aut a labore cessauerit , aut fortasse palam liberam in te contumaciam adhibuerit , te ipsum intuearis oportet, qualis erga Dominum fueris, qui te procreauit, atque in lucem edidit ; qui omnium rerum mirabilium , quæ in hac uniuersitate fiunt , participem te effecit ; qui solem ad hominum usum proposuit ; qui ex his quattuor rerum principiis , terra, igne, aere & aqua, cuncta ad uitæ usum subsidia tribuit ; qui mentis uim & cognitionem dedit , ut boni malique delectum haberes . Quo sane pacto fit, ut huic Domino minime pareas ? ut hunc lædas ? an non ab huius imperio desciuisti ? an non ad peccatum confugisti ? an non Domini omnino deseruisti domicilium, quod ut coleres atque custodires, cum tibi præceptum esset, ab eo tamen aufugisti ? an non Deo teste , qui ubique est, cunctaque cernit ; hæc , quæ enumerata sunt , peccata admittis ? eaque dicis & cogitas, quæ dicere & facere minus decet ? si talis ipse es, tam multisque nominibus

I

obstri-

obstrictus, te magnū aliquid conferuo condonare arbitris: si quod ille in te peccauit, æquo lenique te animo ferre demonstras. Quare si ad Deum nos supplices accessuri sumus, ut misericordiam ab eo, ueniamque imploremus; peccasse nos primum mente reputemus: ut huius uocis patrocinium uitæ nostræ demus; uereque dicamus remisisse nos iis, qui nobis debent. At quid sibi uult illud, quod iis, quæ commemorata sunt, infra adiicitur? Ego necessarium arbitror, ne hoc quidem prætermittere, quod a nobis explanetur; ut cum id, quod precibus petimus, nos intellexerimus; animo, non ore solum Deum prece-mur. Ne inducas, inquit, nos in tentationem, sed libera nos a malo. Quæ igitur, fratres, horum, quæ diximus, sententia ac uis est? multis uariisque modis, ut uariæ distinctæq; sunt prauæ omnino actiones, Dominus mihi uidetur Malum appellare, cum multis his nominibus eum uocet; diabolum, beelzebul, mamnam, mundi principem, sceleratum mendacii patrem, hominum interfectorem; & quæcunque alia nomina id generis sunt. Fortasse igitur in his nominibus, quæ de eo intelliguntur, est etiam tentationis nomen: ad hancq; nos opinionem confirmat illa nomen, quæ dicta sunt; consensio. Cum enim dicat; Ne inudcas nos in tentationem; illud adiecit; sed libera nos a malo; quasi res eadem utroque significetur nomine. nam si quis in tentationem non cadit, a malo plane remotus est: & qui in tentatione est, cum in malo utique uersari oportet. igitur malum, & tentatio nominis significatione cōueniunt. ergo quid nobis hæc precandi ratio præcipit? ut ab iis scilicet rebus, quæ in hoc mundo spectantur, nos prorsus auocemus; quoniā ut discipulis

pulis ait Dominus, est uniuerſus mundus in maligno poſitus. Itaque qui ea cupiditate tenetur, ut a malo alienus ſit; iſa mundanis rebus ſe abducatur neceſſe eſt. non enim tentatio animum attingere ullo modo po- teſt; niſi hoc rerū humanarum ſtudium, quaſi aliquam malorum eſcam ipſa proponens, hamum iis, qui au- diiores ſunt, iniiceret. Sed aliis exemplis hæc ſententia magis atque magis aperietur. Sæpe uentorum ui ac procellis mare cum agitur, periculoſum eſt, ſed non iis qui ab eo longe habitant. Ignis habet conſumendi uim, ſed in materia ſolum, quæ illi ſubiecta eſt. Bellum eſt tæterrimum iis, qui belli ſocii & participes ſunt. Ut igitur qui belli incommoda calamitatesq; fugit; illud maxime precatur, ne in bellū incidat; qui ignem ti- met, ne in igne uerſetur, qui mare horreſcit, ne ſibi na- uigandi neceſſitas imponatur: ſic qui mali extimeſcit impetum, hoc potiffimū precari debet, ne in eo uerſetur. Quoniā igitur, ut diximus, mundus, inquit Domi- nus, in malo poſitus eſt; tentationumque occaſiones a mundanis exiſtunt negotiis: recte quidem optimoq; iure iſ, qui a malo eripi precatur, illud quoque orat, ut a tentationum uinculis eximatur. Non enim hamum quis abſorbuerit, niſi qui præ nimia auuiditate eſcā at- traxerit. Iam uero ſurgamus nos etiam, Deoque dica- mus, ne inducas nos in tentationem, hoc eſt in huius uitæ mala; ſed libera nos a Malo: qui cum magnam in hoc mundo potentiā uimq; obtineat, ab eo nos quoq; liberemur, munere ac benignitate Domini noſtri Ieſu Chriſti; quoniam eius eſt gloria, uis, ac potentia in ſempiterna ætatum ſæcula. Amen.

GREGORII NYSENI DE
RATIONE BEATAE VITAE
COMPARANDAE:

CONCIO I.

Beati pauperes spiritu quoniam ipsorum est regnum cælorum.



In hoc igitur hominū conuentu quis eiusmodi est, qui & hunc Domini sermonem audiat; & ab inanibus humilibusque cogitationibus e terra una cum eo abductus, ad spiritalem altæ contemplationis montem ascendat? Hic profecto mons est, qui impendentiū uitio collium cum omnem umbram declinauerit; tum ueræ quidem lucis radiis undique collustratus cum sit: inde quasi ex alta specula puro ueritatis lumine cuncta prospiciuntur, quæ sub aspectum non cadunt eorum, qui conuallibus conclusi tenentur. qualia uerò quātaue sint, quæ e summo hoc monte aspiciantur, Dominus ipse hoc sermone ostendit, cū beatos dicat eos, qui una secum ascenderunt. Nam ex una quidem parte cum cælorum regnum, ex alteraque cælestis terræ hereditatem quasi digito aliquo ostendat; tum misericordiam, iustitiam, consolationem, & eam, quæ omnino cum Deo sit, coniunctionem: & illud, ut Dei scilicet nos contubernales efficiamur; quod est laborum persecutionumque præmium; cunctaque præterea proponit, quæcunque id generis alia ex altissimo hoc monte contemplari licet;

cet: quippe cum has ipsas res, quarum ex edito illo loco prospectus aliquis esse possit, eas uniuersas Dominus quasi digito demonstret. Quoniam igitur in montem Iesus ascendit; nos Esaïam audiamus ita claman- tem: Venite, & ascendamus ad montem Domini; siq; peccato debilitati sumus, tum manus dissolutas (ita enim prophetiæ uerbis traditur) tum genua debilia roboremus. quandoquidem in summo nos monte constituti eum inueniemus, qui omnem morbum, omnem imbecillitatem sanat; qui languores nostros tulit, & dolores portauit. Itaque nos etiam ascendere properemus; ut in summa cum Esaïa spe positi, quasi e specula contemplemur ea bona, quæ Dominus illis proponit, qui eam assecuti sunt altitudinem. At nobis quoque aperiat os Dominus; eaque nos doceat, quorum commemoratio omnis est in beatitudine posita. Nos uero id contemplationis initium faciamus, a quo earum rerum, quas cōmemorauimus cognitionis extat principium. Beati, inquit, pauperes spiritu, quoniam ipso- rum est regnum cælorum. Si quis auri cupidus forte in litterarum monimenta incidat, quibus aliquo in loco demōstretur thesaurus, locusque, ubi summa illa pecuniæ uis obruta est, multum illi, qui eius rei assequendæ cupiditate trahatur, sudorem laboremque ostendat: num hic laboribus languescet, & in quæstu negligentia utetur, in eoque studio nullum laborem ponere suauius esse ducet, quam opes illas comparare? non sane ita se res habet: sed cum omnes ad hoc accersierit amicos; tum operis, quam maximas potest, ad auxilium conductis, earum, quæ in occulto latent, diuitiarum uim sibi parabit. Hic est ille ipse thesaurus, fratres, quem sacra ostendunt litteræ; sed mul-

multa est obscuritate abstrusus. nos, qui purissimi auri appetentes sumus, frequēti precum oratione utamur, ut illæ nobis opes apertissimæ fiant; atque omnibus æqualiter dispertiatur thesaurus: & totum quisque adipiscatur. Nam uirtutis distributio eiusmodi est; ut qui ea præditi sunt, in omnes illius partitio fiat, & cuique uniuersa infideat; neque in iis, qui illius participes sunt, imminuta appareat. Etenim qui terrenis opibus distribuēdis plus sibi assumit, hic eos omnino lædit, qui bus cōtingere partium debet æquatio. quoniam is, qui partem suam cumulauit, socii utique parti detraxit. Spirituales autem diuitiæ idem sane efficiunt, quod sol, qui cunctis quidem integro oculorum sensu utentibus se impertit, totusque ad unumquēque accedit. Quare cum e suo quisque labore æque sibi præmium dari spēs habeat; æquale itē precum auxilium omnes ad id adhibeant, de quo omnis futura est oratio. Itaque ego sane illud primū necesse esse arbitror, ut quid ipsa plane beatitudo sit, definiendo explicemus. Est igitur beatitudo, mea quidem sententia, omnium earum rerum, quæ sub boni appellationem cadunt, comprehensio; a qua nihil omnino est eorum remotum, quæ ad bonum expectendum plane pertinent. Sed huiusce rei cognitio, contraria apposita re, illustrior nobis fiet. Beatitudinis signum est gaudium immortale illud quidem, ac perpetuum, quod e uirtutibus capitur: contraria uero res, quæ beatitudini opponitur, est omnino miseria. Ergo quæ ex acerbis grauibusque rebus, atque ex iis, quæ inopinato nobis eueniunt, malis calamitas accipitur; miseria plane est. Quæ uero in utraque re inest, e contrario distincta est affectio: nam hoc quidē uir beatus habet, quod gaudet atque exultat iis sane rebus, quæ

quæ sibi ad delectationem propositæ sunt . is uero qui miser est , dolet atque angitur illis , quibus affligitur malis . Atque ipse quidem Deus uere omni ex parte beatus est ; quem plane ita esse faciamus , ut beatitudo sit illa sempiterna : bonum id , quod neque oratione explicari , neque mente comprehendere queat ; pulchritudo immensa , sapientia ac uirtus , quæ a se non aliunde profecta sit ; lux uera , omnis bonitatis fons , omnium præstantissima potestas , res sola amabilis , quæ uel sibi perpetuo constet : immortale sit gaudium , semperpiterna lætitia ; de qua denique si quis uel omnia , quæcunque maxime potest , dicendo complectatur , nihil tamen oratione assequitur ; cum id , de quo dicitur , mentis cogitatio non attingat . Sique aliquid de ea uel sublimius mente animoque reputemus , quod tamen mentis est ratione comprehensum , id orationis uel copiaque exprimi nullo pacto potest . Sed quoniam qui hominem fabricatus est , ad Dei similitudinem illum effecit ; id secundo sane loco beatissimum est , quod hoc nomine factum est ueræ beatitudinis particeps . Ut in egregia corporis forma primas tenet ea pulchritudinis species , quæ in uiui hominis facie uultuque naturaliter inest ; secundas uero id obtinet , quod imitatione recte expressum , in ipsa imagine apparet : sic hominum natura , quæ cælestis est beatitudinis effigies ; cum speciem ipsius beatitudinis notis expressam præseferat , illa quoque est optima pulchritudine plane insignis . Sed quoniam peccati sordibus imaginis deturpata est uenustas , uenit is , qui aqua sua uitali illa quidem , ad uitamque æternam saliente nos abluit , ut deleta turpitudinis macula , quam ex peccato suscepimus , ad pristinam nos beatæ formæ speciem plane restituamur .

mur. Quemadmodum in arte etiam pingendi qui illius artis cognitionem tenet, si rudibus atque imperitis hominibus dixerit, uenustā corporis speciem eam esse, quæ his atque illis partibus constet; nēpe cui talis coma sit, elegans oris species, oculorū orbes, superciliorū descriptio formaque, genarū figura; & cetera in eo singula sint eiusmodi, ex quibus absoluta quædā perfecta que sit uenusti corporis forma: sic qui animum nostrum ad illius, qui solus beatus est, similitudinem quasi pingendo exprimit; is quidem singula, quæ ad beatæ uitæ rationem pertinent, nobis oratione describit; in primisque illud, Beati, inquit, pauperes spiritu, quoniam ipsorum est regnum cælorum. At quid ex magno hoc munere nobis lucri fiet, nisi quæ his uerbis subiecta est, sententia aperiatur? nam in medicina remedia quidem multa sunt quæ multum ualent, difficileque parantur; inutilia tamen ea sunt, minimeque ægros homines iuuant; nisi quæ cuique usui singula esse possint, ex arte cognoscemus. Ergo pauperem esse spiritu, quid hoc est, cum ex eo illud quidem compareretur, ut cæleste quis adipiscatur regnum? Diuitiarum genera duo e sacris didicimus litteris, unum quod expetitur, alterum, quod sane improbatur. Virtutum igitur diuitiæ illæ quidē expetuntur; terrenæ autē hæ, quæ in rerum caducarum copia sunt, omnino damnantur; quoniam illæ quidē animi sunt; hæ uero ad decipiēdos sensus ualde accommodatæ. eāq; ob causam, utpote quoniam hæ ad uermium escam, furumque expositæ sunt insidias, uetat nos Dominus earum facultatum copias parare; sed in cælestibus diuitiis iubet nos studium ponere. Tineas autem & fures cum dicat; ostēdit quidem eas res, quæ animi bona perdunt. Quare si diuitiis con-

tiaria opponitur paupertas; duplex quādā sane ratione omnino paupertatis genus intelligi licet; unum illud quidem aspernandum, alterum uero, in quo beatæ uitæ ratio posita est, expetendum. Itaque qui a temperantia inops est; quiue nullas iustitiæ, aut sapientiæ, aut prudentiæ laudabiles partes possidet; aut alias id generis magnificas opes non tenet; ut harum omnino rerum prorsus egens inueniatur, pauperque ac mendicus: quoniam hic rerum, quæ in summo pretio sunt, egestate laborat; miser omnino est, ac commiseratione plane dignus. uerum qui a cunctis rebus, quæ uitii nomine intelliguntur, sponte sua ac uoluntate uacuus est atque nudus; diabolique opes in arariis suis reconditas nullas habet; sed spiritalem uitam ducit, spiritusque ope iis copiis locuples est, ut a uitiis inops utique existat: hunc sane Dominus ostendit in ea beatissima paupertate uersari, cuius fructus est cæleste regnum. Iam uero ad institutum thesauri opus reuertamur, neque quæ occultata latent, ea omnino patefacere ulla inuestigandi ratione cessemus. Beati, inquit Dominus, pauperes spiritu, quoniam ipsorum est regnum cælorum. Superius iam dictum est, rursusque hoc in præsentia exponetur, quemadmodum honestæ uitæ ratio, quæ uirtuti cōueniat, illud sibi propositum habet, ut Deum imitetur. At uero quod ab affectibus uacuum est, neque sub interitum cadit, longe hoc abest, ut homines illud imitari queant. neque enim ullo pacto contingere potest; ut uita, quæ perturbationibus subiecta est, illius similitudinem naturæ attingat, quæ ab omni perturbatione soluta plane est ac libera. Itaque si, ut est apud Apostolū, beatus est solus Deus, homines autem ut huius beatæ uitæ participes fiant, id illis

illis minime euenit, nisi Dei fiant similes : imitatio uero hæc difficilis est, quam assequamur ; ergo in hoc uitæ humanæ spatio nemo homo est, qui illius beatæ uitæ assequatur rationem . Sed quæ tamen a Deo fieri possunt, ex iis pleraque hominibus quidem uolentibus ad imitationem proposita sunt. Quæ igitur id generis sunt mea quidem sententia Dominus spiritalem paupertatem appellat uoluntariâ illam & humilem moderatamque animi demissionem ; ad cuius exemplum nobis Apostolus Dei paupertatem his uerbis proponit. Iesus Christus propter nos egenus factus est , cum esset diues ; ut illius inopia nos diuites essemus. Quoniam igitur cetera, quæ in diuina natura spectantur, omnia modum humanæ superant imbecillitatis ; hæc uero humilitas & nata & educata una nobiscum est , qui humi serpinus, e terraque compacti sumus, atque in terram recidimus ; si tu in eo, quod naturæ uis ac ratio patitur, Deum imitaberis ; iam beatam personam ipse quoque induisti. At nemo arbitretur, nullo negotio, nulloque labore fieri posse, ut hoc humilitatis officium recte præstari queat : immo contra omnium , quæ in uirtutum studio officioque elucet, hoc ipsum est uel difficillimum . Quid causæ est ? quoniam dormiente homine, qui optima semina acceperat ; id, in quo contrarii feminis uis continetur, superbix zizanium ab infensissimo uitæ nostræ aduersario sparsum radices egit. quo enim modo illé sese in terram abiecit, eodem sane modo ad communem ruinæ casum miseros mortales una secum præcipientes impulsi : naturæque nostræ malum aliud nullum eiusmodi est, qualis est is , qui nobis ingeneratur, superbix morbus . Cum igitur qui humanæ naturæ participes sunt , iis hæc animi elati affectio

omnibus fere quodammodo insita sit : eam ob causam Dominus ex habitu nostro superbiam , quasi ueterem quendam morbum cum repellat, ab hac beatæ uitæ exorditur ratione, in eo quod id nobis cōsiliū dat , ut qui sponte sua pauper factus, re uera omni ex parte beatus est, eum ipsum nobis ad imitandum proponamus; quo nos sponte, uoluntateque nostra paupertatem confectati, quibus rebus maxime possumus, in iis pro uirili eius similes efficiamur, huiusque modi beatæ uitæ cum illo nos simul incamus rationem . Hoc enim , inquit Paulus, sentite in uobis, quod & fuit in Christo Iesu : qui cum in forma Dei esset , non rapinam arbitratus est, esse se æqualem Deo , sed semetipsum exinaniuit formam serui accipiens. Quid abiectius in Deo, uiliusque uideri poterat, quam serui habitus? quid in eo, cuius imperio potestateue uniuersa continentur, humilior, quam se naturæ nostræ, quæ mendica est, participationem fieri? Is qui maximus omnium rex est, summusque Dominus, sponte seruilem induit personam : qui omnium iudex est, principibus tributum pendit : qui creatæ omnis naturæ Dominus, in spelunca diuersatur; qui cuncta complexu suo tenet, locum in diuersorio non reperit, sed in animalium præsepio abiectus iacet : qui ab omni labe purus est atque integer , humanæ naturæ sordes suscepit, ac per omnes humilis nostræ naturæ partes progrediens eo peruenit, ut causa nostra mortem obiret. Videte quæso uoluntariæ huius mendicitatis modum . Is, qui uita est, mortem sentit, is qui iudicio præest in iudicium trahitur; is, in cuius potestate uita est omnium, iudicis sententia morte multatur : is denique qui cælestis potestatis imperium tenet, satellitum manum non repellit. Hoc, inquam, exēplum tibi
pro-

propositum sit, quo humilis moderatique animi tui ratio referatur. Sed fortasse hoc præclare agi arbitror, ut absurdam huiusce uitii uim consideremus, quo nos cum huiusmodi humilitatis officiū recte præstiterimus, nullo negotio commodeque hoc nobis beatitudinis genus contingat. nam ut periti medici, repulsa morbi causa, facilius ipsius ægritudinis uim superant: sic nos cum eorum, qui se superbe iactitant, insolentiam represserimus, facilem quidē, lateq; patentem ipsis aperiemus aditum ad humilis demissique animi rationem. ergo unde superbiam hanc inanem esse, ac uanam ostendamus? quoue alio modo id fiet, quam si, qualis nostra natura est, demonstretur? nam qui non sua ornamenta, neque commoda, sed se ipse respicit; hic sane quidem in eiusmodi uitium non facile cadet. Quid plane homo est? lubetne, ut ex litterarum monumentis id in uulgus dicam, & quod grauius est, & quod plus dignitatis habet? Verum qui res nostras ornat, & de hominis nobilitate gloriosius prædicat; e luto generis humani originem extare dicit, cognationemque tibi, qui generis nobilitatem ostentas, cum lapide esse ostendit. Quod si proximam, & eam, quæ in promptu est, cognitionis tuæ originem commemorare uis; age quæso ne hoc loquare; ne hiscas, ne aperias, quemadmodum in lege scriptum est, pudēda patris & matris tuæ; neue in medium ea proferas, quæ obliuione, multoque silentio obruenda sunt. Deinde tu, qui e terra simulacrum es, pauloque post puluis es futurus; quiue spiritum in te eiusmodi cōtines qui instar bullæ cito ad nihilum recidet; an nō erubescis superbia te efferri? arrogantiaque atque inani spiritu animum tuū turgescere? an non utrunque cernis humanæ uitæ terminum, unde

de scilicet initium ducat, quoque fine terminetur? At de adolescentia ipse triumphas, floremque ætatis dumtaxat tecum reputas, ac uenusta corporis specie exultas, quoniam ad agitationem manuum firmitate, & ad saltationem celeritate pedum uales, capillis es uento diffluentibus, genis tenera pilorum mollitie distinctis; uestemque habes purpura prætextam ac uario opere ornata; pannos sericos possides uariis proceliorum, aut uenationum figuris distinctos, aut rerum aliarum, quæ gesta sunt, historiis ornatos; aut tu fortasse calceos, uel soccos attente respicis, nigro colore insignes; diligentique & artificioso fibularum opere elaboratos. Hæc tu sane animaduertis; te uero ipse minus consideras. Equidem ostendam tibi, quasi in speculo, quis qualisue sis. Non ne in supulcrorum locis naturæ nostræ aspexisti mysteria? non ne ossa promiscue cōgesta uidisti? an nō capita a capillis nuda, quæ exuta carne, effosq; oculis terribilē ac deformē præ se ferunt speciem? ah ora hiantia, reliquaque membra prout sors tulerit diuisa uidisti? Certe si illa attentis oculis aspexisti, te ipsum in illis contemplatus es. Vbi huius florentis uitæ signa? ubi optimus genarum color? ubi in labiis flos? ubi & grauis, & suauis oculorum aspectus, superciliorum ambitu decore insignis? ubi nasus rectus uenustis genis belle interiectus? ubi superbe compta coma? ubi circum tempora compositi capilli, & cincinnorum fimbriæ? ubi ad iaculandum ualida manus? ubi ad equitandum pedes? ubi conchyliata uestis, aut torques, aut cingulus? ubi socci, cursus, equus, fremitus, ceteraque omnia, quæ in hac uita superbiā tibi spiritusque addūt? Tu quæso dic ubi in mortuis hominibus ea, quorum gloria te effers, ac magnifice iactas?

quod

quod somnium adeo uanum ? quæue in somnis talis oblata uisio ? quodue hominis spectrū ita tenue, atque adeo tactum subterfugiens, quale est adolescentiæ quasi somnium ; cuius simulac oblata species est derepente transit ? Atque hæc quidem uelim a me iis dicta sint, qui quoniam adolefcētes sunt, præ ætate imbecilla minus recte sapiunt. Sed dicet quis, quid de iis qui ætate perfectæ sunt iamque confirmata, morum autem ratione minus firma, cum sese magis atque magis superbiæ uitio efferant ; hanc morum quasi ægritudinem mentis appellant impetum ? Magistratus, & ea, quæ ab eo potestas existit, superbiæ materiam occasionemque sæpe præbent. Nam aut qui magistratu præditi sunt, hoc uitio laborant ; aut cum illius adipiscēdi rationem ineūt ; aut de eo ipso sermones uim huius morbi restinctam sæpe iterum accēdunt. Ecquæ orationis uis eiusmodi est, quæ in istorum aures penetret, acclamatione præconum ante obstructas ? Quis istis persuadebit, qui hoc affectu astricti tenentur, nihil se quidquam ab illis plane differre, qui in scæna sese gloriose ostentant ? nam illi personam aliquam uel formosissimā assumunt, purpureaq ; uestem & auro intextam induunt, curruq ; magnifice uehuntur ; ex huius tamen generis pompa nullus eos inuadit superbiæ morbus ; sed quo spiritu, quoque mētis habitu prius erant, quam in scænam prodirent, eundem sane in sollemni illa pompa retinent : neq ; postea, cum e curru descendunt, personamque illam magnificam deponunt, id ægre ferunt. Qui uero in hoc uitæ theatro, magistratus tempore, in illa pompa gloriantur ; cum neque quod paulo ante præterit, neque quod paulo post sequetur ; secum ipsi reputent : tanquam bullæ, quæ inflatione tumescunt :
 sic

sic isti magnifica præconum acclamatione sese efferunt; alienæque cuiusdam personæ habitum sibi affingūt; ac naturali mutato uultu, tætram atque terribilem quandam hominis formam induunt; & asperiores uocis sonum ita simulant, ut inclinata ululantiq; uoce loquantur ad terrorem incutiendum iis, qui audiunt. Hi certe non amplius in humanitatis se finibus continent; sed diuinam sibi auctoritatem potestatemque arrogant; cum uitæ necisque se dominos esse arbitrentur; propterea quod eos, qui apud illos causam dicunt, partim salutare sententia absoluunt; partim morte multant. Neque isti quidem illud etiam animaduertunt, quis re uera hominum uitæ potestatem habeat; hoc est, quis uitæ & initium & terminum præscripsit. Quanquam ad reprimendam istorum animi insolentiam uel illud satis esset, quod qui cum imperio sunt, ii maximam partem, in ipso potestatis imperiiq; theatro e mediis tribunalibus morte erepti, funere efferuntur; proque præconum uocibus lamentabilis exauditur fletus. Quo igitur pacto alienæ uitæ dominus est is, qui suæ uitæ potestatem non habeat? Itaque si mente hic pauper est; ad eumque animo contuetur, qui sponte sua nostroq; nomine est pauper factus; siq; communem naturæ nostræ condicionem sibi ob oculos ponit; & præ inani illa falsaque potestatis specie commune mortalium genus minus contemnit; beatissimus hic reuera habendus est; quoniam hanc humilis animi affectionem, quæ uel ad tempus manet, cum perpetuo illo cælestiq; regno permutabit. Neque tamen, frater, tu alteram paupertatis rationem aspernare, quæ diuitiarum cælestium conciliatrix est; nam Dominus inquit; uade, & uende omnia quæ habes, & da pauperibus; & ueni, & sequere me;

me; & habebis thesaurum in cælis. Neque enim hæc paupertatis ratio ab ea discrepare uidetur, quæ beatum hominem efficit. Discipulus enim ad Dominum; Ecce nos, inquit, reliquimus omnia, & secuti sumus te, quid ergo erit nobis? Huic uero ecquid responsum? Beati pauperes spiritu, quoniam ipsorum est regnum cælorum. Lubet ne audire, quis plane spiritu pauper est? is uidelicet, qui has rerum copias, quæ ad corporis usum pertinent, cum animi opibus permutabit. Is, qui pauper est spiritu, terrenas has diuitias, quasi graue aliquod onus abiiciet, ut sublimis alte feratur, in nubibusque, inquit Apostolus, una cum Deo in cælum rapiatur. Auri uis res quædam grauis est; quæue ob diuitias expetitur, res omnis deorsum fertur. Virtus autem leuis est quædã res, quæ sublimia petit. At quod graue, quodue leue est, hæc duo inter se admodum repugnant. Itaque difficile atque arduum est, ut leuis efficiatur is, qui graue sibi aliquod onus imposuit. Si igitur cælestia petere nos oportet, ab iis certe, quæ deorsum trahuntur, inopes atque uacui simus necesse est, ut in cælestibus plane rebus uersetur. Qualis autem huiusce rei perficiendæ modus existat, his psalmi uerbis nos docemur; Dispersit, dedit pauperibus, iustitia eius manet in sæculum sæculi. Qui egenti homini impertietur, is participem se illius efficiet, qui causa nostra pauper factus est. Pauper egenusque fuit Dominus; neque tu quidem paupertatem metue. Verum qui propter nos egenum se fecit, omnis creatæ naturæ ille imperium habet. Ergo si cum eo, qui pauper fuit, tu simul pauper eris, regnum una item cum illo regnante ipse obtinebis. Nam beati, ille inquit, pauperes spiritu, quoniam ipsorum est regnum cælorum. quo quidem regno

L dignos

dignos nos præstemus, auctore Christo Iesu Domino nostro, cui gloria sit ac potentia sempiternis sæculis. Amen.

CONCIO II.

Beati mites, quoniam ipsi possidebunt terram.



VI gradibus scalæ quibusdam sublimiora petere contendunt; ii cum primum ascenderint gradum, illo ipso adiuti alterum scandunt, quo ascendentes ad tertium ducuntur; hicque ad superiorem proximum; ille ad reliquos, qui ordine deinceps sequuntur, ascensum præbet. Itaque ii scilicet, qui conscendunt, dum ab eo, in quo consistunt, gradu sese ad superiorem efferrunt; hoc recto graduum ordine ad summum plane perueniunt. Quorsum spectat hæc mea inde ducta exordii ratio? Ego uero arbitror quasi graduum modo collocatam esse beatitudinum rationem, quæ mutuo quodam ordine facilem paret sermoni nostro ascensum. Nam qui primum beatæ uitæ gradum est mente affectus; necesse quodammodo est, ut is recto cogitationum ordine proximum comprehendat gradum; licet noua quædam a Domino introducta sint, quæ ad primum sane gradum spectare non uidentur. Fortasse enim qui audit, nullo modo fieri posse dicet; ut celestis regni possessionem quis adeptus, quasi quodam graduum ordine, terræ postea hereditatem cernat: quandoquidem si naturalem rerum ordinem imitari debet oratio, illud magis cum naturæ ratione consentit, ut terra ordine prior esset, quam cælum; utpote cum hinc e terra ad cælum nobis pateat ascensus. Verum
 si

si nos quasi uolucres facti mente eo peruolauerimus, ut in testudinis cælestis dorso consistamus; cælestem ibi inueniemus terram; cuius hereditas iis proposita est, qui illud uitæ genus uirtuti consentaneum secuti sunt. Itaque hæc ordinis ratio non sane mihi uidetur a beatitudinum aberrare dispositione, ut in promissis primum scilicet cælum, deinde terræ a Domino sit nobis proposita hereditas. nam quidquid speciem aliquam præ se fert, quod ad corporis attinet sensum, id omne cognatione inter se quadam continetur. Atque cælum quidem etsi loci interuallo a nobis alte distare uidetur; in statu illius tamen naturæ est, quæ sub mentem cadit: sed eo certe peruenire mens non potest; nisi quas res noster assequitur sensus, eas ipsas mentis nostræ sit prætergressa ratio. Neque mirari quidquam debes, si cælestis patriæ domicilium terræ nomine appellatur; quoniam rudi humilique nostro aurium sensui sese Dominus accommodat; qui eam ob causam ad nos descendit, quoniā ad eum nos ascendere nō poteramus. Itaque & uerbis & nominibus, quæ nobis in promptu sunt, diuina ille nobis tradit mysteria; cum illis ipsis quidem uocibus utatur, quas hominum tenet consuetudo. Nam in proxima superiori promissione regni nomine eam appellauit cælestis beatæque uitæ rationem, quæ nulla orationis ui explicari potest. An oratione is eiusmodi aliqua ostendit, qualia sane sunt ea, quæ hoc in terris regnum continet? an diademata quædam, quæ lapillorum radiis elucent? an uestes purpure prætextas, uarioque florum opere ornatas, quæ suauem aliquem eruditis oculis aspectum præbent? an excelsas porticus, peristromata, soliaque alte extructa? an satellitum, stipatorumque cohortes? an alia id ge-

nus, quæcunque in hoc uitæ theatro, quasi tragica spectacula proponunt ii, qui eiusmodi rerum copia impetui potestatisue suæ amplitudinem augere student? Sed quoniam in hoc uitæ spatio magnum aliquid est regni nomen, ceterisque rebus præstat omnibus, quæ in uita hominum studio expetuntur, iccirco ad ea, quæ in cælis sita sunt, bona exponenda hoc usus est nomine; ut si apud homines aliud aliquid esset, quod regno præstaret; hoc ipso excellentis rei nomine auditoris animum ad immortalis beatæque uitæ excitaret rationem. Neque enim fieri potest, ut cælestia bona, quæ neque sub cognitionem, neque sub sensum hominū cadunt, humano generi propriis explicarentur nominibus. talia enim ea sunt, quæ neque, inquit Apostolus, oculus uidit, neque auris audiuit, neque in cor hominis ascendit. Verum ut ne uitæ illius beatæ, quæ in spe nobis est, status omnino mētis nostræ effugiat contemplationem; admirāda illa bona ita nobis exponuntur, quemadmodum humilis nostri ingenii patitur ratio. Quare communis hæc terræ appellatio non debet mentem tuam a rebus cælestibus iterum ad has terrenas auocare appetitiones. sed si propositis beatæ illius uitæ præmiis mente tu elatus eo prouectus es, ut cælestia speres; tum in eo studium ponas uelim, ut eam inuestiges terram, cuius non ad omnes pertinet hereditas, nisi ad eos, qui ob mansuetæ uitæ studium digni habentur, qui illud assequatur promissum; quod magnus etiam Dauid, qui omnium illius ætatis hominum tum mansuetissimus, tum patientissimus fuisse diuinis traditur litteris, spiritu is diuino afflatus & præsensisse, & fidei ope iam id præoccupasse uidetur, quod in spe positum esset, cum in hæc uerba erumpat; Credo me uidere

dere bona Domini in terra uiuentiū. Non equidē credo a propheta hanc uiuentium terram prædici, quæ caducas res omnes gignit, quidquidue rursus ex ea existit, id omne in interitum cadit; sed illam ipse uiuentium terram præuidit, ad quam morti nō patet aditus; in qua nulla trita est peccatorum hominum uia; quæ nullum suscipit uitii uestigium; quam non improbitatis aratro is proscidit, qui zizanii semen spargit; quæ tribulos ac spinas non parit; in qua & requietis aqua est, & pascuæ locus, & fons in quattuor riuos diffluēs, & uinea a Deo omnibus rebus exculta; & in qua denique omnia id genus alia uigent, quæcunque occulta nos quadam significatione ex diuinis cognoscimus literis. Iam cognita nobis est sublimis illa terra, quæ supra omnes cælos sita spectatur; in qua magni regis simul habitatur ciuitas; & de qua magnifice, ut est apud prophetam, glorioseque multa dicta sunt. Quare non optimo iure nobis amplius præposterus atque absurdus ordo adhiberi debet, qui in exponendis his beatæ uitæ rationibus adhibetur. Neque enim consentaneum, opinor, est, hunc infimū terræ globum ad spem remunerationis illis proponi, qui in nubibus (ut Apostoli uerbis utar) rapiuntur in occursum Domini in ærem, & sic semper cum Domino futuri sunt. Quod cum ita sit, cui usui hæc infima terra esse potest iis, quibus cælestis uita in spe proposita est? Rapiemur enim in nubibus in occursum Domini, & ita semper cum Domino erimus. Iam uero uideamus, cui uirtuti præmium proponatur illius terræ hereditas, cum Dominus beatos eos dicat, qui mansueti sunt, quoniam ipsi terram possidebunt. Quid igitur mansuetudo est? & in qua re nomen mansuetudinis ponimus

nimus, quam Dominus beatam prædicat? non enim omnia, quæcunque mansuete fiunt, æque in uirtute haberi arbitror; si quæ remisse aguntur, tardeque; ea hac una significarentur dictione. Non enim in cursu is, qui remissus est, ac mansuetus, melior habetur, quam ille qui multum festinat. neque in pugillatione is, qui motu tardus est; de aduersario palmam fert: immo uero si ad cæleste præmium, ad quod uocati sumus, cursu contendimus; omnibus nos uiribus festinare Paulus monet iis uerbis; Sic currite, ut cōprehendatis. nam ipse etiam neglectis iis, quæ a tergo fierent; ad illa, quæ essent a fronte; tum uehementiori cursu ferebatur; tum pugnando, cum aduersarii in se impetum caute obseruaret, facili sese agitatione mouebat. Et quoniam pedibus firmus erat, & manibus armatus; telum, quod in manibus haberet, non in imbecillum aliquem coniiciebat, qui uix stare posset: sed cum plagas aduersario inferre cōtenderet; eas corporis partes ictibus petebat, quæ ad hoc ipsum opportuna pateret. Visne in pugna Pauli artem exercitationemque cognoscere? uide quæso aduersarii uulnera; uide reluctantis cicatrices; uide in eo, qui superatus est, impressas plagarum notas. Nosti omnino aduersarium, qui carnis quasi telis oppugnat; hunc continentiaë unguibus ille dilacerat; pugnandique arte male percutit; cuius membra his armis interimit; fame scilicet, siti, algore, nuditate; cui Domini notas inurit; quem a tergo relinquens, cursu superat; quasi si aduersarius anteuerteteret, tenebras oculis suis offudisset. Itaque si in concertationibus celer est, atque expeditus diuus Paulus; si David cum in hostem impressionem faceret gressus dilatat; si sponsus, ut est in canticis, & montes transilien-

do

do, & in collibus saltando, damæ motu celeri comparatur: multaue eiusmodi alia commemorare licet, in quibus mouendi celeritas præstantior apparet, quam hæc remissio mansuetudoque: quid igitur causæ est, cur hoc loco Dominus in perfectæ eam uirtutis genere numeret beatamque dicat? nam beati, inquit, mansueti, quoniam ipsi terram possidebunt; eam plane terram, quæ optimarum est frugum fertilis & copiosa; in qua uitalis arbor frondescit; in qua spiritalium munerum fontes erumpunt; in qua fetus parit uera illa uinea, quam colere patrem Domini audimus. Verum enim uero aliquod eiusmodi præceptum Dominus tradere uidetur; quod ad uitium scilicet facilis est admodum hominum propensio; in deterioremq; partem celer ac procliuis fertur hominum natura; id quod in rebus omnino grauib; fieri uidemus, quæ sursum plane non mouentur: sin autem e summo aliquo mote decliues impelluntur: grauitate ac pondere suo cum impulsus illum concitent; adeo uehementi strepitu celerique impetu in subiectum feruntur locum, ut præceps illa uis nulla oratione explicari queat. Itaque quoniam in eiusmodi grauib; rebus periculosa est præceps illa celeritas; quæ res huic contraria opponitur, salutaris est ac plane beata: eiusmodi autem res est tarditas ac mansuetudo; quæ tales naturæ impetus constanti quodam habitu retardat. Nam ut ignis, qui sursum natura sua semper mouetur; contra si deprimitur, deorsum non sane fertur; sic uirtus quoniam celer est, atque expedita, ut sublimia petat; cumque de celeritate sua nihil unquam remittat; cōtrario impulsu agitata non mouetur. Cum igitur per se satis ad uitia procliuis natura nostra impellatur; præclare quidem agitur, si ad ex-

man-

mansueti quædã animi remissio adhibeatur : quoniam cum ab illis quiescimus ; id argumento est nos ad cælestia impelli . At uero melius esset utique , huius uitæ exemplis rem, de qua oratio habetur, aperiri . Duplex est in singulis hominibus quædam uoluntatis inductio, qua ad id , quod sibi uidetur, libere quisque impellitur ; unius quidem impulsu ad temperantiam , alterius uero ad intemperantiam trahitur . Quod in parte de uirtute uitioq; dictum est ; id in uniuerso intelligatur . nam in contrarias omnino appetitiones distrahitur hominum ingeniũ : utpote quis iratus in lenitatem , impotens in modestiam, inuidus in beneuolentiam, odii plenus in amorem reconciliandæ pacis animo sæpe impellitur . Quare cum hominum uita ex ea materia constet, in qua animi uersentur affectiones ; affectioque omnis adeo uehementi impetu feratur , ut reprimi non possit, nisi illud ipsum expleat , cuius cupiditate trahatur ; materia uero cum grauis atque eiusmodi sit, quæ in infima petat : id propterea beatos Dominus non eos dicit , qui longe sese ab animi motibus abducunt ; quoniam fieri non potest, ut in uita , quæ materiæ affectionum subiecta est, illa perfectæ uitæ actio præstetur, quæ ab ipsis affectibus plane uacua est . Sed quæ uirtutis actio in hac uita, quæ e carne constat, a nobis præstari potest ; hanc Dominus mansuetudinem uocat ; affirmatque si quis mansuetus est ac lenis , hoc ualere, ut beatus ille fiat . Etenim non illud humanæ naturæ præscribit, ut ab omni prorsus affectu illa uacet ; siquidem æqui non est latoris legis, ea iubere, quæ naturæ non patitur ratio . Quod quidẽ non ab eo dissimile esset, ac si quis aquatiles animantes , ad uolatilium uitæ morem commutet ; & contra, quæ in cælo uiuunt,

eas

eas ad aquam traducat. Verum legem ita ferri oportet, ut legis ipsius præceptum naturæ nostræ uis exequi possit. Eamque ob causam & mansuetos, & moderatos nos esse; non omni prorsus affectu carere iubet Dominus. hoc enim supra naturam nostram est, illud autem uirtutis officio perficitur. nam si ei, qui cupiditate non afficitur, propositus esset illius beatæ uitæ status; inutilis illa quidem, & minime uitæ fructuosa esset remuneratio. Quotus enim quisque est, qui e carne & sanguine concretus, hoc ipsum assequeretur? Iam uero non eum, qui aliquo forte casu concupierit: sed illum qui consulto, sponteque hoc concupiscendi uitiū contraxerit, damnandum esse ait. Siquidem ea, quæ naturæ nostræ adglutinata est, imbecillitas, illud nobis uel inopinātibus comparat; ut huiusmodi nobis appetendi uis ingeneretur. Verum cum aliquis ad huiusmodi animi appetitionem non incitatus quasi torrens fertur; sed huiusmodi perturbationis concitatam materiam fortiter reprimat, rationisque uis adhibita eam plane depellit; hoc certe est uirtutis officium. Ergo bene beateque cum iis est, qui in turbulentos animi motus præcipientes non ruunt; sed cum in rationis officio sese contineant; in iis ipsis ratiocinandi uis, quasi frenum aliquod, uehementes coercet appetitiones; neque animi uim sinit perturbatione aliqua efferri. Sed quam beata profecto res sit mansuetudo, hoc ipsum aliquis melius animaduertere potest in eo, qui ex ira gignitur, affectu. Cum enim aut uerbum aliquod, aut factum, aut aliqua rerum minus iucundarum suspicio eiusmodi morbi uim excitabit, sanguisq; in corde efferuescet, & ulciscendi libidine efferetur animus; tum quemadmodum quadam medicamentorum potione adhibita

M ho-

hominum naturam in uarias belluarum species mutari fabulæ narrant. Sic uidere licet ex homine de repente aliquem aut aprum, aut canem, aut pantheram, aut aliam id genus feram iracundiæ uel illum factum esse. Oculus cruore suffusus, capillus erectus atque horridus, uox aspera, ac uerbis uolubiliter incitata, lingua perturbatione torpescens, neque intimorum affectuum administra, labia compressa, quæ neque articulate uerborum uim imprimunt; neque humorem illum, qui ex ea perturbatione innascitur, coercent; sed illius spumam una cum uoce foede expuunt; manus, pedes, tota corporis constitutio, singulaque membra ita male affecta, ut perturbationi illi omnino cohæreant. Iraque si quis eiusmodi est; alter uero, qui mansuetudinem sibi ob oculos ponit, rationis adhibitis remediis morbi uim mitigat, constantiq; uultu remissaq; uoce sedate omnia agit, tanquam medicus is, qui phrenesi laborantem quempiam arte curat: an non facta huius atque illius comparatione ipse dices, eum, qui quasi bestia quædam ferum se ostendit, tum miserabilem illum, tum detestabilem esse? alterum uero, nempe qui mansuetus est, an non beatissimum prædicabis, qui neque tale imitatus sit uicini uitium, neque decorum uultum indecore distorserit? Quod uero ad hunc potissimum affectum Domini spectet oratio, inde perspicitur, quod humilitatis præcepto primū posito, deinde mansuetudinis legem præscripsit: quoniā hæc utraque uirtus inter se cognatione contineri uidetur: illaque humilis ac moderati animi constitutio quasi quædam est mansuetudinis mater. nam remota animi impotentia superbiaque, nulla est iræ materia atque occasio. Siquidem cōtumelia atque ignominia huiusce morbi

iratis

iratis hominibus causa existit: iniuria uero contumeliaque non cum attingit, qui se ita comparauit, ut humili sit animo. nam si quis ea est mente præditus, quæ omnis sit humanæ fraudis expertus, ac plane sincera; uilemque naturam, quam ipse sortitus est, contemplatur; animaduertitque unde constitutionis suæ initium ipse habeat, quouque fine terminetur; sique breuem hanc uitam, citoque interituram, atque sordes huic carni adglutinas, eamque naturæ inopiam cernit, ut ad sui tuitionem conseruationemque satis esse non posset, nisi illius egestatem expleret animalium copia: deinde si dolores, luctus, calamitates, uariaque morborum genera considerat, quibus subiecta cum sit hominum uita; nemo sane homo ab iisdem naturæ iure immunis est, ac plane liber. is qui cuncta hæc puro mentis sensu accurate animaduertit, non ademptos sibi honores ægre fert: quin potius contra, si qui honos sibi in aliquo a uicino tribuebatur: id dolo malo fraudeque confieri arbitrabitur; quoniam rerum natura nihil eiusmodi comparatum est, quod in honoribus societatem habere queat; nisi ea sunt, quæ ad animum pertinent; cuius honos non ex iis rebus constat, quæ in hac uita mortalium studio expetuntur, nam aut opum gloria, aut generis ostentatio, aut quædam excellentiæ species; ex quibus sane rebus summi existunt hominum honores; hæc res omnes tollunt, atque plane dedecorant animi dignitatem; ut nemo, qui ratione utatur; eiusmodi re aliqua patiatur puram animi deturpari integritatem. Cum autem aliquis ita sese habeat, hoc aliud sane nihil est, nisi quod is in graui quodam humilis moderatque animi habitu uersatur: quo quidem habitu recte exculto perfectoque illud fiet, ut ad ani-

mum nullus pateat iracundiæ aditus . qua longe remota, tum quieta illa quidem sedataq; omnino, constituitur quædam uitæ ratio, quæ alia non est, ac ipsa mansuetudo; cui finis propositus est, beatæ uitæ status, cælestisque terræ hereditas, auctore duceque Christo Iesu Domino nostro, cui gloria potentiaque sempiternis sæculorum ætatibus. Amen.

CONCIO III.

Beati lugentes quoniam ipsi consolabuntur.

NONDUM ad summam nos mentis altitudinem peruenimus; sed infra medium adhuc meditationum montem uersamur: sique per beatitudinū gradus, quibus nos altius prouehit Dominus, ad beatissimam paupertatem, & mansuetudinem, quæ excelsior, quam illa est, perducti duos iam colles superauimus: tertiam quoque ille nobis beatitudinum altitudinem demonstrat, ad quam omni mora abiecta, omnique peccato (ut Pauli uerbo utar) circumstante dimisso, nos omnino cursum tenere oportet; ut in altissimo gradu collocati, celeres atque expediti ad purius ueritatis lumen animo propius accedamus. Ergo quid illud est, quod dicitur? Beati qui nunc lugent, quoniam ipsi consolabuntur. Certe qui rerum humanarum rationem habet, is utique ridebit, hacq; neglecta sententia talia dicet: Si in hoc uitæ curriculo beati habentur ii, qui omni miseriarum genere cōficiuntur: illud sane consequens est, ut miseri illi sint, quorum uita ab omni mærore uacua in secundo rerum cursu uersatur: atque ita fiet, ut si
plura

plurā calamitatū genera hic enumeret, risum plane expleat. uerbi causa, si uīditatis incommoda, si orbitatis ærūnas ob oculos ponat; si damna, naufragia, belli prædas, iniquas iudicū sententias, exilia, bonorum proscriptioes, ignominias, morborū calamitates, ut febres, membra amputata, omnēq; tum corporis pestem, tum uniuerſa denique siue animi siue corporis uitia, quæ in hac uitæ usura cōcipiunt mortales: hæc omnia si quis oratione percurreret, ridiculum iudicio suo id ostendet, quod hoc sermone differitur; bene scilicet iis esse, qui lugēt, ac tristes sunt. At uero nos cū pro nihilo eos putemus, qui rerum diuinarū sententias demisso animo, uili abiectaque mente intuentur, omnem conatum adhibeamus, ut, quoad fieri potest, rerum cernamus copiam, quæ alte in iis infixæ harer, de quibus habetur oratio: ut inde intelligi ac perspici queat, quantum mens aliqua humilis, quæ carnis est astricta sensibus, ab ea distet, quæ alte spectat, ac plane cælestis est. Atque luctum quidem illum, qui & propter scelera admīssa, & ob peccata adhibetur, uel beatissimum ex eo existimare licet, quod de tristitia scribit Paulus; cum nō unum tristitiæ genus esse dicat; unum quidē sæculi, alterum uero secundum Deum: hunc quidem sæculi luctum gignere mortem; illum salutarem iis esse, qui ex pænitentia dolore afficiūtur. nam reuera animi affectus eiusmodi non est a beatitudine alienus: cum peccatum scilicet agnoscens animus, genus illud uitæ deplorat, quod est peccato uitioque astrictum. Vt enim in corporis morbis, cum membrum aliquod ex aliqua offensione languescit, indolentia quidē signum est, quod membri male affecti uis extincta est. sin autem medicamēto aliquo adhibito, uitalis restituitur sensus corpori;

pori; tum ægrotus, tum illi qui curationes adhibent, laboranti membro gaudent: quoniam morbi sensim discedentis hæc eis significatio est, quod membrum illud acria medicamenta sentire incipit: sic nonnulli, ut est apud Apostolum, postquam fuerint ab omni doloris sensu uacui, uiriosæ se uitæ ipsi dant; cumque aliqui mortui sint, & languescant in uitæ honestæ ratione, nullum earum rerum, quas agunt, sensum omnino habent. Sin autem hos aliquo modo attigerit oratio, quæ quasi remedium afferat, utpote quæ calidis & urentibus medicamentis, futuri scilicet iudicii rebus horribilibus minas iacet; & rerum, quæ expectantur, metu grauius eorum perterrefaciat animum; geennæque terrorem; ignem sempiternum, uermes perpetuos, stridorem dentium, æternum luctum, tenebras exteriores atque eiusmodi denique omnia minitetur: tanquam is, qui calida quædam & acria medicamenta illi adhibet, qui uoluptatis morbis obtorpuisset; tum pristinum uitæ sensum ei restituet; tum illum beatum efficiet; cum grauem quendam eius animo doloris sensum intulerit. Quemadmodum Paulus etiam eum, qui rem cum uxore patris sui habuit; uerbis eatenus uerberat, quoad ille se peccasse non agnouit. & quoniam hominis illius medicina obiurgatio fuit; quasi doloris luctusque præsidio eum beatum iam factum, cohortari aggreditur; ut ne abundantiori tristitia, (ita enim loquitur) is absorbeat. Atque ad eam quidem contemplationem, quæ de beatitudine proposita est, hæc a nobis sententia exposita sit, non inutilis illa quidē ad honestæ uitæ rationē; propterea quod cum in hominū natura peccatum abundet; huius rei medicina est is luctus demonstratus, quo ex pænitentia afficimur. Sed grauius aliquid iis,

iis, quæ commemorauimus, subindicare Dominum censeo; cum præter illud in graui hoc luctu adhibendo aliquid aliud se intelligere ostendat. Etenim si solam delicti demonstraret pænitentiam; illud magis consensaneum esset, beatos illos dici, qui iam in luctu fuere, non eos sane, qui perpetuo lugent. Exempli causa in aduersæ ualitudinis statu qui curationibus sanati iam sunt, beatos putamus; non illos qui in perpetua sunt curatione; quoniam morbi perpetuitatem curationis ostendit productio. Verum ego aliter quidem recte se habere arbitror, ut non hac una sententia res contineatur, quod Dominus scilicet iis, qui peccatum lugent, beatæ uitæ præmium tribuat. nam plerosque inuenimus, qui innocentis uitæ cursum tenuerunt; ipsoque uel Dei testimonio sunt omni uirtute commendati.

Quæ Ioannis auaritia fuit? quod in idolis colendis studium Eliæ? quod uel graue, uel leue peccatum in illorum uita commemorauit historia? Quid est igitur; quamobrem statuat Dominus beatitudinis præmio illos carere, qui neque a principio ægri fuere, neque re medium hoc, nempe pænitiæ luctus usu illis uenit? An non ab omni ratione alienum esset opinari, illos ab hoc diuino beatæ uitæ statu repulso esse; quoniam neque peccauerunt, neque peccatum luctu curauerunt? hoc enim pacto peccare præstantius esset, quam uitam a peccato alienam ducere; si iis solis, quos pænitet Spiritus sancti paracleti gratia obtigisset. Beati enim, inquit, qui lugent, quoniam ipsi consolabuntur. Quare nos pro uirili eum sequamur, qui cælestia ascendit, sententiamque eorum, quæ commemorata sunt, plane rursus indagemus, ut quo luctus genere cognoscamus, proposita sit nobis sancti spiritus consolatio. Atque pri-

primum quidem in uita hominum cōsideremus, quid sane hic luctus est, quauē de causa contrahitur. Illud est igitur omnibus exploratissimum, luctum esse tristēm quandam, acerbamque animi affectionem, quæ ex alicuius rei, quæ cara sit, priuatione concipitur. qui sane luctus loci non in iis habet, qui iucunde uitam traducunt; quasi cui secundus est uitæ cursus, omnia sibi prospera ad uoluntatemque fluere dicuntur. coniuge is lætatur, liberorum prole gaudet, fratrum præsidio munitur, forensi honoris splendore est insignis, principum gratia floret, hostibus formidolosus, iis, qui sibi parent, non contemnendus, in amicis admittendis facilis, opibus circumfluit, uoluptatibus fruitur, suauis & iucundus omniue dolore uacuus, ualido corporis habitu. Qui hæc omnia tenet, quæ mortalium iudicio in honore pretioque esse putantur; hic iucundissimam plane uitam deget; cum harum omnium humanarum rerum lætitia uoluptateque perfruatur. Sin autem aliqua huius prosperitatis uicissitudo fiet, ut aut amicorū dissidium, aut facultatum iactura, aut optimæ corporis constitutioni genus febris aliquod ex malo casu eueniat; tum remoto gaudio contrarius ostenditur habitus, qui luctus nomine apellatur. Itaque uera est, quæ huiusce rei a nobis tradita est definitio; luctum scilicet sensum esse quendam doloris, quo ex rerum nobis carissimarum priuatione afficimur. Si igitur rerum humanarū luctus nobis oratio cognita est; ex iis quidem, quæ iam patefacta sunt uia quædam ad illa aperiatur, quæ plane ignorantur; ut dilucide aperteque intelligatur, quid sane sit is luctus, cui cum adiuncta sit consolatio, tum etiam beatum hominem efficit. nam in hac uitæ usura spoliatio diminutioque bonorum, quæ possidentur,

dentur, luctum parit : eius autem rei , quæ ignoratur, nemo iacturam luget . Itaque intelligere nos primum oportet, quid plane illud sit, quod re uera bonum est: qua re explicata deinde naturæ humanæ cognitionem aggrediamur necesse est. ex hoc enim illud cueniet, ut luctus eius, in quo aliqua inest beatæ uitæ ratio, nos minus recte exequamur : id quod usu iis uenit, qui in tenebris uitam agunt . Cum enim hic in caligine tenebrisque natus sit; ille uero qui luce, quæ extrinsecus affumitur, frui consuevit; si uiolento aliquo impetu est aliquem in locum conclusus, non æque utrumque rerum præsentium attingit calamitas . etenim cum alter animaduertat, qua ipse re orbatus sit, graue sentit lucis damnum: alter autem quoniam huiusmodi lucis beneficium non utique cognouit; minus in dolore uiuet: propterea quod cum in tenebris natus sit atque educatus, pro nihilo ducit his bonis cecidisse. Quo fiet, ut hic, qui fruendæ lucis desiderio tenetur, omne studium, omnem cogitationem in id conferat, ut rursus pristino rerum aspectu fruatur: ille uero alter quoniam quod melius est, id utique perspectum non habuit: si in tenebris uitā traducit, id sibi bono esse iudicat . Ita profecto res se habet in ea, quæ proposita est sententia; is, qui illud uerum bonum aspicere potuit; deinde miseram hanc mortalium uitam animaduertit; hic quasi calamitate accepta animi utique angitur, lugetque hanc uitam, quoniam non in eo plane bono uersatur. Itaque non mæstitiam Dominus beatam dicere uidetur, sed boni illius cognitionem, cui adiunctus est animi dolor: quia in hac uita minus illud inest, quod sane queritur. Quare illud recte sequitur, ut indagemus quæ illa omnino lux sit; qua luce hæc tenebrosa humanæ

N uita

uitæ quasi spelunca in hoc uita spatio nō illuminatur. An fortasse ad id, quod neque explicari, neque comprehendere potest, nostra spectat cupiditas? quæ enim eiusmodi nostra mentis ratio est, ut natura eius, quod quæritur, indagare possit? quæ uel uerborum uel nominum ea uis est, ut cælestis illius lucis nobis notitiam satis digne aperiat? quo ego nomine id dicam, quod sub aspectum non cadit? qua sane ratione id explicabo, quod materia caret? quo pacto ostendam id, quod formæ expers est? quo id modo comprehendam, quod nulla continetur magnitudine? quodue nec ulla qualitate, nec figura, neque loco, neque tempore definitur? quod nullo plane termino, nulla certa definitaque cogitatione concluditur? a quo & uita est, & cuncta bona existunt? in quo alta omnis & mens & nomen consideratur? diuinitas, regnum, potentia, æternitas, incorrupta uis, gaudium, exultatio, omneque denique quod alte uel intelligi, uel dici potest. Ergo qua ratione fieri potest, ut tam excellens bonum cerni queat, quod mente capitur, neque oculis cernitur? quod omnibus rebus uim ac naturam tribuit, ipsumque perpetuo est, neque eo indiget ut existat? Sed ut ne in iis, quæ comprehendere mente nequeunt, frustra longius ducta nostra elaboret oratio; cælestium nos bonorum naturam quasi difficile illam quidem, quæ a nobis explicetur, accurate perquirere desinamus. Illud ex iis, quæ quæsitæ sunt, nos tantum adepti, quod cum, quæ indagauimus, perspicere nos ea minus potuerimus, incredibilem illarum ipsarum rerum, quas quæsiuimus, magnitudinem animo menteque reputemus. Quo autem sublimius, præstantiusque illud esse credimus, quam ut a nobis intelligi possit: hoc magis atque magis dolorem nostrum

nostrum augeamus, quod tale tamque excellens id bonum est, a quo ita nos disiuncti sumus, ut ne cognitionem quidem eius capere possimus. Certe bonum eiusmodi, quod nostram omnem superat mentis uim, est aliquando communicatum nobiscum, qui homines sumus: in naturaque nostra tale inerat bonum id, quod omnem excedit mentis rationē, ut alterum illud humanum ad exemplaris imaginem accurata diligentique imitatione expressum uideretur. nam de illo quæcunque in præsentia mente tenemus, hæc in homine omnia inerant; incorrupta scilicet natura, beatæ uitæ status, libera solutaque omni nexu potestas, uita nullis negotiis implicata, ac doloris expers, in rebus diuinis uitæ nostræ consuetudo, huiusmodique tam excellentis boni ea contemplatio, ut mente a nobis fieret pura; integra, ac nullis plane integumentis inuoluta. nam cuncta hæc paucis sane uerbis occulte illa ostendit, quæ est de origine mundi oratio; in qua scriptum est, ad imaginem Dei creatum esse hominem, in paradiso eum uitam agere, quæue eo loci fata essent, illis omnino frui. earum autem arborum fructus est, uita, scientia; atque cetera id genus eiusmodi, quæ nobis plane inerant. Quid causæ igitur est, cur is, qui miseram hanc uitam cum beatissimo illo uitæ statu comparat, calamitatem lugere non debeat? quod sublime fuit, id iam depressum; quod ad eius qui cælestis est, imaginem expressum, in terram id plane delapsum; cui decretum fuit regnum, id ipsum in seruitutē redactum; quod ad immortalitatē factū, hoc in interitum occidit; quod in paradisi habitauit deliciis, in pestiferam hanc regionē laboribusque plenam commigravit; quod nullis assuetum erat morbis ac perturbationibus, uitam

hanc assumpsit, quæ tum mortalis est, tum omnibus re-
ferta morbis; quod sui iuris fuit, nulliq; potestati sub-
iectum, iam id denique tam multis atque adeo graui-
bus malis quasi uinculis obstrictum tenetur, ut diffici-
le admodum sit enumerare eos; quorum iniquæ pote-
stati subiecti sumus. Siquidem singuli, qui in nobis in-
generati sunt affectus, cum eorum uis superat, tum do-
mini ii quidem illius fiunt, qui eorum potestati pa-
rent: atque illorum quisque quasi tyrânus aliquis arce
animi occupata, male eos uexat, quos inuadit; nostris
cogitationibus quasi administris satellitibusque cû ad
id abutatur, quo eorum cuiusque uis aliquem impel-
lit. Sic ira, sic metus, ignauia, audacia, dolor, uoluptas,
ôdium, amor, inhumanitas, sæuitia, inuidia, assentatio,
ulciscendi libido, doloris uacuitas, & omnes denique
qui contrarii iis intelliguntur in nobis inesse affectus;
tyranni illi quidem ac domini habentur, qui sua pote-
state ac ui animum nostrum quasi in seruitutem abdu-
cant. Sin autem aliquis eas etiam, quæ naturæ nostræ
implicatæ una aluntur, corporis calamitates ratione lu-
strauerit, uaria scilicet ac multiplicia morborum gene-
ra, quorum sane omnium ab initio expers fuit genus
humanum: hic multo maiorem lacrymarum uim pro-
fundet, cum iucunda tristibus, & malis bona compara-
uerit. Quare is qui luctum hunc quambeatissimum
esse dicit, hoc subobscore ostendere uidetur, ut ad id,
quod uerum est, bonum animus spectet, neue huiusce
uitæ fraudibus obruatur. etenim qui rem omnem ac-
curate considerat, non potest is arbitrari se posse absq;
dolore luctuque uiuere: neque qui huius uitæ uolupta-
tibus totum se dedit existimare hic potest, se in rebus
molestis minus uersari. id quod in bestiis animaduert-

tere

tere licet, quibus miserabilis illa est attributa natura: nam quid miserabilius esse potest, quam ratione care-
re? cum illæ scilicet nullum calamitatis sensum plane habeant, sed cum quadam potius uoluptate uitam tra-
ducant. Equus superbit, taurus pedibus excitat pulue-
rem, sus setas erigit, catuli ludunt, saltant uituli; ac sin-
gulas denique bestias spectare licet, quæ certis quibus-
dam signis uoluptatem præ se ferunt. quæ quidem be-
stia, si quale sit rationis officium intelligerët, non in
uoluptate caducam illam suam uitam laborumque ple-
nam ponerent. Hoc idem euenit hominibus, qui cum
nullam bonorum, quibus natura nostra orbata est, co-
gnitionem teneant; in huius uitæ uoluptatibus omni-
no uersantur. Qui uero harum rerum uoluptate te-
nentur, illud consequens est, ut ii non indagent ea;
quæ meliora sunt. quiue minime quærunt, ii profe-
cto non inueniunt, quod quærentibus dumtaxat obtin-
gere solet. Quare lætum Dominus beatum dicit, non
quia eum per se talem esse iudicet, sed propter illud
quidem ipsum, quod ab eo proficiscitur. Verba autem;
quæ adiuncta sequuntur, id propterea lætum beatum
ostendunt, quoniam is ad consolationem accipiendam
maxime adiuuat. Beati enim, inquit Dominus, qui li-
gunt; neque in hoc orationē continuit, sed illud adiu-
xit, quoniam ipsi consolationē accipient. Hoc ipsum
cum magnus Moses præuiderit; uel potius is, qui Mose
ministro usus talia statuit; mysticis Paschæ præceptis
tradendis, panem quidem fermenti expertem ipsis fe-
stis diebus præscripsisse, lactucarumque agrestium ob-
sonium constituisse uidetur: ut ex iis uerborum cognos-
camus obscuris significationibus, mystici illius festi-
diei participes nō aliter esse nos posse, nisi huius uitæ
acer-

acerbitates quasi agrestes lactucæ ultro permisceantur cum sincera illa uita, quæ fermento caret. eamque ob causam summus etiam uir Dauid, quamuis summum humanæ felicitatis gradum, nempe regnum se obtinere cerneret; harum tamen siluestrium lactucarum copiam uitæ suæ affert, cum & lamentabili uoce deplorat, lugeatque huius uitæ terminum longius sibi produci; & præ rerum maiorum cupiditate sæpe deficiat. modo enim ait; Væ mihi quoniā incolatus meus prolongatus est. alio autē loco cum diuinorum tabernaculorum attente aspiceret pulchritudinem; præ desiderio quodam se deficere ait; illudque sibi potius esse iudicat, in postremis illic esse, quā in his humanis rebus tenere primas. Verum si quis huius beatissimi luctus uim accuratius considerare uelit, id plane animaduertat, quod & de Lazaro, & diuite homine commemoratur: in qua quidem cōmemoratione eiusmodi præceptum dilucidius explicatur. nam recordare (ita enim diuitem Abrahamus alloquitur) quod recepisti bona tua in uita tua; & Lazarus similiter mala: iccirco nunc hic consolationem habet, tu uero cruciaris. Hoc enim consentaneum est; siquidem temeritas nostra, uel potius malum consilium a Dei curā, quam ille generis humani habet, nos abduxit. Etenim cum simplex quoddam bonum, ab omniq̃ malo uacuum, ille nobis ad fruendum proposuisset, uetiuissetque ne cum bono mali confunderetur usus; quoniam præ aueritate nos contraria re ipsi expleuimus, diuinæ inquam uoluntatis contemptum degustauimus; hanc ob causam hominum genus in hac utraque re omnino uersetur oportet, ut modo dolorem, modo lætitiā sentiat. Sed cum duplex sit uitæ tempus, atque duplex in utroque tem-

tempore uitæ ratio, duplex æque lætitiæ est; una quidem, quæ ad hoc uitæ tempus pertinet, altera ex iis constat, quæ nobis ad sperandum proposita sunt: bene quidem cum eo agitur, qui eam lætitiæ partem, quæ ex ueris bonis capitur, in sempiternum illud uitæ tempus sibi reiiicit; in hacque uel breuissima mortaliue uita partes explet doloris: neque fraudi sibi esse putat, si quibusdam rebus, quæ in hac uita iucundæ sunt, priuatus est: sed quoniam his rebus fruitur, rerum meliorum iacturam facere arbitratur. Quare si quam beatissimum est, sæculis illis sempiternis immortale habere gaudium, quod in perpetuum producit; hominumque genus dolorem plane sentiat necesse est: non amplius certe difficile est Domini sententiam cognoscere, quare beatos eos dicat, qui lugent; quoniā sempiternam scilicet consolationem capient. quæ quidem consolatio a paraclæti consuetudine familiari proficiscitur. siquidem propria sancti spiritus actio in eo est, ut consolationem præbeat: qua nos digni habiti sumus benignitate gratiaque Iesu Christi Domini nostri, cui gloriā lausque in perpetuum. Amen.

CONCIO IIII.

Beati qui esuriunt, ac sitiunt iustitiam: quoniam ipsi saturabuntur.



VI ex stomacho laborant, cibosque fastidiunt; cum mali quidam humores in superiorem illorum uentrem coquant; uideri hos sibi semper expletos esse, ac saturatos, tradunt ii, qui medicinæ tenent scientiam: propterea que illos aiunt utile reiiicere nutrimentum, quoniam

niam falsa quadam satietate naturalis eorum tabescit appetitus. Sin autem ex medicinæ usu illis aliqua affertur curatio, ut aliquo acri scilicet medicamento adhibito ea expurgentur, quæ concavos stomachi locos opulent: hoc pacto fit, ut quod alienum est atque contrarium, cum id non amplius naturam perturbet; illorum appetitus ad eum excitetur cibum, qui nutriendi vim habet: commodæque valetudinis hoc signum esse uolunt, quod non inuiti amplius, neque coacti, sed audi atque maxime appetentes ad cibum capiendum accedunt. Hæc igitur mei exordii ratio quorsum attinet? quoniã ad sublimiores beatæ uitæ gradus ordine progrediens nos perducit Dominus, qui ut apud prophetam scriptum est, honestas in corde nostro ascensiones disposuit; is post illos, quos supra ostendit, ascendendi gradus, hanc quartam aliam ascensus rationem demonstrat iis uerbis: Beati qui esuriunt, ac sitiunt iustitiam, quoniam ipsi saturabuntur. Equidem recte cum iis agi arbitror, qui multa illa animi satietate expleta beatissimã huius cibi & potionis appetitionem, quoad eius fieri potest, sibi comparant. Neque enim fieri potest, ut homo recte ualeat; nisi cibus, qui ad nutriendum satis sit, uires sustentat; neque ut cibo expleatur, si minus ille comedit; neque ut nutriatur, si appetitu caret. Itaque quoniam in hac uita robur est in corporis bonis; idque satietate, quæ satis commoda sit, conseruatur; satietas autem a cibo existit, cibusque ab appetitu; iis certe, qui uiunt, beatissima res est appetitus, utpote a quo naturalis nostri roboris initium causaque existat. Sed quemadmodum in hoc corporis cibo non eadem omnes appetunt; sed ut ciborum genus est, ita coniuarum diuersa est appetitio; ut unus quidem dulcibus

cibus delectetur, alius res acres, & quæ calefaciendi uim habent, appetat; alius salis rebus; alius iis rebus, quæ ad astringendum ualent, cum uoluptate uescatur; sæpeque fit, ut quæ cuique minus expedit, hæc sibi innascatur cibi appetitio. Siquidem propria aliqua corporis constitutione aliquis est, ut ad malū aliquod procliuius sit: hic morbum alit illis cibis, quorum qualitas aliena est: sin autē ad ea, quæ salutaria sunt atque utilia, trahitur appetitus, integra plane ualitudine ille utitur; cum optimū corporis habitum ei conseruet ciborum delectus. Eodem etiā modo in animi cibo nō omnium eodē referuntur appetitiones. nam alii gloriā, aut opes, aut dignitatum splendorem expetunt; alii tempestiuus conuiuuiis delectantur; nōnulli inuidiam quasi cibū ueneni plenum auide sumunt; plerique uero sunt, qui ad id, quod natura honestum est, cupitate ducuntur. Illud autem natura honestum est, quod perpetuo tale est; quodque non propter aliud, sed propter se est expetendum; cumque eodem se modo semper habeat, nulla satietate labefactatur, iccirco beatos Dominus dicit non simpliciter eos, qui esuriunt; sed illos, quorum cupiditas ad ueram iustitiam propensa fertur. Ergo quid est iustitia? hoc enim primum oratione explicandum arbitror, ut cum eius pulchritudo perspecta sit, hoc pacto ad rei conspectæ formam nostra excitetur cupiditas. quoniam fieri non potest, ut eius rei, cuius species nulla apparet, cupiditate aliquis afficiatur; sed languescit quodammodo nostra natura, neque impellitur ad id, quod plane ignorat; nisi uel aurium, uel oculorum sensu id ipsum percipiat, quod sane expetitur. Quare qui res eiusmodi diligenter indagarunt, hi quidē iustitiam esse dicunt habitum quendā, qui pro dignitate

O cuique

cuique tribuit, quod tribui æquum est. Exempli causa, aliquis, qui pecuniæ largiendæ distribuendæue potestatem habet, cum id quod æquum est, animaduertat, quodue accipientium usui conuenit, ad id largitionem accommodet, hic iustus appellatur. atque si quis iudicandi potestate præditus, neque gratia, neque odio motus sententiam fert, sed causarum naturam secutus, eos, qui supplicio digni sunt, damnat; innocentes uero plane absoluit; ac de ceteris item controuersis uere statuit, is etiam iustus dicitur. Qui subiectis quoque populis tributum imperat, idque tale imponit, quod illorum facultatibus æque conueniat. pater item familias, & ciuitatis princeps, & gentium rex; hi singuli si congruenter rationi recteque illis imperant, qui suæ potestati subiecti parent; neque ex illa potestate subito quodam impetu mouentur; sed recta ratione illis ius dicunt, atque ad sententiam eorum, qui parent, consilia accommodant: hæc omnia iustitiæ definitioni tribunt ii, qui eiusmodi habitu id, quod iustum est, definiendo explicant. Ego uero, qui diuinæ legum constitutionis altitudinem contemplor, hoc iustitiæ nomine aliquid plus, quam ea, quæ commemorata sunt, comprehendi animaduerto. Nam si ad omne hominum genus salutaris hæc oratio pertinet; neque cuiusuis tamen est hominis in illis, quæ proposita sunt, muneribus obeundis uersari; siquidem paucorum est imperare, præesse, ius dicere, pecunias habere, aut alias res dispensare: homines uero maximam partem tales sunt, qui subiecti aliorum imperio potestateue tenentur. Quo igitur modo demonstraret aliquis iustitiam ueram illam esse, quæ non omnibus æque proposita est? Si enim, ut externis philosophorum disci-

sciplinis traditur, æqualitatis ratio est iustitiæ propo-
 sita: id autem, quod præstat, inæqualitatem in se ha-
 bet, non potest, quæ tradita est, iustitiæ definitio uera
 putari: quoniam hac inæquali uitæ conditione sta-
 tim refellitur. Quare quæ iustitia illa est, quæ ad om-
 nes pertinet, cuiusue cupiditas communis proposita
 est omnibus, qui euangelii mensam sibi ob oculos po-
 nunt? Siue diues aliquis sit, siue pauper, siue domi-
 nius, siue seruus, siue ingenuus, siue libertinus; cum
 nullus fortunæ status neque augeat, neque imminuat
 iustitiæ rationem. Si enim in eo solum, qui potestate
 præstat, atque alia re excellit, hoc iusti nomen pone-
 retur: quo modo iustus Lazarus, qui ad ostium diuitis
 abiectus, nullam eiusmodi iustitiæ materiam habuit?
 non imperium, non potestatem, non domum, non
 mensam, neque aliud tale in uita sibi ille comparauit,
 quo eiusmodi iustitiæ munus exequi posset. Nam si
 uel in imperando, uel in tribuendo, uel in aliqua omni-
 no re gubernanda iustitiæ munus positum est, longe is
 abest, ut iustus sit, qui in earum rerû administratione
 non uersatur. Ergo quo modo is, qui res eiusmodi nul-
 las habuit, quibus iustitiæ ratio ex uulgi opinione de-
 scribitur, requiete dignus habitus est? Itaque illa ius-
 titia est a nobis quærenda, quam qui expetierit, ei re-
 quies promissa est: Beati enim, inquit, qui esuriunt, &
 sitiunt iustitiam, quoniam ipsi saturabuntur. Cum
 multa uariaque ad usum proposita sint, ad quæ maxi-
 xime hominum appetendi uis trahitur, multa nobis
 cognitione opus est, ut in cibis eiusmodi diiudicemus,
 qui esui apti sint, quiue contra noceant; ut ne quod ab
 animo pro cibo capi uidetur, mortem pro uita ac ta-
 bem nobis efficeret. Sed fortasse non alienum est qui-

busdam aliis rebus, quæ ex euangelio petuntur, huius ipsius rei sententiã explicare. Is, qui, peccato excepto, omnia nobiscum communia habuit; laborumq; & in commodorum nostrorum particeps fuit; famem peccatum nõ iudicauit, neque huius incommodi periculum facere recusauit; sed naturalem quandam cibi appetendi uim ostendit. Cum enim quadraginta dies ieiunus fuisset, postea esuriit. Siquidem cum uoluit, occasionem naturæ dedit, ut suo fungeretur munere. At tentationum auctor cum illum etiam esurire animaduertit, id ei suasit, ut lapidibus appetitũ exciperet. hoc autem est a naturali cibo appetitionem auocare ad ea, quæ a natura abhorrent. Dic enim ut lapides isti, inquit, panes fiant. Quid peccati agricultura admisit? cur semina reiecta sunt, ut eorum cibus in nullo sit pretio? cur summi opificis dānatur sapientia? quasi nõ iis, quibus oportet, frugibus hominum genus alat. Etenim si lapis ad uictum accommodatior iam uideretur, certe a prouidentia & a cura, quã Deus ad hominum uitam sustentandã habet, aberrauit eius sapiētia. Dic ut lapides panes fiant. Iam hæc ipsa dicit iis qui a suo attentantur habitu; sæpeq; dicendo suadet, ut qui eũ intuentur, panem ex lapidibus conficiant. nam cum eos, qui ad necessarium usum pertinent, fines transilit appetitio; hoc quid aliud est, quam consilium diaboli, qui frumenti cibum reiecit, appetitionemque ad ea excitat, a quibus est aliena plane natura? Lapidibus ii uescuntur, qui auaritiæ panem apponũt; qui uē sibi ex rebus male partis opulentas & copiosas struunt mensas, quarum apparatus est pompa quædam rebus ad uitæ usum minime necessariis exquisita, quæ uulgi admirationem commoueat. nam cum necessario naturæ usu commune
quid

quid habet grauis quædam propofita auri atque argenti uis & copia, quæ ad cibum plane non pertinet? famis affectus quid eft, niſi rei neceſſariæ appetitio? etenim ſpiritus ui diſſipata, id, cui deeft, conuenienti quodam rurfus repletur additamento. Panis uero aut alius aliquis cibus eiufmodi eſt, quem natura appetit: Itaque ſi loco panis aurum aliquis ori admouet, an hic neceſſitati remedium afferet? Ergo cum pro cibus quiſpiam eas res quærit, quæ ad eſcam non pertinent, in lapidibus is plane uerſatur; utpote cum aliud natura poſtulet, in alia tamen re ipſe operam ponat. Natura, quæ fame afficitur, quaſi uocē emittens, ſe in præſentia cibi egere clamat; oportereque propterea rurfus corpori id inferre, quod ſpiritus uis diſſipauerit. Tu uero naturam non exaudis; quoniam non ei das, quod ipſa petit; ſed curam in eo ponis, ut in menſa maximam uim habeas argenti; uaſcularioſque & cælatores quæris, atque imaginum, quæ argento cælentur, hiftoriam accurate inueſtigas; ut & affectus & mores accurata quadā ſculptura expreſſi in iis cōſpiciantur; ut armati hominis animi ſpectentur, cum gladiū is ferendi cauſa ſtringit: uulneratq; cruciatus cernatur, cū is mærenti abiectoque animo uidetur habitu ipſo plorare ac gemere; uenantisque impetus, & feræ immanitas ſculpta aſpiciatur, & quæcunque alia ſunt, quæ homines rerum inanium cupidi ſtudioſe in iis exquirunt, quæ ad menſam pertinent. Panem natura poſtulat, tu pretioſas menſas, pelues, crateras, amphoras, atque alia ſexcenta eleganter paras; quæ cum earum rerum, quæ natura expetūtur, uſu nihil habent omnino cōmune. An non ex iis, quæ ipſe facis, aperte cognofcis te illi parere, qui lapidis cibum tibi ſuadet? Quid? ſi quis ſœda huius lapidei

pidei cibi spectacula alia, & turpes sermones cōmemoret, quibus ad ea, que ordine sequuntur, uitia sibi adiutum homines ii aperiant, qui rebus ad intēperantiā incitamentum pertinentibus cibum condiunt? Hoc de eiusmodi cibo consiliū aduersarii plāne est; talia enim ille prācipit, cū pro pane, qui cibis nobis prāscriptus est, lapidem suadeat. Sed is, qui tentationum euerfor est, famem a naturæ finibus non repellit, quasi eam, a qua malorum causa existat: sed superuacaneam hanc diligentia, quæ aduersarii consilio in uitæ nostræ usum introducta est, cum ipse abiecerit, naturā permittit suis finibus teneri ac gubernari. Sicut qui uinum colant, nō propter fæces quæ in eo mixtæ insunt, illius usum aspernantur; sed colo cum superuacanea secernāt, puri uini usum retinent: sic Dominus res a natura abhorrentes cum distingueret, subtili quadam contemplatione famem non repulit, utpote quæ uitæ nostræ cōseruatric est: sed superuacaneas curas, quæ huic uitæ usui implicatæ sunt, eas omnino repulit atque abiecit: cum cum cibum, qui uerbo Dei ad naturam accommodatus est, panem esse dicat. Itaque si Iesus esuriit, res certe beatissima est fames, quæ ad illius imitationem nobis inna scitur. Si igitur nos id cognoscimus, quod esuriit Dominus; huius etiam beatitudinis, quæ nobis iam proposita est, uim omnino sentiemus. Qualis igitur sit is cibus, quem appetere Dominū non pudet; in eo sermone, quem cum Samaritana muliere habuit, ostēdit his uerbis; Meus cibus est, ut faciam uoluntatem patris mei. perspicuum autem est, patrem meum id maxime uelle, ut salui fiant omnes homines; ueritatemque cuncti plane cognoscant. Itaque si nostrā salutem ille expectit; uitaque nostra ei cibus est; iam didicimus ad quem usum

usum spectare debet hæc animi nostri uoluntas. Quid igitur hoc est? ut nostram scilicet salutem nos expetamus; cupiamusque in primis Dei obsequi uoluntati, quæ in eo sita est, ut salui nos efficiamur. quæ itaque ratione hoc recte præstare possimus, iam e beatitudine cognouimus. qui enim Dei iustitiam expetiuit, is illud inuenit, quod re uera appetendum est; cuius cupiditatem expleuit non uno aliquo modo, qui appetitione perficitur: non enim solum iusti societatem tanquã cibum expetiuit: quoniam semiperfecta esset, si in hac sola affectione uersaretur appetendi uis. nunc autẽ hoc bonum tale effecit, quod potui etiam esset aptum; ut sitis affectu flagrantem ostenderet cupiditatem. Nam cum sitimus, aridi quodammodo atque ardentessumus; ideo potum quasi huiusce affectionis remedium cum uoluptate sumimus. Itaque quoniam genere ipso una est & cibi & potionis appetitio; sed ad horum utrunq; distincta est affectio; ut summã ad hoc bonum, cupiditatem nobis Dominus præscriberet; beatos dicit eos, qui duobus his affectibus, & fame & siti ad iustitiam mouentur: quasi id, quod expetitur, idoneũ sit, quod æque utrique accommodetur appetitioni; ut esurienti quidem cibus; ei uero, qui gratiæ siti trahitur, sit potus. Beati qui esuriunt, & sitiunt iustitiam: quoniã ipsi saturabuntur. Ergo Dei iustitiam expetere, hoc beatissimum est. Sin autem aliquis aut temperantiæ, aut prudentiæ, aut sapientiæ, aut alius cuiusdam item uirtutis cupiditate tenetur; an hunc Dominus beatum iudicat? Sed hoc, quod dicitur, fortasse aliquid eiusmodi significat; res enim una, quæ uirtutis nomine continetur, iustitia est. Sæpe in sacris litteris id uisum est, ut patris mentione facta uniuersum

sum comprehendatur. uerbi causa cum diuinam naturam aliquo nomine demonstrat. nam ex persona Domini propheta inquit : Ego Dominus, hoc est nomen meum æternum : & memoriale generationibus. & rursus alio loco ait: Ego sum, qui sum. & alibi: Misericors sum : atque sexcentis aliis nominibus, quæ excelsum aliquid, quod Deo conueniens sit, significant; Deum sacræ litteræ appellare solent : ut ex iis diligenter cognoscamus, si unum aliquod Dei nomen sacris litteris expressum sit, omnem illam nominum enumerationem una cum eo tacite dici ac significari. Fieri enim non potest, ut reliqua non contineantur in eo, cum appellatur Dominus. quin potius uno expresso nomine cuncta alia dicuntur. Itaque in diuinarum litterarum consuetudine illud positum esse ex iis cognouimus, ut in aliqua parte multæ contineantur partes. hoc igitur loco cum Dominus iustitiam iis proponi dicat, qui beatam uitam expetunt; hoc iustitiæ nomine omne uirtutis genus significat: ut æque beatus sit etiam is, qui prudentiam, fortitudinem, & temperantiam colit; siue quid aliud, quod ipso uirtutis nomine comprehenditur. nam uirtus aliqua, quæ cum ceteris uirtutibus non connectitur, ipsa per se perfecta esse non potest. qua enim in re non aliquid una consideratur, quod uirtutis nomine intelligitur, in ea res contraria locum habeat omnino necesse est. Temperantiæ opposita repugnat intemperantia; prudentiæ stultitia; & omni denique rei, quæ ad bonum spectare putatur, est aliquid omnino, quod ei repugnare intelligitur, Quamobrem nisi cuncta simul iustitiæ nomine intelligerentur; difficile sane esset, quod reliquum est, id bonum esse. non enim iustitiam aut imprudentem,

tem, aut audacem, aut intemperantem aliquis dixerit; aut alio aliquo nomine appellauerit, quod ad uitium pertineat. Si igitur omnis rei pessimæ expers est iustitiæ ratio: omne in se bonum plane continet. quod uero cunque de uirtute intelligitur, id omne bonum est. Ergo uirtus omnis hoc loco iustitiæ nomine demonstratur: quam iustitiam qui & esuriunt, & sitiunt, eos Dominus beatos dicit; cum eorum, quæ expetuntur, satietatem ipsis promittat. Beati enim, inquit, qui esuriunt & sitiunt iustitiam: quoniam ipsi saturabuntur. Hæc autem uerba sententiam eiusmodi continere mihi uidentur: nullas eas res, quæ ob uoluptatem expetuntur, satietatem iis afferre, qui illarum appetitione ducuntur; sed studium, quod in uoluptatibus ponitur, esse, ut quodam loco Sapientiæ uerbis proditum est, uelut dolium perforatum: quo sedulo semper cum infundant ii, qui eo studio tenentur, infinitum quidem atque inutilem ostendunt laborem; utpote cum in appetitionis profundū aliquid semper infundant; quodq; ad uoluptatē pertineat, id assidue adiiciant, cupiditatem hi nunquam explent. Quotusquisq; est, qui norit auaritiæ fines ex eo, quod auaris accessio facta est eius rei, cuius auidi atque appetentes erant? Quis gloriæ cupidus ea quærere destitit, quæ in optatis habuit? Qui uero uel auditionibus, uel spectaculis, uel insanis iis rebus, quæ ad uentrem pertinent, uoluptatem expleuit? quid is inuenit, quod ex hac ipsa uoluptate sibi obtineret? an non omne, quod corpore expletur, uoluptatis genus, simul ac accessit, cito abit, cum uel breuissimum quidem tempus permaneat in iis, qui illam perceperint? Itaque illud a Domino diuinum præceptum nos cognoscimus, quod in sola uirtute studium

a nobis ponitur, id solidum esse, ac plane firmum. nam qui rerum magnarum atque sublimium perfecto functus est munere, ueluti temperantiæ, aut modestiæ, aut religionis erga Deum, aut alia euangelica diuinaque præcepta recte coluit: hic a singulis illis rebus, quarum munus recte executus est, lætitiæ capit, non fluxam illam quidem & caducam, sed firmam ac perennem, quæ uel in omne uitæ tempus producit. Quid causæ est? quoniam hæc quidem semper agere licet; neque ullum est temporis momentum, quod in omni uitæ spatio optimarum actionum afferat satietatem. Etenim dum aliquis uirtutem sibi proponit; is continentiam, integritatem, in omnique bono constantiam colit, uitiumque declinat; unaque cum illa uirtutum actione iunctam habet lætitiæ sempiternam. Qui uero cupiditatibus ardent, quæ rationi minime conueniunt; eorum animus etsi ad libidinem assidue spectat, gaudere tamen illi non possunt. cibi enim immoderata auiditas satietate reprimatur, & potantis uoluptas una cum siti extinguitur: eodemque modo cetera aliquo temporis interuallo egent, ut quæ præ uoluptate languescit, rursus rei illius suauis excitetur appetitio. At uirtus ubi semel quibusdam infixæ hæserit, non temporis modo finitur, neque satietate terminatur; sed integrum & recentem acremque bonorum suorum, sensum illis semper præbet, qui eius rationi conuenienter uiuunt. Itaque Dominus affirmat, eos, qui illam esuriunt, satietate expletum iri, non quæ appetitionem debilitet, sed quæ magis accendat. Quod igitur in summo contemplationum monte Dominus differendo nos docet, illud sane est, ut cupiditatis nostræ uim ad nullas res eiusmodi adiungamus

gamus, quarum nullus finis propositus est iis, qui illas concupiscunt; cum eorum studium inane sit, neque plane utile. id quod iis euenit, qui umbræ suæ uerticem cursu assequi contendunt; quorum cursus in infinitum fertur; cum id, quod illi persequuntur, celeriter eo elabatur, quo insequentium cursus festinat. Sed cupiditatem ad eas res adiungamus, in quibus studio adhibito certa expetenti paratur possessio. nam qui uirtutis cupiditate affectus est, possessionem sibi certam comparat, quoniam in id incumbit, quod sibi bono est. Itaque bene cum eo est, qui continentiae studio tenetur, quoniam integritatis plenus erit. hæc uero expletio, ut dictum est, non fastidium, sed uehementem appetitionis uim affert; & utrumque æque inuicem augetur. nā cum uirtutis cupiditatem possessio consequatur rei, quæ expetitur; tum bonum illud, quod obtigit, immortale animo gaudium peperit. quoniam boni huius natura eiusmodi est, ut non in præsentia modo eum, qui illius fructum capit, delectet; sed omni tēpore maximam illi præbeat lætitiā. nam recte factorum conscientia, beneque actæ uitæ recordatio gaudium ei gignit, qui recte egit: honestaq; præsentis uitæ ratio, atque remunerationis item spes delectat: quam aliam quidem nullam esse duco, quam ipsam uirtutem: in qua cum actio uersetur eorum, qui bene agunt; tum præmium illis proponitur, qui recte egerunt. Verum si audacter aliquid dici oportet; fortasse, mihi uidetur Dominus, facta uirtutis & iustitiæ mentione, eorum, qui audiunt, appetitioni seipsum proponere; qui factus est nobis sapientia Dei, iustitia, sanctificatio, & redemptio; qui etiam panis, qui de cælo descendit, & aqua uiuens; quam Dauid, cum beatif-

simum hunc animi affectum Deo præ se ferret, admodum sitire se ostendit his psalmi uerbis; Sitiuit anima mea ad Deum fontem uiuum: quando ueniam, & apparebo ante faciem Dei. Qui Dauid spiritus uirtute instructus magna hæc & diuina præcepta, eiusmodique appetitionis satietatem prædixisse uidetur. Ego enim, inquit, in iustitia apparebo conspectui tuo: satiabor cum apparuerit gloria tua. Hæc igitur, meo quidem iudicio, uera uirtus est, bonum scilicet illud, quod mali expers est, in quoue omnis earum rerum, quæ ad bonum spectant, contemplatio continetur. ipse Dei sermo uirtus est, quæ cælos aperuit, ut Ambacum exponit. Atque optimo quidem iure qui hâc Dei iustitiam esuriunt; hi in beatis numerantur. nam re uera qui Dominum, ut in psalmis dicitur, degustauit; hoc est in sese Deum recepit; hic expletur eo, quod & esuriuit, & sitiuit, quemadmodum ab eo promissum est, qui dixit; Ego & pater ueniemus, & mansionem apud eum faciemus, spiritu sancto uidelicet prius habitante. Eodem modo magnus item ille Paulus, qui reconditos illos paradisi fructus gustauit, tum iis rebus, quas degustarat, satiatus esse, tum semper esurire uidetur. etenim se expletum eo esse, quod appetebat, ostendit his uerbis, Viuit autem in me Christus. quasque esuriens, ultra progreditur, cum ait: Non quod iam apprehenderim, aut iam perfectus sim, sequor autem, si etiam comprehendam. Detur enim nobis, ut arbitrato nostro aliquid exempli causa esse dicamus, quod minus in rerum natura habeatur. Ut igitur in cibo, qui sub gustatum cadit, si nihil, quod ad alendū capitur, tanquam superuacaneum abiiceretur, sed id omne assumeretur, ut corporis procreati accessio fiat; in multam altitudinem

nem corpora sese tollerent; cum cibis quotidianus satis per se augeret magnitudinem : sic iustitia uirtusque omnis illi adiuncta quoniam ueluti mentis esca comesta non eiicitur ; altius per se tollit semper illos , qui ea præditi sunt , utpote cum ipsius frequens accessio magnitudinem amplificet . Quare si fames illa , quæ beatum hominem efficit , est nobis cognita , omni superuacaneo eiecto uitio , iustitiam Dei appetamus , ut eius satietate expleamur , auctore Christo Iesu Domino nostro , cui gloria ac potentia in sempiterna sæcula . Amen .

CONCIO V.

Beati misericordes , quoniam ipsi misericordiam consequentur .



ORTASSE , cum Iacob scalā , quæ a terra ad summum cælum pertineret ; Deumq ; ei innixum per quietem uidisset ; hoc quod uisione ea oblata obscure ille cognouit , aliquid eiusmodi est , quod in præsentia quidem ea , quæ de beatæ uitæ rationibus traditur , disciplina nobis præstat ; cum illos , qui per eius gradus ascendunt , ad ea , quæ sublimiora sunt , contemplanda altius euehat . nam scalæ specie in somnis oblata , illam patriarchæ formam uiuendi præscriptam censeo , quæ uirtuti maxime conueniret : ut & ipse cognosceret , & posteris traderet , nõ ullo alio modo fieri posse , ut ad Dei contemplationem sese aliquis erigat , nisi , quæ cælestia sunt , ad ea ipsa assidue cõtueatur , rerumque sublimium perpetua cupiditate ducatur : ut non satis illi sit , in iis , quæ
iam

iam recte egerit, permanere; sed fraudi sibi esse putet, nisi quæ cælestia sunt, ea assequatur. Atque hoc quidem loco beatitudinum, quæ inuicem sibi cohærent, altitudo effecit, ut ad Deum ipsum, qui uere beatus est omni que beatitudine firmatus, proxime accedamus. nam omnino ut sapientiæ studio ad sapientem, & & integritatis ope ad integrum uirum nos conferimus: sic adhibitis beatæ uitæ rationibus cum eo conciliamur, qui beatus est. Etenim Dei uel maxime propria est beatæ uitæ ratio: id propterea eiusmodi item scalæ Deum innixum esse Iacob narrauit. Itaque cum aliquis beatitudinum particeps sit, hoc nihil aliud est, nisi illa diuinitatis cōmunio ac societas, ad quam ineundam Dominus his uerbis aditum nobis uiamque aperit. Igitur in hac, quæ ordine proposita est beatæ uitæ ratione explicanda uidetur mihi Dominus cum quodammodo Deum efficere, qui hæc uerba & audit & intelligit: Beati enim, inquit, misericordes, quoniam ipsi misericordiam consequentur. Ego multis sacrarum litterarum locis, Dei potestatem misericordis nomine a sanctis uiris appellari scio. sic in psalmis Dauid, sic in prophetia sua Ionas, sic multis legis locis magnus Moses Deum nominat. Ergo si misericordis nomen Deo maxime accommodatum est; quid aliud est, ad quod Dominus te uocat, nisi ut cum propriam diuinitatis formam susceperis, Deus ipse efficiaris? nam si diuinis litteris misericors appellatur Deus, resque uere beata est Diuinitas: id, quod ordine sequitur, ut intelligatur, perspicuum plane est; nempe ut si homo aliquis est qui misericordia utatur, hic utique dignus sit diuino beatæ uitæ statu; quoniam in eo uersatur, cuius nomine Deus appellatur. Deus misericors & iustus:

&

& Deus nostri miseretur. Quo igitur pacto fieri potest, ut beatum illud non sit, uocari atque esse hominem, qui ex actione Deus nominatur? At diuinus item Apostolus orationibus suis maiora nos munera expetere suadet. Nobis autem illud quidem propositum est; non ut res honestas cupere in animum inducamus; quoniam hoc ipsum hominum generi est a natura tributum, ut sua sponte illi ad honestum propensi ferantur; sed ut ne in eo, quod honestum est, diiudicando fallamur. nam in hac potissimum parte errat uitæ nostræ ratio; quia non satis diligenter cognoscere potest, quid natura honestum sit, quidue tale falso putetur. Etenim si uitæ nudum propositum esset uitium, neque aliqua esset honesti specie coloratum, nunquam sane ad illud sese genus hominum contulisset. Quare cognitione nobis opus est, ut propositæ sententiæ uim cognoscamus; cumque illius sententiæ, quæ ei dicto subiecta est, ueram cognouerimus pulchritudinem; ad eam nos conformemur. nam ut cunctis hominibus de Deo a natura insita est opinio; sed quoniam ignoratur is, qui uerus est Deus; ideo peccatur in eo, quod colitur. Si quidem alii eam, quæ & in patre, & in filio, & in spiritu sancto cernitur, ueram diuinitatem colunt & uenerantur; alii cum in opiniones inciderint, quæ a ratione plane discrepant; naturæ creatæ eiusmodi cultum tribuendum putarunt; idque propterea cum non in exigua re a ueritate aberrarint, impietati aditum patefecerunt. pari ratione in ea, quæ proposita est, sententiâ, nisi ueram illius significationem perceperimus; non in exigua quidem re nos damnum faciemus, si in ueri indagatione peccabimus. Ergo quid plane misericordia est, in cuiusue rei actione uerlatur? quouero modo sit,
ut

ut beatus æque sit is, cui misericordia tribuitur, atque ille, qui tribuit? Beati enim, inquit, misericordes, quoniam ipsi misericordiam consequentur. Atque huius quidem dicti ea, quæ in promptu est, sententia ad mutuam & caritatem, & commiserationem hominem inuitat, cum inæquabilis sit ac uaria humanarum rerum condicio; neque pari omnes uitæ statu sint; siue hoc ad dignitatem, siue ad corporis constitutionem, siue ad reliquas attineat facultates; nā contrariis inter se rebus, utpote seruitute & libertate, diuitiis & paupertate, gloria & ignominia, aduersa & cōmoda corporis ualitudine, cunctisq; aliis rebus eiusmodi distributus est uitæ nostræ status. Quare ut id, cui deest, par fiat atque æquale illi cui abundat; expleaturq; parte nimia id, in quo parum est; illud præscribit, ut homines eorum misereant, qui imbecilliores sunt: quoniam nō aliter fieri potest, ut ad aliorum calamitates subleuandas quis impellatur, nisi ad eiusmodi motum misericordia eius animum leniter impulerit: ex re enim, quæ immanitati contraria est, cognoscitur misericordia. Vt igitur is, qui ferus est, atque immanis difficilem se adcurrentibus præbet; sic qui ex alienis incommodis dolore atque commiseratione afficitur, is cum sese ad id accommodet, quod sollicitus dolentis animus requirit, cum illo affectione quodammodo se permiscet. Atque misericordia quidem, uerbi causa si quis eam definiendo explicaret, dolor quidam est, qui ex alienis calamitatibus sponte contrahitur. Sin autem non satis accurate eius uim expressimus; fortasse alia quidem definitione apertius explanabitur. Misericordia est affectio quædam, quæ uim amoris habet erga eos, qui rerum quarundam molestarum dolore cruciantur. Nam ut im-

ma-

manitas & feritas ab odio originem causamque ducunt; sic ab amore caritateque quodammodo existit misericordia; quæ utique non esset, nisi ab ipsa amoris uir nasceretur. Ac si quis diligenter inuestigaret misericordiam uim ac naturam; cognoscet plane summam esse affectionem, in qua amor inest cum dolore coniunctus. Rerum enim secundarum omnes tum æqui tum iniqui expetunt se socios ac participes fieri; in rebus uero aduersis hoc solum ii cupiunt & uolunt, qui amoris uinculo astricti tenentur. Sed amoris quidem uim omnium rerum, quæ in hac uita expetuntur, præstantissimam esse constat: amoris autem uis in misericordia posita est. Itaque proprie beatissimus est is, cuius animus affectu eiusmodi astrictus est, quasi is sit, qui summam assecutus sit uirtutem. Ac nemo uirtutem hanc in iis solum rebus consistere arbitretur, quæ illi subiectæ sunt: hac enim ratione non cuiusuis hominis esset munus eiusmodi recte præstare; sed illius solum, qui aliquam benefaciendi haberet facultatem; sed rectius mihi esse uidetur eiusmodi officii genus ex uoluntate existimari. nam qui optima tantum est uoluntate; quo minus autem benigne faciat, prohibetur, quoniam non potest; hic animi uoluntate non eo inferior est, qui factis suam præstitit uoluntatem. Quare si quis in hanc partem accipiat huius beatitudinis sententiam; quantus uitæ afferatur fructus, superuacaneum est disserere; cum uel rudibus imperitisque hominibus perspicua ea sint, quæ uitæ ex hoc consilio recte eueniant, nam; uerbi gratia, si omnibus hæc animi uoluntas erga eum inesset, qui inferior est; neque rei superioris ulla amplius esset condicio, neque contrariis inter se nominibus distincta esset uitæ ratio: non

Q homi-

hominem affligeret paupertas, non seruitus deprimeret, nō ignominia molestiam illi afferret: omnia enim essent omnibus paria; æqualisque & bonorum distributio, & nominum appellatio in uita hominum constitueretur; si quod præstat ultro ei adæquaretur, cui plane deest. Sin autem hoc ipsum eueniret, nulla amplius reliqua esset inimicitiarum materia, nulla inuidia, nullum odium, nulla ulciscendi libido; mendacium, insidiæ, bellum, ceteraque sublata essent omnia, unde illa plus habendi manat cupiditas. Cum uero illa, quæ affectuum plena est uoluntas, abiicitur, una cum ea, quasi cum mala aliqua radice uitiorū semina conuelluntur: quibus sublatis uirtutum quasi cæterua succedet; pax, iustitia, omnisque rerum, quæ ad bonum spectant, ordo. Quid igitur beatius est, quam ita uitam instituire, ut non amplius uerbis ac septis uitæ præsidium committatur, sed mutuis sit officiis munitum? Etenim ut is, qui immitis est ac ferus, inimicos sibi illos comparat, qui agrestem suam experti sunt immanitatem: sic illum, qui benignus est ac misericors beneuolentia omnes prosequimur; cum misericordia ipsa naturaliter amorem in eos ingeneret, qui illa præditi sunt. Itaque misericordia est, ut definitio demonstrat, beneuolentiæ, caritatisue mater, amoris pignus, omnisque beneuolæ uoluntatis uinculum. hoc uero præsidio quid in uita firmitus excogitari potest? ut optimo iure Dominus eum, qui misericordia utitur, beatum iudicet; cum tam multa bona huic misericordiæ nomini inesse uideantur. Atque hoc quidem consilium in uita utile esse nemo est qui ignoret. Sed aliquid plus, quam ea, quæ in promptu sunt, tacite significare hæc mihi sententia uidetur, cum res futuro tem-

tempore exprimatur. Beati enim, inquit, misericordes; quoniam ipsi misericordiam consequentur. quasi iis, quos aliorum miseret, in posterū sit proposita misericordia remuneratio. Quare hac, quæ facilis est atque omnibus in prōptu, sententia prætermiſſa; illud, quod occultius latet, nos pro uirili aperire conemur. Beati misericordes, quoniam ipsi misericordiam consequentur. Itaque in hoc dicto diuinum aliquod præceptum ineſt, quod cognosci licet, nēpe illud, quod is, qui ad imaginem suam effinxit hominē, huius simulacri naturæ omnium uirtutū semina inseruit, ut res nulla honesta extrinsecus sese insinuet in nos; sed in potestate nostra sit, id habere, quod uolumus, atque e natura quasi cella quadam penuaria bonum depromamus. nam e rebus singulis, id quod uniuerso in genere est, nos cognoscimus, non alio scilicet modo posse quempiam ea, quorum cupiditate tenetur, assequi, nisi ipse sibi, quod bonum est, comparet. propterea quodam loco ad eos, qui audire possunt, ita alloquitur Dominus. Regnum Dei intra uos est. & alibi: Qui petit, accipit; qui quærit inuenit, & pulsanti aperietur. Itaque ut accipiamus quod expetimus; quodue quærimus inueniamus; in eoque uersetur cuius nos desiderio tenemur; hoc cum uolumus, in nostra situm est potestate, e nostraque pendet uoluntate. Vnde illud, quod consequens est, comprobatur, atque e re contraria intelligitur, nullam scilicet ad malum uim nobis ingenerari, cum ad id nulla nos necessitas extrinsecus impellat. Sed malum simul ac susceptum est, consistit; cumque illud suscepimus, tum in naturam conuertitur. ipsum uero malum per se si eius natura spectatur, non extra consilii deliberationem positum usquā inuenitur. ex his autem libera illa

arbitrii uis, quam is, qui naturæ fabricator est, hominum naturæ tribuit, aperte cognoscitur; propterea quod omnia siue bona, siue mala e nostra proficiscuntur uoluntate: Deique iudicium, cum & incorrupta & æquitatis plena sententia sequatur ea, quæ a nostro profecta sunt consilio; illud cuique tribuit, quod sibi is ante comparauit; iis scilicet, qui secundum perseuerantiam (inquit Apostolus) in bono opere, gloriam & honorem quærunt, uitam æternam: illis autem, qui ueritati non acquiescunt, credunt autem iniquitati, iram & tribulationem; atque omnia, quæcunque acerbæ remunerationis nomine appellantur. Vt enim specula, quæ uerâ exprimunt alicuius rei imaginem, tales ostendunt uultuum effigies, quales ipsi quidem uultus sunt; hilares quidem eorum, qui gaudenti sunt animo, demissi uero ac tristes apparent illorum, qui in mærore sunt: neque speculi quis naturam accuset, si exemplari mæstitia collapso, tristis apparet imaginis similitudo: ita iustum Dei iudicium nostris affectionibus sese accommodat, utpote cum e nostris factis talia nobis retribuat, qualia sane a nobis extiterûnt. Venite, inquit, benedicti: ite maledicti. nulla externa necessitas in his est, ut iis qui ad dexterâ collocati sunt, suauē quidem uocem, tristem uero illis emittat, qui ad sinistram sunt. An non hi quidem ob ea, quæ egerunt, misericordiam consecuti sunt; illi uero quoniam aduersus uicinos suos immanitate usi sunt, immanem sibi Deum effecerunt? Diues ille cum deliciis omnibus circumfluere non misericordia pauperis hominis ad ostium iacentis commotus est: iccirco is misericordiam sibi præcidit, cum misericordiam impleret, neque exaudiatur: non quod una gutta magno paradisi fonti damnum attulit, sed quo-

quoniam misericordiae stilla cum immanitate nullo pacto commiscetur : quæ enim cum tenebris lucis communio est ? Qualia , inquit , homo seuerit ; talia etiam metet : quoniam qui seminat in carne sua , de carne & metet corruptionem ; qui autem seminat in spiritu , de spiritu metet uitam æternam . Hominis quidem sementem opinor esse uoluntatem : messes uero eam , quæ uoluntati consilioque conueniat , remunerationem . Bonorum seges uberrima est iis , qui eiusmodi semen delegerit : spinarum uero messis illis laboriosa est , qui spinosa in hac uita semina proiecerit : oportet enim quemque id omnino metere quod ipse seuerit ; neque fieri aliter ullo modo potest . Beati misericordes , quoniam ipsi misericordiam consequentur . Quæ hominis oratio summam hanc , quæ huic dicto subiecta est , sententiam exprimere posset ? Nam infinita hæc sententia , quæ non ad aliquem refertur , illud postulat , ut præter ea quæ iam explicata sunt , aliquid amplius indagemus ; propterea quod non adiectum est , quales sint ii , quorum misericordia nos commoueri conuenit : sed simpliciter dictum est ; Beati misericordes . Fortasse enim Dominus his uerbis aliquid nobis eiusmodi tacite indicat ; beato illi luctui conuenire misericordiae sententiam . nam illic beatus is est , qui in luctu uitam agit : hocque in loco idem & docere & significare Dominus uidetur . Vt enim alienis afficimur calamitatibus ; cum eorum aliqui , qui nobiscum necessitudine iuncti sunt , in repentinas aliquas inciderunt calamitates ; uel quia paternis expulsi sunt edibus , uel e naufragio nudi seruati , uel a piratis aut latronibus capti , uel ex liberis serui facti , uel e felici statu in seruilem inciderunt & abiectam condicionem , uel aliquod eiusmodi incommodum acce-

acceperunt ii, qui paulo ante prospero aliquo rerum
successu utebantur. ut igitur in animis nostris acerba
quædam ex iis rebus innascitur mutua affectio; fortasse
opportuniùs multo esset, in nobis ipsis huiusmodi ex-
citari sensum ob eam, quæ præter dignitatem facta est,
uitæ uicissitudinem. Cum enim mente rationeque nos
lustraerimus, quam illustis illa sit nostra patria, unde
eieci sumus; quo pacto sub latronum potestate sumus;
quoue modo graui molestaque hac uita oppressi omni
bono caremus; qualesue & quam multos passi sumus
dominos, pro eo, quod in libera uita consuetudine
uerfabamur; quoue denique modo beatissimum uita
nostræ cursum morte atque interitu interrupimus:
num fieri potest, ut, cum hæc ipsa mente reputabimus,
alienarum nos calamitatum misericordia afficiamur?
an non sui commiseratione animus tenetur, si secum
ipse cõsideret, quæ habeat quæue amiserit? Quid enim
hac seruitute miserabilius; cum pro paradisi deliciis
pestiferam huius uita regionem laborumque plenam
nacti simus? & pro illa tranquillitate in sexcentas per-
turbationum pestes inciderimus? proque cælesti illa ui-
tæ angelicæ consuetudine ad id damnati simus, ut cum
terrenis bestiis simul uiuamus? utpote cum nos angeli-
ca illa uita ratione, quæ perturbationū experts est, per-
mutata, cum uita morem, qui pecudum est, suscepe-
rimus. Quotusquisque est, qui acerbos uita nostræ
tyrannos, & agrestes ferosque dominos facile enume-
raret? acerbus dominus furor; eiusdem item generis
inuidia est, odium, superbix affectus ferus quidam atque
immanis tyrannus, quasi cogitandi uis quædam impo-
tens est, ac effrenata, quæ seruos uilesque homines de-
spicit; quæue uitiosis actionibus atque impuris man-
cipat

cipat ac addicit naturam. Avaritiæ uero dominatio
 quam acerbiter uel maximam non affert? quæ cum
 miserum animum seruitute opprimat, illum semper eo
 impellit, ut insatiabiles suas expleat cupiditates: cūq;
 semper egeat, nunquam satiatur tamen; quasi bellua
 quædā, quæ multis capitibus cōstans, per infinita ora
 cibum inexplebili uentri immittit; nunquam eius rei,
 in quam se ingurgitauit, satietate expletur; sed quod
 semper accipit, id illi materies existit atque incita-
 mentum augendæ cupiditatis. Quotusquisque igitur
 est, qui si hanc miseram uitæ condicionem secum repu-
 tarit, non cum quadam commiseratione doleat his in-
 commodis? Sed causa, quamobrem nostri misericor-
 dia ipsi minus afficimur, ea est, quoniam sensu care-
 mus malorum: id quod accidere solet iis, qui mente
 sana non sunt: stultitiæ enim atque insanix uis sensum
 illis earum rerum adimit, quas ipsi patiuntur. Itaque
 si quis sese colligit, atque considerat, tum qualis antea
 fuit, tum qualis in præsentia ipse est, (qui enim seip-
 sos norunt, hos sapientes appellat quodam loco Salomon)
 nunquam hic sui misereri desinet, hanc uero animi affe-
 ctionem consequetur misericordia Dei, idque uere.
 propterea Beati, inquit, misericordes, quoniam ipsi
 misericordiam consequentur: ipsi, non alii: hoc enim
 nomine explicatur sententia: quasi si quis diceret, be-
 ne cum eo agi, qui corporis ualetudinem curat; quo-
 niam qui in ea tuenda curam adhibet, commodā in-
 tegraque ualetudine utetur; ita qui misericors est, in
 beatis numeratur; propterea quod misericordix fru-
 ctus proprie ad illum pertinet, qui misericordia uti-
 tur; siue hoc ex ea, quæ iam nunc explicata est, ratione
 intelligatur, siue ex iis, quæ paulo ante commemorata
 sunt;

sunt; loquor enim de eo, qui alienis incommodis dolere sese ostendit. nam quod & sui miseratione ipse tenetur, & ex alienis incommodis dolore afficitur, utrunq; hoc æque bonum est. Siquidem diuini iudicii æquitas, hominis, qui summa potestate præditus est, uoluntatem iis ostēdit, qui inferiores sunt: quasi homo causis eorum iudicandis, qui subiecti sunt, quodāmodo iudicium de se ipse ferat. Itaque quoniā creditur, idq; uere creditur fore, ut cuncti mortales Christi iudicio sistāt; quo quisque præmia accipiat, quæ corporis factis respondeant: siue bene is, siue male egerit. Fortasseq; si fieri potest, ut quæ neque ratione exprimi neq; oculis cerni possunt, ea mente cōprehendamus; illud dicam audacius, posse etiam nunc corū animaduerti remunerationem, qui misericordiam consequuntur. etenim quæ in hominum animis beneuolentia inest erga illos, qui misericordiam præ se ferunt; ea perpetuo ut par est in iis manet, qui beneficiū assecuti sunt. Itaque qui benignitate usus est, si quo tempore inquisitio fiet, agnoscatur ab iis qui beneficia acceperunt; an cum omnis natura in iudicio iucundissimis uocibus celebrabitur; uerisimile est eum aliquo modo animo affectum iri? an aliqua alia beatæ uitæ ratione egebit is, qui in tam frequenti theatro quasi præconis uoce rerum optimarum fama celebratur? nam quod adīnt ii, qui beneficio affecti sunt, euangelii uox in eo ostendit, cū & bonis & peccatoribus rex responderet: ad utrosque enim oratione ea utitur, in qua indicandi uis inest, remque subiectam quasi digito his uerbis ostendit: Quod fecistis uni ex his fratribus meis minimis. nam eo quoniam dicit, ex his illos adesse demonstrat, qui beneficia acceperunt. Iam uero dicat mihi nunc is, qui inanimatam

matam pecuniarum uim futuræ beatæ uitæ anteponit; qualis cuiusmodi est auri splendor? qui ita elucētes pretiosi lapides? qui uestium ornatus eiusmodi est, quale sane illud præmiū est, quod nobis spes proponit; cum ille rex, a quo cuncta procreata sunt, in excelsa sublimique gloriæ gradu collocatus, se hominum generi patefaciet? cum innumerabiles angelorum legiones circa ipsum stare conspiciuntur? cum regnum illud cæleste, quod oratione explicari non potest, ob omnium oculos uersabitur? contraque proposita erunt terribilia illa supplicia, quibus in mediis cunctos homines, quotquot ab origine usque ad uniuersi finem sunt in lucem editi; cum incerti euentus expectationem pertimescant; rerum futurarum aut metus, aut spes sollicitos eos habet; cū illi etiam, qui recta animi conscientia uitam traduxerunt, rei futuræ diffidant, uidebuntque alios praua conscientia homines in tenebras horridas illas quidē ac terribilissimas quasi a carnifice quodam abripi? Si hic fausto gratoque plausu atque acclamationibus eorum celebratus, quibus benigne fecit; beneque factorum suorum fiducia insignis atque ornatus, ad iudicis conspectum adducitur; an felicitatem illam terrenis his diuitiis parem æqualemque esse ducent? an montes omnes, agros; siluas, mare, quæ omnia sibi auri loco fient, pro bonis illis cælestibus sibi tradi pacturus sit? Ille uero, qui insignis; claustris, portis ferreis, firmissimisque ac abditissimis locis mammonam occultauerit; illudque omni præcepto potius habuerit, ut quas sibi concessit opes in occulto quodam loco reconderet: si is in tenebricosum illum ignem præceps detruditur; cum omnes, qui in hoc uitæ cursu eius sæuitiam atque immanitatem experti sunt; hoc illi uitio dent; ac

R dicant:

dicant : Memento quod recepisti bona tua in uita tua : misericordiam simul cum opibus cōclusam quasi præsidio quodam tenuisti : pietatem ac misericordiam in terris reliquisti : humanitatem nullam ad hunc uitæ statum attulisti : non habes quod non habuisti : non inuenis, quod nusquam deposuisti : non colligis, quod non dispersisti : non metis ea , quorum non iecisti semina ; messem habes semente tua dignam. acerbitatē semen-tem fecisti, eiusdem collige manipulos : immanitatem coluisti ; id tu habe quod amauisti : nullo dolore tu quemquam aspexisti ; neque cum miseratione ipse aspici-eris : afflictum hominem despexisti ; tu quoque perditus despiceris : misericordiam fugisti ; te misericordia fugiet : egenum ac pauperem fastidisti ; is qui causa tua pauper & egenus factus est , fastidiet te . ubi aurum ? ubi splendida uasa ? ubi thesauri præsidium signis munitum ? ubi ad nocturnas uigilias constituti canes ? ubi contra insidiatores armorum apparatus ? aut opum nota in codices relata ? quo hæc ipsa , an ad fletum & stridorem dentium ? Quis tenebris lumen afferet ? quis illuminabit ? quis perpetuos uermes abiget ? Itaque audiamus , fratres , uocem Domini ; quæ paucis nos tam multa docet de iis, quæ futura sunt : misericordiamque aliis tribuere discamus : ut hoc præsidio adiuti efficiamur beati, auctore Domino nostro Iesu Christo , cui gloria potentiaue in sempiterna sæcula . Amen.

Beati mundo corde, quoniam ipsi Deum uidebunt.



Venadmodum iis uerisimile est ut accidat, qui ex alta aliqua specula mare aliquod immensum prospiciunt: idem euenit mēti meæ, quæ e uoce excelsa Domini, quasi e summo aliquo monte sententiarum uim cōtemplat, quæ oratione exprimi nō potest. nam ut multis maritimis in locis ad eā partem, quæ ad mare pertinet, montem cernere licet, qui medius ab summa ad imam usque partem recta intercisis est, cuiusue summus uertex proiectus mari impendet; itaque quod uerisimile est, ut ei accidat, qui e summa huius montis altitudine infimum mare despicit; sic mens mea tenebris quasi inuolucris quibusdam obtenditur, cum ad hanc Domini sententiam cōtemplandam erecta est. Beati mundo corde, quoniam ipsi Deum uidebunt. Deus iis spectandus propositus est, qui puro castoque sunt animo. Deum nemo uidit unquam, inquit magnus Ioannes. quam sententiam Paulus alta atque elata mente iis uerbis affirmat: Quem nullus hominum uidit, neque uidere potest. Hoc illud præruptum saxum est, in quo nulla sententiarum uis posse cōsistere ostenditur: quouē nullum aditum patere Moses suis etiam decretis affirmauit; quasi mens nostra eo peruenire nullo pacto possit. nam hoc longe abesse, ut assequamur, iis uerbis ostendit: Nemo est, qui Deum uidebit, & uiuet. Atque Deum quidem uidere, hoc profectio est uita sempiterna. idque ipsum difficile esse affirmant illa

fidei robora Ioannes, Moses, & Paulus. Vides quasi in genii æstus, quo una animus agitur in explicandis iis, quæ ad huius sententiæ contemplationem pertinent. Deus uita est: qui eum non cernit, neque uitam spectat: quod uero cerni non possit, hoc & prophetæ & apostoli diuino numine afflati testantur. qua in re hominum posita spes est? At spem hanc quasi labentem sustentat Dominus; quæadmodum in Petro fecit, qui cum in eo periculo esset, ne fluctibus obrueretur, collocauit eum in aqua firma ac stabili. Itaque si nobis quoque præsto erit manus Domini, facietque ut in dubia sententia nos in eo constantes simus, quod alte contemplamur, ab omni metu uacui erimus, cum illud ipsum duce Domino firme animo conceperimus. Beati, inquit, mûdo corde, quoniam ipsi Deum uidebunt. Promissio igitur hæc tanta est, quæ uel omnem beatæ uitæ modum superet. nam cum quis habeat cuncta in eo, quem intuetur; hoc bonum ipse affecutus, quid aliud optabit? etenim sacrarum litterarum usu receptum est, ut uidere perinde sit atque habere; ut illud; Videas bona Hierusalem: atque inuenire, ut iis uerbis ostenditur; Tollatur impius, ne uideat gloriam Domini: ne uideat, iis uerbis propheta demonstrat; ne habeat. Qui igitur Deum uidet, is omnia iam affecutus est, quæ in bonis numerantur, propterea quod uidet; affecutus est enim uitam sempiternâ, immortalitatem perpetuam, immortalem beatæ uitæ statum, regnum perenne, gaudium sempiternum, lumen uerum, spiritalem iucundamq; uoluptatē, gloriam eam, ad quam nullus est aditus; lætitiā perpetuam, atque omne denique bonum. Tale igitur est atque adeo magnū, quod beatæ huius uitæ promissione nobis ad spem propositum

tum est. Quoniam uero Deum uidendi ratio ea scilicet ante demonstrata est, ut puro corde quis existat: huius quoque rei dubitatione quasi æstuat animus; an cordis sinceritas ex iis rebus constet, quæ factu quidem difficiles sunt, ac supra naturæ nostræ modum. nam si sinceritatis atque integritatis præsidio Deus cernitur; Moses uerò & Paulus nō uiderunt, utpote cum neque a se, neque ab alio. quoquam Deum uisum affirmant: nullo certe pacto fieri posse uidetur, ut is beatæ uitæ status comparatur, qui in præsentia est a Domino propositus. Ergo quid nobis lucri fiet, ex eo, quod cognouimus, quo modo Deus uideatur, si nulla eiusmodi uis menti inest? nam hoc ab eo dissimile est, ac si quis in cælo uersari beatum esse diceret, quoniam illic ea cernentur, quæ in hoc uitæ spatio minime uidentur. Etenim si aliqua cælestis itineris ratio ante esset a Domino demonstrata, maxime quidem auditoribus expediret cognoscere, illud quam beatissimum esse in cælo uersari. at quamdiu nullus patet aditus; quid nobis emolumenti affert. illa cælestis beatæ uitæ cognitio, quæ sollicitos dumtaxat nos habet? propterea quod, cum nullam uitæ itinerisque rationem inire possimus, illud solum cognoscimus, quibus, quantisue bonis spoliati simus. An igitur quod a natura nostra alienum est, hominumque uim superat, nos ad id ipsum hoc magnifico præcepto adhortatur Dominus? non ita quidem res se habet. neque enim uolucres eos fieri iubet, quibus natura alas non tribuit; neque illos in aquis uitam degere, quibus terrenæ uitæ genus obligit. Itaque si ceteris omnibus in rebus accipientium facultati accommodata lex est, neque quidquam fieri cogit quod naturæ modum excedat; illud etiam recte plane

plane intelligemus, non a spe id esse alienum, quod in hoc beatæ uitæ genere propositum est: quin etiam sublimi hac beatæ uitæ ratione, quæ e Dei conspectu existit, neque Ioannem, neque Paulum; neque Mo- sem; nec ceteros eorum similes caruisse animaduerte- mus; non hunc quidem, qui dixit: Recondita est mihi iustitiæ corona, quam reddet mihi iustus iudex; neque eum, qui in Iesu pectore recubuit; nec illum, qui hanc e uoce Domini auditionem accepit: Cognoui te præ- ter omnes. Quare, si quorum sermone celebratum est; Dei scilicet contemplationem supra id esse, quod a no- bis præstari queat, eos ipsos maxime in beatis esse in- ter omnes constat: illaque beatæ uitæ ratio, quæ e Dei conspectu est, in eo sita est, ut puro sinceroque corde ali- quis sit: certe cordis illa sinceritas, per quā quempiam beatum fieri licet, non eiusmodi est, quæ a nobis præ- stari non possit. Quo igitur modo fieri potest, ut illi, qui una cum Paulo Dei contemplationem a natura nostra alienam esse ostendunt, uera dicant; neque illis ipsis omnino repugnet uox Domini, quæ sinceritatis studio a nobis adhibito Deum uisum iri pollicetur? Ego sane optimum factu esse arbitror, ut pauca quæ- dam de iis proponam, quo recte atque ordine de re- proposita a nobis instituatur disputatio, Diuina natu- ra per se quidem ipsa omnē mentis cogitationisq; uim superat; atque ab omnibus coniecturis meditationi- busque remota est: neque ulla unquam inter homines ratio inuenta est, qua contemplaremur ea, quæ sensi- bus comprehendi non possunt; neque ulla excogitata uia est, qua res difficiles contemplando assequeremur. Itaque magnus ille Apostolus inscrutabiles appellat uias eius, quibus quidem uerbis ostendit, uiam illam, qua

qua ad diuinæ naturæ cognitionem ducimur, eiusmodi esse, quam nulla ratione consequi possimus; utpote cum nemo ex iis, qui huius uitæ cursum confecerunt, ullum unquam uestigium impresserit illius rei indagandæ, quæ nullo pacto cognosci potest. Cum uero natura eiusmodi sitis, qui cunctæ naturæ præstat, alia quidem ratione & uidetur & comprehenditur is, qui neque cerni, neque ullo sensu comprehendi potest. Sed complures tamen sunt huiusce contemplationis modi. nam sapientiæ illius, quæ in uniuerso apparet, ui animaduersa, intueri mente possumus eum, qui cuncta sapienter effecit. id quod in humanis operibus usu uenire solet, in quibus propositæ rei opifex quodam modo mente cernitur; quoniam is opere ipso artem in uulgu proponit; ipsius uero opificis natura minime spectatur, sed sola illa artis scientia, quam opere expressam ipse ostendit. pari item ratione cum ornatum, qui in rebus creatis cernitur, nos intuemur; non naturæ quidem, sed sapientiæ eius, qui res uniuersas sapienter creauit, notio quædam animo nostro imprimitur. sique uitæ nostræ causam animo rationeq; lustrauerimus; non necessitate aliqua impulsus, sed optima uoluntate ductus eo uenit, ut hominem crearet. hacque ratione; cum bonitatē eius non naturam mente cogitationeq; complectamur, rursus Deum cerni dicimus. sicque cetera omnia, quæcunque ad aliquid, quod sublimius sit, ceterisq; rebus præstet, mentem nostram excitant; ea ipsa diuinæ contemplationis nomine appellamus; cum altissima quæque animi cogitationisque nostræ elatio in Dei nos conspectum perducatur. nam potentia, integritas, status, qui perpetuo idem sit; ac nulla cum rebus contrariis permixtio diuinæ cuiusdā atque
altæ

alta cognitionis opinionem animis nostris inferit. Itaque ex iis, quæ iam commemorata sunt, perspicuum fit a Domino uera dici, cum ab iis Deum conspectum iri profiteatur, qui integro puroque corde sunt. Neque Paulus mêtitur, qui illud scriptis suis tradidit, quod Deum neque quisquam uiderit, neque uidere possit. etenim qui natura cerni non potest, quoniam quæ in eo animaduertuntur proprietates, harum ipsarum opè cernitur; fit ut ex actionibus ipse uideatur. Verum non eo solum hæc beatitudinis spectat sententia, ut ex aliqua eius qui agit, actione talis a nobis ipse animaduertatur: quandoquidem fieri potest fortasse, ut ex apta huius mundi compositione, huius sæculi sapientes, quanta sit diuina potestas ac sapientia intelligant: sed mihi hæc magnifica beatitudinis sententia aliud tradere uidetur iis qui consilium capere possunt: quod uero huius rei mihi uenit in mentem, id exemplis planum fiet. In humana uita bonum aliquod est corporis ualetudo: sed bene est, non modo ualetudinis cognoscere rationem, uerumetiam in uita recte ualere. nam si quis de ualetudinis laudibus differit, cibumque sumit, qui & morbos & malos gignit humores, quid huic, qui morbis conficitur, profunt ualetudinis laudes? sic igitur quæ proposita est, intelligenda est oratio: ut de Deo scilicet aliquid cognoscere, hoc non in rebus beatis ponat Dominus: sed illud, uel beatissimum dicat, Deum in se habere: Beati enim, inquit, mundo corde, quoniam ipsi Deum uidebunt. Non enim quasi e conspectu Deum ei spectandum proponi arbitror, qui puro sit atque integro mentis sensu; sed illud fortasse hæc præclara sententia nos monet. quod aliis item Dominus apertius iis uerbis exprimit; Intra

uos est regnum Dei. quibus quidem uerbis docemur, omnem, qui animi sui sordes, turpesq; uitiorum maculas absterferit, eum ipsum in sua pulchritudine diuinæ naturæ contemplari imaginem. Ac mihi quidem uidetur Dominus paucis, quæ dixit, eiusmodi sententiam complecti. Vos, qui uerum illud bonum contemplari ac cognoscere studetis; cum diuinam maiestatem supra omne cælum elatam audietis, eiusque gloriam eiusmodi esse, quæ oratione explicari non possit; ac pulchritudinem talem, quæ omnem cogitationis uim superet; naturamq; eam, quæ mente comprehendi nō possit; nolite desperare, quo minus id intueri possitis, cuius uos cupiditate tenemini. Nam is, quem ipse tenere potes, contemplandi Dei modus in te est; quoniam qui te ita effinxit, statim naturæ tuæ eiusmodi bonum tribuit. Nam Deus naturalium bonorum suorum uestigia operi suo impressit, tanquam is, qui cera aliqua imaginis speciem ante effinxerit. sed uitium, quo diuinæ imaginis forma obscurata est, irritum tibi reddidit bonum illud, quod turpibus est inuolucris occultatum. Quare si accurata diligentique uiuendi ratione sordes animo tuo illitas rursus plane elueris, diuinæ in te pulchritudinis splendor apparebit. id quod in ferro fieri solet; cum id, quod paulo ante nigrum erat, si rubigo cote detrahitur; in sole cum per se splendet; tum illustres quosdā emittit radios: ita interior homo, quæ cordis nomine uocat Dominus; cum rubiginosas absterferit maculas, quæ pessimo situ obductæ in ipsa forma floris instar apparēt; pristinā rursus is recuperabit exemplaris imaginem; bonusq; plane efficietur; quoniā quod boni simile est, id omnino bonū est. Itaq; is, qui seipsum intuetur, in se id contemplatur, cuius

desiderio ipse tenetur: hacque ratione beatus efficitur is, qui puro est atque integro corde, propterea quod cum sinceritatem ipse suam animaduertat; in imagine intuetur exemplar. nam ut ii, qui in speculo solem aspiciunt; licet cælum ipsum fixis oculis non cernant; in speculi tamen splendore nihilo secius cælum uident, atque illi ipsi, qui solis contemplantur orbem: ita uos etiam, inquit, & si ad eius luminis, quo difficilis est aditus, contemplandi uiam imbecilles estis; si tamen eam imaginis formam rursus assumetis, quæ uobis principio tributa est; in uobis quidem, ipsis habetis id, quod maxime quæritis. Integritas enim atque innocentia, ab omni uicio uacuitas Deus est. Si hæc ipsa igitur in te sunt; omnino inest in te Deus. Cum ergo mēs tua simplex est, omni uicio atque affectu uacua, ab omni sorde aliena, tum beatus es, quia acutissime cernis: quippe cum id, quod sub aspectum eorum non cadit, qui sordes suas non eluerint, ipse mente perspicias, cum animo puro sis: crassaque mentis caligine deteresa sincero illustriq; animi splendore beatissimum aperte intuearis spectaculū. Hoc uero quid est? integritas; sanctimonia, simplicitas, omniaque eiusmodi illustria naturæ diuinæ lumina, quibus Deus ipse cernitur. Quod autem hæc ita sese habeant, ex iis nos cognoscimus, quæ paulo ante commemorata sunt: sed dubitatio adhuc nobis eadem relinquitur, quæ ab initio fuit. Etenim ut qui in cælis uersatur, is rerū, quæ in cælo sunt admirabiles, particeps fit; sed cum huiusce rei ratio difficilis admodum sit, nihil ea nobis profunt, quæ in promptu sunt: ita ex eo, quod quis animi sordes eluerit, cum beatum fieri non dubitamus. sed quo modo aliquis cum a sordibus purget, hoc nō dissimile plane esse

esse uidetur, atque in cælum ascendere. Itaque quæ scala Iacob? qui igneus currus inuenietur similis eius; quo propheta Elias in cælum sublatus est? quoque animus noster ad res cæli admirabiles euectus, terrenum hoc onus deiiciat? si quis enim necessarios animi motus ratione lustrauerit, difficile atque arduum esse ducet, ea, quæ in animo infixæ hærent, mala posse conuellere. Ortus enim noster a malo statim initium ducit; malique quasi uia magis atque magis progreditur; & malo denique eius finis concluditur. Est cum natura malum concretum ac permixtum culpa eorum, qui peccatum admiserunt a principio, neque dicto Dei audientes, morbum eam ob causam introduxerunt. Si cut autem in singulis animantium generibus ad posteror eadē naturæ uis traducitur ac propagatur, ut quidquid naturæ rationi consentiens natum sit, idem sit cum eo, unde natum est: sic ex homine nascitur homo; ex uitioso homine uitiosus; ex peccatore item peccator. Ergo cum iis, qui concipiuntur, simul ingeneratur peccatum: quod eodem item partu ortum, una cum illis augefcit; extremoq; eodem uitæ actu finitur ac terminatur. At uirtutem ipsam tum difficilem illam quidem esse, quam assequamur; tum uix multis laboribus ac sudoribus eius officium recte præstari posse, & multis diuinarum litterarum locis hoc cognouimus; cum regni cælestis iter difficile illud quidem, atque artum per angustias uiarū fieri audiamus; latum uero esse id, ac facile, quo per uitium uita ducitur ad interitum. Sed tamē cælestis uitæ rationē non difficilem esse sacris proditum est litteris; quarum quidem uoluminibus tam multorum hominum res admirabiles nobis exponuntur. Cum uero in hac Dei contemplandi

ratione duplex sit sententia; una quidem, quoniam eam naturam cognoscimus, quæ huic uniuersitati præest: altera, quia integerrima uitæ disciplina secum coniuncti sumus. Superius quidem contemplationis genus difficile esse ostendit uox sanctorum hominum; posterius autem hominum generi pollicetur Dominus iis uerbis. Beati mundo corde, quoniam ipsi Deum uidebunt. Quemadmodum uero mundo atque sincero corde esse liceat, id ipsum ex omni fere euangelii doctrina cognoscere potes. nam si ordine illius præcepta percurres; id profecto aperte inuenies, quod ad cordis sinceritatem ualet. Cum omne enim uitium in duo genera dispertiat, tum in id, quod factis admittitur; tum in illud, quod mente concipitur: primum quidem ueteri lege illud facinus animaduertit, quod factis manifesto deprehenditur; nunc autem alterum peccati genus uoluit legem spectare; cum non improbum factum puniat; sed illud prouideat caueatque ne male porro fiat. nam ab animi uoluntate uitium conuellere, hoc nihil aliud est, quam præ multa abundantia uitam ab improbis factis auertere. Cum autem uarium; ac multiplex sit uitii genus; suum cuique rei nefariæ adhibuit præceptorum remedium. Et quoniam in omni uita sepe iræ morbus facile nos opprimit; huius medicinæ initium facit ab ea re, quæ longe præstat; cum illud in primis lege statuerit, ne irascamur; Veteri, inquit, lege ad id institutus es, ne cædem facias; in præsentia iam illud cognosce; ut ab animo iracundiam amoueas, quam in uicinos exerces. Non enim irasci omnino prohibuit: quoniam in re honesta tuenda aliquando eiusmodi animi imperum adhiberi licet. Sed cum nulla honesta de causa cum fratre interdum iracunde

cunde agitur; hæc iracundiæ uis præcepto restringitur: nam euangelii litteris ita scriptum est: Quicumque fratri suo temere irascitur: illud, temere, quod additum est, ostendit sæpe usu uenire, ut non incommode tum aliquis irascatur, cum scilicet peccatis puniendis hoc animi ardore effertur. Hoc iræ genus, sacrarum litterarum testimonio, est ei, qui Phinees dicitur, attributum: cum is iram Dei placauit, qui delinquentium cæde ualde fuerat in populum commotus. Deinde ad illud transit, ut remedium iis rebus afferat, in quibus uoluptatis causa peccatur: immoderatamque adulterii cupiditatem, præcepti ui ex animo conuellit. hocque pacto in iis, quæ sequuntur, inuenies singula quæque Dominum corrigere; legumque præsidio unicuique uitiorum generi occurrere. Vetat ne quis iniuriam faciat, neue manus alteri afferat; cum ne iniuriam quidem nos persequi concedat. Auaritiæ uitium eo expellit, quoniam illud nobis imperat; ut spoliari patiamur ab eo, qui nobis aliquid eripere conatur. Timiditati illud remedium adhibet, quod iubet nos mortem omnino contemnere. Atque ex singulis quidem omnino præceptis cognosces, Dominum aratri instar incidere; atque funditus conuellere ex intimis animi nostri sensibus malas uitiorum radices: quibus quidem præceptis adiuti purgari ac liberari possumus a fructibus spinosis. Itaque in utraque re naturam Dominus adiuuat; partim quoniam summum bonum nobis pollicetur; partim quia rei propositæ assequendæ rationem præscribit. Sin autem rerum bonarum studium laboriosum esse putas ac difficile; tu uelim hoc cum contrario uitæ instituto cõpares: inueniesq; profecto uitium longe grauius esse ac laboriosius, si non
hæc

CONCIO VII.

Beati pacifici, quoniam filii Dei uocabuntur.

SACRI illius tabernaculi; quod populo Israelitico lator legis ea forma ædificarat; quam in monte ei Dominus ostenderat; singula quidem omnia tum sancta, tum sacra erant; quæcunque interiori ambitu continebantur. Eam uero intimam partem, quæ sancta sanctorum nominabatur, adire ingrediue nullo modo licebat; cum forma illa nominis duplicata, quæ uim augendi haberet, illud, opinor, ostendat: neque dignitate, neque sanctitate eam partem cum ceteris comparari posse. Sed quanto res consecrata sanctaque illi præstat, quæ uulgaris est ac profana; tanto illa pars, ad quam ingredi nefas erat, castior habebatur atque sanctior ceteris illis partibus, quæ proximæ erant. pari item ratione quæcunque de his beatæ uitæ rationibus superius nobis in hoc monte demonstrauit, ac disseruit diuina oratio; ea quidem omnia & sacra, & sancta esse duco: quod uero iam ad contemplandum est nobis propositum, id eiusmodi esse arbitror, ut ea pars est, quæ sancta sanctorum dicitur, quam ingredi nemini licuit. Nam si Deum uidere, nihil est hac re præstantius; certe illud omni præstat felicitati, cum quis efficitur filius Dei. Quæ enim uerborum sententia eiusmodi est, quæ nominum uis, ut tanti tamque magni promissi munus explicet? quodcunque aliquis mente elatus attente cogitauerit, hoc ipso tamē res maior est, de qua oratio habetur. Si quod de hac beatitudine, promisso facto, proponitur, id uel bonū aliquod, uel præclarum, uel subli-

me

me dixeris : res tamen , quæ oratione exponitur , plus omnino in se habet , quam illorum nominum ui exprimi possit . Optatis maior est prosper huius rei euentus ; ac spem omnem donum , naturamque ipsam superat tale munus . Quid est homo ; si cum natura diuina ipsum comparas ? Cuius ego sanctissimi uiri sententiam proferam , qua extenuetur atque minuatur hominum condicio ? Ex Abrahami sententia homo est terra & cinis : ut Esaia placet ; fenum : ut Dauidi , ne fenum quidem ; sed feni simile . nam ille ; Omnis caro , inquit , fenum est : hic uero ait ; Homo est quasi fenum . ut uero sentit Ecclesiastes , uanitas est : ut Paulus , miseria . quibus enim nominibus Apostolus seipsum uocauit , eisdem ostendit , se generis humani misericordia commoueri . Hæc ipsa igitur ad hominem pertinent . Deus autem quid sane est ? Quo modo definiendo id aperiam , quod neque oculis cerni , neque auribus percipi , neque mente animoue comprehendi potest ? quibus uerbis eius naturam explicabo ? quod huiusce boni exemplum in iis , quæ nota sunt ac perspicua , inueniam ? quæ uerba fabricabo ad exponendum id , quod neque dici , neque exprimi potest ? Audiui ex diuinis litteris magna quidem de caelesti natura prædicari ; sed hæc quid ad ipsam naturam ? etenim quantum mente assequi potueram , tantum est uerbis expressum , non quantum id plane est , de quo futura est oratio . nam sicut qui spiritum de caelo ducunt , eorum quisque tantum excipit , quantum uentriculi cuiusque spatium concipere potest ; quo fit , ut hic plus , ille minus excipiat : non tamen qui multum in se spiritum concipit , is totum aeris elementum in se comprehendit ; sed ex uniuerso elemento , quantum potuit , non autem totum rece-

recepit : sic diuinarum litterarum de Deo sermones, quos diuino spiritu afflati homines nobis exponunt, sublimes illi quidem sunt, magnique, & pro ingenii nostri ratione omnem superant magnitudinem, sed ueram tamen magnitudinem non assequuntur. Quis cælum, inquit, palmo dimensus est, aquam manu, terram pugno? animaduertis ampla & magnifica uerba prophetæ, qui incredibilem potentiam describit; sed quid hæc ad illud, quod re uera est? his enim magnificis uerbis aliquā diuinæ actionis partē ostendit prophetæ sermo, ipsam uero, unde actio existit, uim, ne dicā naturā; unde uis illa emanat, neque expressit prophetæ, neque expressurus erat; immouero sermonē redarguit eorū, qui Deum quibusdam opinionibus quasi adumbrando effingunt: idque quasi ex ore Domini ille ait; Cui me assimilastis, inquit, Dominus? idemque in suis sermonibus Ecclesiastes sentit. Ne festines, inquit, efferre ante faciem Dei, quoniam Deus in cælo est, tu autem in terra. Mutuo hoc elementorum interuallo illud, opinor, demonstrat; quam longe Dei natura humanas superet cogitationes. Huic tamen rei, quæ tanta est ac tam magna, quæ, ut ante dixi, neque oculis cerni, neque auribus percipi, neque mente comprehendi possit; is, qui nullo numero habetur homo, qui cinis, qui fenum, qui uanitas est; conciliatur, atque ab eo, qui rerum uniuersarum conditor est, in filiorum ordinem asciscitur. Quæ gratiarum actio huic muneri æqualis inueniri potest? quæ uox? quæ sententiarum uis? quæ mentis commentatio, ut huiusce tanti muneris præstātia laudibus ornetur? naturæ suæ fines transiit homo: ex mortali immortalis; ex caduco perpetuus ac firmus; ex eo, qui ad diem permanet, sempiternus;

T atque

atque ex homine denique efficitur Deus. Nam qui dignus habitus est, ut Dei filius efficiatur, is patris in se dignitatem omnino habebit; paternorumq; bonorum omnium hereditatem cernet. O magnificam locupletis Domini largitionem. o amplam palmam. o manum magnam. Quam multa hæc incredibilibus bonorum munera? ad eundem prope dignitatis gradum, in quo ipse est, præ humanitate eam extollit naturam, quæ peccati sordibus deturpata est. Si enim eiusdē naturæ, cuius ipse est, homines participes facit, atque affines, quid aliud hac affinitate cōtracta pollicetur, quam parem quandam dignitatis gradum? Tam magnificum est igitur hoc certaminis præmium. quod uero certaminis genus? Si pacificus, inquit, eris; adoptionis præmio donaberis. Mihi actio item ipsa, cuius causa tam amplum proponitur præmium, aliud munus esse uideretur: nā ad eas res, quæ in hac uita expetuntur perfrundas quid hominibus est pace suauius? quas tu cūq; res commemoraueris, quæ in hoc uitæ spatio iucundæ habentur, pacis ille quidem indigent, ut plane iucundæ sint. Etenim si cuncta tibi suppetunt, quæ apud homines in pretio atque honore habentur; diuitiæ, integra ualetudo, coniunx, liberi, familia, parentes, serui; amici, terra, mare, horti amœni, uenationes, balnea, palæstræ, gymnasia, loca ad oblectationes accommodata, atque omnia denique, quæ uoluptatis causa inuenta sunt. Ad hæc accedāt etiam iucunda spectacula, musici cantus, & si qua res alia eiusmodi est, qua oblectentur ii, qui in hac uita uoluptates consecretantur: si hæc quidem omnia suppetūt, pax uero deest, quid illa emolumentū afferunt, cum bellum impediat, quo minus illis bonis perfruaris? Itaque pax ipsa tum per se

iis

iis iucunda est, qui illam colunt, tum iucunda efficit omnia, quæcunque in hac uita expetuntur. quin etiam in pace, si aliquo, ut sors hominum fert, incommodo afficitur; malum hoc, quoniam re bona temperatum est, facilius nos ferimus. Sin autem uita nostra bello premitur, in eiusmodi rerum difficultium casu quasi sensibus caremus; quoniam priuatarum rerum dolorem superat communis calamitas.

Atque sicut quidem medici de corporis morbis commemorant, si duobus simul malis corpus unum afficitur, uehementioris quidem solius sensu affici; remissionis uero mali dolorem, quasi grauioris illius morbi ui occultatum, latere: sic belli incommoda, cum grauiissima sint; illud efficiunt ut priuatas calamitates minus sentiamus. Si uero priuatis malis sentiendis animus quodam modo obtorpescit, cum belli sit communibus incommodis percussus; quo pacto fiet, ut rerum iucundarum sensum habeat? Arma, equi, ferri acies, tubæ sonitus, phalanges hastarum aspectu horribiles, scuta inter se implicita, galeæ pennis terrorē præ se ferentes, ad arma concursus, propulsationes, prælia, pugnæ, cædes, fugæ, impressiones, gemitus, uociferationes, terra sanguine madefacta, mortui conculcati, uulnerati milites derelicti, atque omnia, quæcunque in acerbissimis belli casibus spectare, commemorareque licet. An igitur qui in illis rebus uersatur, in otium unquam is uenerit, ut mentem conuertat ad eius rei recordationem, quæ iucunda sit? an non si aliquo difficillimo unquam tempore in mentem uenit iucundæ alicuius rei recordatio, aliqua doloris accessio sit? Quamobrem qui præmium tibi proponit, si a rebus iis te auerteris, quæ malæ e bello proficiuntur; is duplici

te munere affecit . nam unum quidem est certaminis præmium; alterum uero munus est certamē ipsum. Itaque licet nulla hac ipsa in re spes proposita esset; cordatis tamen hominibus pax ipsa per sese omni studio potior atque antiquior esse debet. Quare summam humanitatem ex eo cognoscere licet, quod non laboribus aut sudoribus, sed honestis animi uoluptatibus optima præmia constituit. Si enim rerum iucundissimarum caput est pax, quam cuique tantam inesse uult, ut non modo eam ipse habeat, sed præ multa copia ceteris tribuat, qui illa carent. Beati enim, inquit, pacifici. Est is pacificus, qui pacem alteri dat: nemo autem alteri quippiam largitur, quod ipse non habet. Ergo primum uult plenus ipse sis bonorum, quæ e pace existunt, deinde illis tribuas, qui eiusmodi rei indigent. Atque nolo quidem in magnis atque altis admodum contemplationibus elaborata uideatur oratio; quoniam ad bonum adipiscendum satis est ea quæ in promptu uidetur sententia. Beati pacifici. Multorum quidem morborum curationem exiguo remedio affert Dominus, cum singula quæque complectatur eiusmodi uoce; quæ cum late pateat, multa in se comprehendit. Primum quid pax sit consideremus. quid aliud sane est, quam mutua quædam amoris uis animique propensio erga alios? Ergo quid illud est, quod amori contrarium intelligitur? odium, ira, inuidia, animi impetus, ulciscendi libido, simultas, belli calamitas. Vide quantis & quam grauibz morbis una sola uox remedium afferat; cum his singulis, quæ commemorata sunt, pax repugnet, atque eius patrocinio mala quæq; tollantur. Ut enim recuperata ualetudine morbus interit, luceque orta nullæ tenebræ reliquæ sunt: sic cum pri-

primum pax elucet, quæcunque e re paci cōtraria con-
 trahuntur incommoda, omnia plane tolluntur. Sed
 quam magnum sit hoc pacis commodum, nihil est, cur
 oratione cōplectar. tu ipse tecū mente reputa, quæ uita
 sit eorum, qui inter se similitatem exercent, mutuisque
 odiis afficiuntur, quam difficilis eorū congressus, odio-
 sa inter se omnia, os mutum, oculi auersi, obstructæ au-
 res. sermoni tum eius, qui odit, tum illius, qui in odio
 est. quidquid autem uni ex iis cordi est, id alteri inimi-
 cum. contraque id aduersario iucundū est, quod odio-
 sum est alteri atque molestum. Sicut igitur optimis suis
 odoribus unguenta suauia eum, qui obiectus est, ac-
 rem replent: sic præ copia quadam uult Dominus te
 pacis gratia abundare, ut uitæ tuæ ratio alieni sit mor-
 bi remedium. Hæc uero pacis uirtus quanta quamue
 præclara sit, ipse cognosces diligentius, si singularum,
 quæ animo ex iniqua uoluntate fixæ inhærent, pertur-
 bationum calamitates ratione lustraueris. Quis de ira-
 cundiæ motibus satis dissereret? quæ orationis uis
 morbi huiusce exprimeret fœditatem? Animaduertis
 eorum, qui a dæmone uexantur, affectus apparere in
 iis, qui iracundiæ impetu uincuntur; expende inuicem
 quæso; tum quæ iratis, tum quæ a dæmone correptis
 eueniunt; num aliqua in illis dissimilitudo? Qui dæmo-
 num furiis concitantur, sanguine suffusi, ac distorti eo-
 rum oculi, lingua hæsitans, asper uocis sonus, cita ut
 ululans uox. communia hæc sunt & iracundiæ, & dæ-
 monis: capitis motus, absurdæ manuum agitationes,
 corporis totius commotio, non firmus pedum status.
 Est una eademque utrique huiusce morbi descriptio.
 hoc solum alter ab altero interest, quod unus quidem
 est, quo sponte quis afficitur: alter uero, in quem for-
 tuito

tuito ac præter uoluntatem incidunt ii, quibus ille inest. At quanto miserabilius est, si suo quis animi impetu in calamitate uersatur, quam si quis præter uoluntatem malo aliquo affligitur? Atque is quidem, qui hominis a dæmone uexati morbum spectat, misericordia omnino commouetur: qui uero mentis alienationem, quæ ab ira exoritur, simul atque eam animaduertit, imitatione is expressit, quoniam sibi fraudi esse putat, nisi morbo suo eum uincit, qui ante in eundem morbum inciderat. At de mon quidem cum hominis a se oppressi corpus male habet, usque adeo mali uim progredi sinit, ut furentis manus in aerem frustra difficiat. iracundiæ autem uis non frustra ad aliquid impellit corporis motus. nam cum hic morbus aliquem oppresserit, & sanguis circa cor suffusus efferbuerit; quoniam atra bilis, ut aiunt, ex iracundia per totum corpus sese profundit; tum interioribus compressis humoribus, omnes capitis sensus coangustantur. oculi quidem attente coniecti in id quod offendit, palpebrarumq; finibus quasi expulsi, aspectum quædam præ se ferunt immanem ac draconis similem; uiscerum spiritus intercluduntur, colli uenæ turgescunt, lingua crassa fit, uox in angustum arteria cōcluditur, neque sponte acuta redditur, labia frigida illa bile suffusa tum atra fiunt, tum fixa hærent, neque naturali interuallo, neque cōmissura esse uidentur, ut ne saluā quidem, quæ in ore redundat, continere possint, sed una cum uerbis emitant; quoniā expressus ui quadam sonus spumā expuit. Itaque tum manus pariter ac pedes illa perturbatione moueri animaduertere licet. hæc autem membra non frustra motu impelluntur, ut in iis euenire solet, qui a diabolo oppressi uexantur, sed ad nocendum iis, qui inter

inter se ira incitati manus conserunt. nam qui digladiatur inter se, mutui eorum impetus ad illas sensuum partes subito feruntur, quæ ictibus opportuna apparent. Sin autem in pugna os forte corpori propius accesserit, ne dentes quidem actionem suam prætermittunt; sed tanquam feræ in eorum membris, quos inuasent, inhærescunt. At quotusquisque est qui omnia singula incommoda, quæ ab ira proficiuntur, dicendo enumerare possit? Itaque is, qui huiusmodi turpitudinem uetat, optimo iure tum beatus dicitur, tum talis est, cui ob maximum beneficium honos habetur. nam si quis ab aliqua corporis molestia hominem liberauerit; hic dignus est, cui ob tale beneficium honos tribuatur: quanto plus uitæ profuisse a sapientibus uiris putabitur is, qui ab hoc morbo animum uindicauerit? quanto enim corpori præstat animus; tanto is honore dignior habebitur, qui animis auxiliū tulit, quam qui corpora curant. Ac nemo arbitretur, a me iracundiæ molestiam iis malis grauiorem putari, quæ ab odio existunt. in ea enim sententia sum, inuidiam ac simultatem, perturbationes illas quidem duas esse tanto grauiores quam illam; de qua dixi, quanto occultum malum illo grauius est, quod aperte patet. nam ex canibus eos maxime cauemus, qui neque latrando, neque hominem adoriendo, rabiem denunciant; sed cum mites uideantur ac mansueti imparatos nos atque incautos offendunt. eiusdem generis sunt inuidia atque similtas eorum, quorum in intimis animi perturbationibus odium quasi ignis aliquis occulte accenditur; quæ uero apparet oris eorum species tota effingitur ad amicitia simulationem. Sed quemadmodum ignis, si paleis occultatus est, ab initio quidem materiam quæ illi

illi intrinsecus obiecta est, comburendo absumit; flamma autem in apertum minime exit; sed fumus quidam grauis ac uiolentus, qui conclusus est intus, erumpit; fin autem locum aliquem nanciscitur, unde exhalet; tum in flammam claram atque apertam excitatur: sic inuidia cor ipsum conficit, ueluti ignis quendam congestum absumit palearum aceruum; ac præ pudore quidem morbum celat: non tamen in perpetuum planè occultari potest; sed inuidiæ acerbitas tanquam fumus quidam uehemens, in iis apparet, quæ calamitatis speciem habent. Sin autem aliqua calamitas illi acciderit, cui inuidetur, tum morbum in uulgus indicat, cum ex illius calamitate incommodoque laticitiam capiat atque uoluptatem. Occulta autem morbi uis patet, quoad certis apertisq; uultus signis latere potest. etenim quæ in desperatis signa apparent mortis; eadem in eo sæpe existunt, qui inuidia flagrat: oculi aridi, ac palpebris, quæ macie cōfectæ sunt, intus inuoluti, supercilia contracta, ossa, quæ carnis specie apparent. At quæ huius morbi causa est? quoniam scilicet, aut frater, aut necessarius aliquis, aut uicinus rebus in uita secundis utitur. O nouum inusitatumque iniuriæ genus. id uitio culpæque dari, quod in miseris ille non est, cuius secundis rebus dolet; non quia aliquid ab eo aut incommodi aut iniuriæ se accepisse iudicat: sed quoniam ille sine cuiusquam iniuria in rebus uersatur secundis. Equidem libenter illi dixerim; quid damni fecisti miser? quid est, cur te maces, cum res uicini prosperas iniquo quodā oculorum obtutu aspicias? quid est causæ, quamobrem illum accuses; si corpore elegans, si eloquentia ornatus, ac generis nobilitate præstat? si magistratum aliquem adeptus

ptus, dignitatis illius splendore elucet? si aliqua illi pecuniarum uis accessit? si in concionibus prudens uidetur ac grauis? si, quoniam beneficus est, ac liberalis, a multitudine diligitur atque obseruatur? si liberis gloriatur? si uxore gaudet? quid est, cur hæc, quasi aculci stimuli que pungunt animum tuum? palmas percutis, digitos implicas, cogitationibus angeris, grauius atque intime suspiras, facultatum tuarum fructus non iucundus, acerba tibi mensa, ad ignem es subtristis, attentæ ac paratæ aures tuæ ad eos, qui florentissimo homini obtrestant. Si uero aliquid narratur, quod ad illius prosperum rerum cursum pertineat, tum ad hunc sermonem obsurdescent aures tuæ. Sed hoc iniquo animo cum affectus sis, cur morbum simulas? quid est cur beneuolentiæ specie amici personam induis? cur cum male illi euenire, occultis animi tui sensibus optes, blande cum appellas, saluereque ac belle ualere iubes? talis fuit Cain, qui, quoniam Abel probaretur, rabiosa quadam inuidia æstuabat. nam ad cædem illum inuidia hortabatur; simulas uero quasi carnifex aliquis, cædem fecit. Nam cum hic specie quadam benignum se atque amicum ostenderet, longe ab auxilio parentum illum duxit in agrum; atque ita deinde cæde inuidiam detexit. Quare qui e uita humana hunc morbum depellit, beneuolentiæque ac pacis uinculis eos deuincit, qui genere coniuncti sunt; hominesque amicitia cōcordiaue conciliat, an non hic munere fungitur, quod re uera diuini est numinis; cū repulsis ex humana natura malis rerum bonarū usum introducat? eamque ob causam uocat Dominus eum filium Dei, qui pacis conciliator est; quoniam ueri filii imitator est is, qui hæc bona hominum uitæ tribuit. Beati

igitur pacifici, quoniam ipsi filii Dei uocabuntur. Qui sunt hi? qui scilicet diuinæ humanitatis imitatores, id in suæ uitæ rationibus ipsi ostendunt, quod proprium diuinæ actionis est, atque præcipuum. Dominus, qui bona largitur, tollit omnino, in nihilumque plane id omne redigit, quodcunque; a rei bonæ natura abhorrere hoc ipsum actionis munus tibi præscribit, ut odium scilicet deponas, bellum dirimas, inuidiâ restinguas, contentionē abiicias, simultatem ne exerceas, ulciscendi libidinē extinguas, quæ intimos cordis sensus cōtra conficit; ac pro his introducas ea, quæ illis sublati contraria sunt. Nam ut remotis tenebris lux existit: ita his singulis succedit fructus spiritalis, caritas, gaudium, pax, benignitas, clementia, omnisque illa denique Apostoli bonorum commemoratio. Quid est, cur beatus non sit is, qui diuina bona largitur? qui Dei munera imitatur? qui magnifica Dei dona bene factis suis exequatur? Sed non ad aliud dumtaxat bonum fortasse spectat hæc beatæ uitæ ratio: uerum eum opinor appellari pacificum, qui eam, quæ in seipso est, carnis spiritusque seditiōnem tollit, intestinoque naturæ bello extincto, concordiam pacemque conciliat; cum scilicet corporis lex mentis rationi repugnans, nihil amplius imperat; sed meliori regno subiecta, ipsa diuinis paret præceptis. immo uero ne existimemus illud nobis ex hac oratione consilii dari, ut dupliciter considerata sit eorum uitæ ratio, qui recte egerunt: sed cum ille medius uitii quasi paries ex ea, quæ in nobis est, fabrica sublatus est; tum duplex illa pars meliori temperamento conglutinata simplex efficitur. Quoniam igitur Deus simplex est, neque mixtus aut concretus, neque figura formaque aliqua constare creditur; homo etiam adhi-

bita

bita eiusmodi pacificatione, cum a duplici hac quasi coagmentatione est alienus, diligenterq; ad bene agendum redit; tū simplex efficitur, sincerus, atque ab omni simulatione alienus; ac re uera unus efficitur, ut quod in illo apparet, idem sit cum eo, quod latet; contra ut quod occultum est, idem cum eo conveniat, quod ille præ se fert: tum uera solidaque hæc est beatitudo: eiusmodique homines proprie nominantur filii Dei, beatique habentur, promissione Domini nostri Iesu Christi, cui gloria sempiterna. Amen.

CONCIO VIII.

Beati, qui persecutionem patiuntur propter iustitiam, quoniam eorū est regnum cælorum.



QVORSVM illius Octauæ cuius nomen duobus psalmis apud prophetam inscribitur, spectat mysterium? quoue pertinet illa expiatio atque circumcisionis lex, quarum utramque octauo die fieri lege cautum est? Hic numerus aliquid fortasse cōmune habet cum octaua hac beatitudine, quæ quasi omnium beatitudinum caput, in summo optimi ascensus gradu collocata est. nam octauæ illius ænigmate illic propheta ostendit resurrectionis diem: expiatioque demonstrat inquinati hominis reditum ad eam, quæ naturalis est, munditiem: & circumcisio illud indicat, ut mortuas pelles abiiciamus quas nos induimus, postquam Deo non obedientes, uita nudati sumus. atque hic quidem octaua hæc beatitudo cælestem eorum restitutionem continet, qui in seruitutem inciderant, ab eaque ad regnum reuocantur.

Beati, inquit, qui persecutionem patiuntur propter me, quoniam ipsorum est regnum cælorum. en certaminum finis, quæ Dei nomine suscipiuntur. en laborum præmiũ. en sudorũ proposita merces; ut qui scilicet Dei causa in certamẽ descendunt; cælestẽ assequantur regnũ. Non in re caduca atque uaria est amplius incerta fluxaque felicitatis spes. nam terrena hæc in eo genere sunt, ut fluxa sint, temporumque uicissitudine mutentur. de iis uero, quæ in cælo apparent, quæue nos mente contemplamur, nihil tale iudicamus, ut eadem non sint ac sempiterna. sed quæ in cælo extant, serie quadam, continuatoq; ordine suum quæque cursum conficiunt. Attende igitur huius muneris præstantiã; quod non in iis scilicet, quæ incertæ res sunt, Dominus tibi tribuit dignitatis amplitudinem; ut ne aliquis uicissitudinis metus spes optimas perturbaret: sed cum cælorum regnum dicat; ostendit donum, cuius spes nobis proposita est, non temporum permutationibus mutari, sed sempiternum plane esse. At ex iis, quæ iam explicata sunt, illud in dubitationem uenit; & primum quidem; cur tam ei qui spiritu pauper est, quam illis, qui propter se persecutionẽ patiuntur, æquale utrisque Dominus proponat præmium, cum æqualia sint eorum certamina, quorum præmium par est & commune? Deinde quid est, quamobrem ad dexteram collocatos, ab illis seiunctos, qui a læua sunt; hos ipsos cum ad cælestẽ regnum uocet; alias huiusce honoris causas afferat? nam cum illic & misericordiã, & facultatum largitionem, & mutuam caritatẽ commemoret; neque spiritualis paupertatis, neque persecutionis causa sua susceptæ meminit. Itaque si ea, quæ in promptu est, sententia spectatur, ualde hæc inter se distare uidentur. quid enim

enim paupertati cum persecutione commune est? an hæc rursus cum caritatis amorisque conueniunt actionibus? si egentem hominem quispiam aluit, aut nudum uestiuit, aut uiatorem hospitio excepit, aut ægrotum, eumue, qui in uinculis est, quo potuit officii genere complexus est: quid hæc, si illius studii officiique rationem habueris, cum paupertate, persecutioneque consentiunt? Hic alienis incómodis medetur; illorum uero uterque tum is, qui pauper est, tum qui iniuriam persecutionemque patitur, iis indiget, qui alios curât; est tamen omnibus idem finis propositus: cum in cælum Dominus æque adducat eum, qui pauper spiritu est, atque illum, qui causa sua patitur, ac eos item qui misericordiam aliis tribuunt. Ergo quid nos ad hæc? nam cuncta inter sese cohærent, in eoque consentiunt, quod ad unum eundemque finem referuntur. etenim paupertas facile pellitur, pauperumque studium non est a paupertate alienum. Sed primum illud optimum factu esse censeo, ut ea considerem, quæ ad hunc sermonem pertinent; deinde quæ in controuersiam adducta sunt, animaduertam, quo pacto conuenire possint. Beati, qui persecutionem patiuntur. Vnde patiuntur, & a quo? Atque ea quidem, quæ in promptu est, oratio, & martyrum stadium, & fidei cursum ostendit. nam persecutio uehemens celeritatis studium significat eius, qui currit; uel potius in cursu uictoriam indicat. non enim qui currit, aliter uincere potest, nisi a tergo eum relinquit, quicum de cursu cõtendit. Itaque quoniam tum is, qui ad cælestis regni præmium cursum tenet, tum ille, qui ab aduersario ob præmium est exagitat, uterque pariter habet, quem a tergo relinquat; unus quidem eum cum quo cõtendit, alter uero illum, qui

qui persequitur. hi igitur sunt, qui in cōtentionibus pro fidei pietate susceptis, cū cursum confecerint, eos inimi ci persequuntur, nō assequuntur tamen. Sed huius beatitudinis, cuius spes nobis proposita est, illud caput esse uidetur, quod extremis uerbis quasi corona quādam ostēditur. nam illud re uera quam beatissimū est, Domi ni causa pati. Cur? quoniam si a malo uexaris, id causæ est, cur in bono uerferis: siquidem mali uitatio est bo ni assequendi occasio: bonum autem, atque adeo om ni bono præstans est ipse Dominus, ad quem is, qui persecutionem patitur, currere contendit. Ergo re ue ra beatus est, qui ad bonum assequendum adiutorem eum habet, qui inimicus est. Nam cum in finibus & bo ni, & mali collocata sit hominum uita: ut is, qui ab opti ma summaque spe cecidit, in tenebris iacet: sic qui a peccato sese auertit, atque a uitio alienauit, hic ad im mortalitatem atque iustitiæ lucem accedit. Itaque in iuriarum, quas abs tyrannis martyres accipiunt, spe cies illa quidem, quæ primo aspectu cernitur, acerbæ admodum sensui esse uidetur: quæ tamen contra il los fiunt, earum rerum finis omnem superat beatitu dinem. Sed satius est, huius sermonis sententiam ex emplis illustrare. Quis non animaduertit, quam lon ge grauius esse iudicetur insidiosè tractari, quam dili gi? quod sæpe graue ac molestum uidetur, id ipsum plerisque in causa fuit felicitatis. id quod de Iosepho hi storia narrat. Huic cum a fratribus insidiæ factæ essent, eamque ob causam ab illorum consuetudine remotus, ac diuenditus, rex eorum factus est, a quibus insidiosè tractabatur: neque fortasse ad tantam dinignitatem peruenisset; nisi insidiosa fratrum inuidia ad regnum sibi iter patefecisset. Ut igitur si quis futurarum rerum

scientia

scientia præditus Iosepho prædixisset; beatum cum fore ex insidijs; quæ sibi tendebantur: non probabilis quidem primo aspectu huius coniectura uisa esset ei; qui audisset; quiue id tantum spectasset, quod esset in præsentia acerbum; propterea quod fieri non posse putaret, ut impendentis mali optimus expectaretur euentus. Sic hoc quidem loco, cum bellum, quod fidelibus piisque hominibus sit a tyrannis, atrox admodum sensui nostro uideatur; efficit ut ii, qui artioribus carnis uinculis astricti tenentur, ægre in eam regni spem ueniant, quæ illis est in rebus difficilibus ac molestis proposita: sed Dominus, qui naturæ imbecillitatem sustentat, iis, qui maxime infirmi sunt, prædicat, qui sit certaminis euentus, ut regni spe proposita breuē illum dolorum sensum ipsi superent. Atque eam ob causam Stephanus ille magnus, cum lapidibus undique obrueretur, gaudet, fortiterque corpore lapides, qui in eum crebri quasi densæ niuis instar coniciebantur; ipse excipit; tanquam illa lapidum coniectio esset sibi ros quidam suavis: ac terribilis illis percussoribus gratias agit, oratque ne hoc illis crimini culpaque detur: quoniam is & promissum accepit; & spem cum iis, quæ apparebant, conuenire uidit. nam illud auditione cum accepisset fore, ut qui Dei nomine paterentur, ii in cælesti uersarentur regno; dum is lapidum ictu cruciaretur, id oculis uidit, quod in spe maxime habebat; siquidem in illo confessionis cursu, cælum apertum sese ei ostendit; id quod maxime sperabat. Dei gloria currens certamen e cælesti sede prospicit: ille inquā ipse, cui is certando laudes & testimonium dabat. nam quod certaminis arbiter interest, hoc opem obscure indicat, quam is pugnāti homini fert; ut ex hoc cognoscamus, qui

qui pugnās certaminaque instruit, eundem esse, qui contra aduersarios auxilium iis dat, qui pro se certamen susceperunt. Ergo quid beatius eo excogitari potest, qui cum Domini causā pugnando patiat, eundem, qui illius pugnae arbiter est, habet adiutorem? Neque enim facile est, atque haud scio, an fieri ullo pacto possit; ut rebus iis, quae in hoc uitae curriculo uel iucundissimae apparent, illud bonum cuiuspiam potius sit, atque antiquius, quod minime cernitur: ut scilicet quis malit aut domo se expelli, aut ab uxore, liberis, fratribus, parentibus, atque ab aequalibus suis disjungi: rebusque omnibus huius uitae iucundissimis spoliari; nisi Dominus ipse illi adiuuet, qui ex praenotione ad bonum uocatus est: quos enim, inquit Apostolus, praedestinauit, hos & uocauit; & quos uocauit, hos & iustificauit; quos autem iustificauit, illos & glorificauit. Quoniam igitur corporis sensibus ministris animus quodam modo huius uitae uoluptatibus adhæret; oculorumque sensu uoluptatē ex optimo alicuius rei colore capit; & auribus ad suaues cantus trahitur; & gustatu, olfactu, tactuque item procliuius ad id fertur, quod cuique sensui est natura accommodatum: iccirco cum ille uoluptatibus sensuum uel quasi clauo aliquo affixus teneatur; uix ab iis rebus auelli potest, quibus addictus simul alitur: quasi que testaceo quodam integumento coopertus, ueluti testudines, & cochleae, tardus ad hos motus ducitur; cum omne uitae huius onus secum una ferat. Quamobrem cum ita sese habeat animus, facile is a persequētibus capitur; & cum bonorum proscriptionis terror ei iniicitur; ac minae damnumque proponitur earum rerum, quarum maximum est in hac uita studium; tum inimici minis facile succumbit ac cedit. At cum uiuus ser-

sermo, ut est apud Apostolum, efficax & penetrabilior omni gladio ancipiti in eum peruenerit, qui fidem uere suscepit; diffecueritque ea, quæ habitu quodam sunt male comparata, malæque consuetudinis uincula ruperit: tum is mundanas has uoluptates quasi graue aliquod onus cum e ceruicibus deiecerit, quasiq; cursor aliquis, ipso certaminis arbitro ad cursum adiutore usus, facilis atque expeditus certaminis curriculum conficiet. non enim quæ reliquit, sed quæ appetit, ea spectat: neque oculus ad id conuertit, quod a tergo positum est; sed ad illud contendit, quod ob oculos positum est bonum: neque rerum terrenarum iactura dolet, sed cælestium gaudet lucro, omneque propterea suppliciorum genus, quasi aliquod propositi gaudii subsidium atque adiuuētum, forti atque alacri animo subire non recusat. Ignem quasi materiæ sordes purgantem, gladium, tanquam eum, qui consuetudinem dirimat, cuius uinculis mens illigata tenetur cum iis, quæ terrena sunt, & ad carnis sensum pertinent; omnesque denique laborum dolorumue cruciatus, quicunque excogitari possunt, fortiter alacriterque sustinet; quasi hæc tormenta medicamentum afferant optimum pestifero uoluptatis ueneno. Nam ut quibus bilis abundat, ii amaras potiones libenter hauriunt, ut illarum remedio morbi causa tollatur: sic qui ab inimico uim patitur, ad Deumque confugit, dolorum cruciatum sustinet, tanquam hæc dolorum uis ualeat ad restinguendum uoluptatis incendiū: qui enim cruciatibus torquetur, non potest dolorem sentire. Cum igitur ex uoluptate peccandi sit introducta consuetudo; re plane contraria tollitur. Ergo qui hanc nominis christiani professionem exagitant, inueniuntque pro-

pterea intolerabilia suppliciorū tormenta , ii quidem, cum pestiferæ uoluptati , adhibitis dolorum cruciati-
bus, medeantur ; aliquod animis remedium his labo-
ribus afferunt. Hac quidem ratione crucem Andreas;
gladium Paulus; lapides Stephanus ; capiteque inuer-
so crucis tormentum subit beatus Petrus : omnesque
denique deinceps, qui pro fidei causa dimicationem su-
sceperunt , uaria sustinere supliciorum genera : aut
enim ad bestias sunt damnati, aut in præcipitem locum
commissi , saepeque ex altissimo loco deicecti , aut igni-
bus cremati, aut frigore congelati, aut distractione
laterum dilacerati, aut capite confixi, aut oculis orba-
ti , aut digiti illis præcisi, aut crura fracta , aut ipsi fame
enecti . Hæc igitur omnia ac talia suplicia tanquam pec-
catum expiantia sanctissimi illi uiri læto animo subi-
bant: ut , cum grauis ille acerbusque dolorum sensus,
omnes, quæ essent animo impressæ , uoluptatis notas
deleret, ne ullum quidem eius uestigium in animo re-
linqueretur . Ergo beati, qui persecutionem patiuntur
propter me . Hoc autem eiusmodi est , ut aliud item
ratione comprehendamus, ueluti si quis ualitudinem
ita loquentem induceret. Beati, qui propter me sunt a
môrbo liberati; quoniam qui aliquândo ægrotauerunt ,
morbis depulsis, me fruëtur. ita hanc uocem audiamus,
quasi ipsa uita sit , quæ eiusmodi nobis beatitudinem
clamore significet : Beati , quos mors persequitur pro-
pter me . aut quasi lux dicat: Beati , quos tenebræ per-
sequuntur propter me . pari item ratione iustitia , san-
ctimonia, integritas, bonitas, omnisque denique opti-
ma, quæ de Domino aut exprimitur, aut mente concip-
itur sententia: ita, ut is intelligitur , tibi illud dicere
existimetur. Beatus omnis , quicumque ab omni re con-

traria

traria sese auertit, uitio; tenebris, peccato, iniquitate, auaritia, atque ab his singulis se remouet, quæ uirtuti sunt & dictis & factis contraria. Nam cum quis a rebus malis auersus est, ad bonas hic potest sese conuere. Qui facit peccatum, inquit Dominus, seruus est peccati. Ergo qui se remouit ab eo, cui antea seruitutem seruierat, in libertatis dignitatem hic se uendicat. Summum autem libertatis genus illud est, cum quis sui iuris factus est. regia uero dignitas nullum habet dominatum, qui sibi præstet. Itaque si sui iuris est is, qui a peccato se totum auertit; regisque dignitatis illud proprium est, ut nullo imperio, nullo dominatu teneatur: optimo quidem iure is beatus dicitur, qui malo uexatur, quoniam inde regia sibi dignitas comparatur. Quare ne ægrè feramus, fratres, si a terrenis rebus expellimur; nam qui hinc migrat, in cælesti regno domicilium habet. In rebus uniuersis creatis naturæ, quæ ratione utitur, ad habitandum duo sunt hæc attributa elementa, cælum, & terra. Sedes ac domicilium eorum, qui carnis astricti uinculis hæc uitæ usura fruuntur, terra est; cælum autem illorum, qui corpore carent. Necessè est igitur, uitam nostram aliquo in loco omnino esse. Nisi e terra pulsi sumus, in terra omnino manemus: si hinc discedemus, in cælum commigrabimus. Vide, cum hæc beatitudo tantum tibi boni conciliet, quo per id, quod molestum uideretur, te ducat? quam rem cum animaduertisset Paulus, ita scribit: Omnis disciplina in præsentem quidem uidetur non esse gaudium, sed doloris: postea autem fructum pacatissimum exercitatis per eam reddet iustitiæ. ergo fructuum, qui sperantur, flos est hæc uitæ perturbatio. Itaque propter fructum nos etiam florem decerpamus; agitemurq; ut

curramus. cursum autem cum teneamus, ne frustra hoc faciamus, sed cursus omnis nobis propositus sit ad cælestis regni præmium; atque ita nos curramus, ut assequamur. Quid illud est, quod assequemur? ecquod præmium? ecquæ corona? mihi quidem nihil aliud, quod speratur, esse uidetur, quam ipse Dominus. is enim est certantium iudex; is uictorum corona; is qui hereditatem tribuit; is ampla est hereditas; is optima pars; is qui tibi partem largitur; is qui locupletat; is opes: is cum sit tuus thesaurus, thesaurum tibi ostendit, pretiosæque margaritæ tibi cupiditatem iniicit; uenalemque se tibi tanquam optimo mercatori præbet. Quare ut illa assequamur, hæc abiiciamus: quæue possidemus, ut in foro sit, ea permitemus cum ea re, quam non habemus. Itaque si uim iniuriasque patimur, ne doleamus, immo uero lætemur: quoniam cum ex iis rebus, quæ in terris magni fiunt, nos pulsi simus, ad cæleste bonum impellimur; ut affirmat nobis is, qui beatos dicit eos, qui nomine suo patiuntur: quoniam ipsorum est regnum cælorum, munere benignitateque Domini nostri Iesu Christi, cui gloria potentiaue sempiternis ætatum sæculis. Amen.

F I N I S.

Errata corrigito sic. Pag. 4. Ver. 19. dissidentiū. pag. 6. 5. tribus. pag. 8. 5. modestiam. pag. 41. 14. repugnantium. pag. 96. 16. ratio. pag. 104. 28. uiuunt. pag. 104. 36. conuiuorum. pag. 158. 30. dignitatem. In reliquis, si quæ modo prætermissa sunt, utere tuo iudicio.

LECTORI S.

Dabimus operam, quantum in nobis erit, ut reliqua Nyfeni scripta, atque monumenta, quæ magno reip. Christianæ damno in tenebris latent, in apertum proferantur. in eo enim maxime his temporibus uersamur, ut catholice doctrinæ ueritas sanctorum patrum patrocínio suam dignitatem retineat.

Series chartarum.

1 ABCDEFGHIKLMNOPQRSTVX.









